

**ADVISORY COMMITTEE ON THE  
FRAMEWORK CONVENTION FOR THE  
PROTECTION OF NATIONAL MINORITIES**

COUNCIL OF EUROPE



GVT/COM/IV(2018)004  
(Romansh language version)

**Comments of the Government of Switzerland on the Fourth Opinion of the Advisory Committee on the implementation of the Framework Convention for the Protection of National Minorities by Switzerland - received on 7 December 2018**



Schweizerische Eidgenossenschaft  
Confédération suisse  
Confederazione Svizzera  
Confederaziun svizra

**Quart Parairi dal Comité consultativ per la  
Convenziun da basa dal Cussegl da  
l'Europa per proteger las minoritads  
naziunalas  
e  
posiziun da la Svizra**

December 2018

## REMARTGAS PRELIMINARAS

Il Comité consultativ da la Convenziun da basa per proteger las minoritads naziunalas (inditgada qua sutwart sco «Convenziun da basa») ha deliberà ses quart Parairi davart la Svizra a chaschun da sia 62. dieta dals 31 da matg 2018. Il Parairi è vegnì transmess ils 6 da fanadur 2018 al represchentant permanent da la Svizra tar il Cussegl da l'Europa. La Svizra è vegnida envidada da prender posiziun en scrit fin ils 6 da november 2018. Quest termin è vegnì prolungà en cunvegnientscha cun il Secretariat da la Convenziun da basa.

A chaschun da sia visita en Svizra dals 5 fin ils 8 da mars 2018 ha il Comité consultativ pudì sa procurar en moda transparenta las infurmaziuns ch'en necessarias per ses Parairi. En quest connex ha la Svizra fatg endament ch'ella dettia gronda paisa ad in dialog constructiv cun il Comité consultativ. Durant sia visita ha la delegaziun dal Comité consultativ pudì sruntrar represchentants da tut las minoritads naziunalas renconuschidas, particularmain da las minoritads linguisticas, dals Jenics, Sinti e Manouches svizzers sco er da las cuminanzas gidieus da la Svizra. La delegaziun ha ultra da quai salvà discurs cun represchentants dals Roma e da la cuminanza islamica da la Svizra. Plinavant è ella sa sruntrada cun numerus represchentants da l'administraziun federala, da las autoritads chantunalas e communalas e dal parlament federal. La finala han gî lieu inscunters er cun pliras organisaziuns nunguvernamentalas e cun plirs circuls academics. Tras visitas da la delegaziun en ils chantuns Friburg e Berna per inspecziunar ina piazza da transit per viagiants esters ed ina piazza da staziunament per Jenics, Sinti e Manouches svizzers, ha pudì vegnir purschida ina plivalur a la delegaziun dal Comité consultativ. Vitiers è vegnida ina visita a Cuira cun in inscunter cun las autoritads grischunas e cun sruntradas cun represchentants da las minoritads taliana e rumantscha. Quests inscunters e questas visitas han gidà a la delegaziun dal Comité consultativ a sa far in maletg concret ed exact da la situaziun da las minoritads naziunalas e d'autras cuminanzas en Svizra.

La Svizra ha prendì enconuschentscha cun interess dal quart Parairi dal Comité consultativ davart la Svizra. Las constataziuns detagliadas e fundadas dal Comité consultativ mussan ch'el ha examinà cun quità la situaziun da las minoritads en Svizra. Las recumandaziuns equilibradas a la Svizra tegnan quint da las posiziuns da las differentas represchentanzas dals interess. La Svizra apprezziescha ch'ella survegn l'occasiun da prender posiziun davart il Parairi.

La posiziun a las autoritads dal Cussegl da l'Europa vegn prendida en il num dal Cussegl federal svizzer, il qual è responsabel per ils affars exteriurs e pia er per l'observaziun da las obligaziuns internaziunalas da la Svizra. Numerus temas sco la planisaziun dal territori e la furmaziun pertutgan però la cumpetenza dals chantuns, ils quals èn er responsabels per realisar la Convenziun da basa.

La posiziun è vegnida redigida da la Direcziun da dretg internaziunal public (DDIP) dal Departament federal d'affars exteriurs (DFAE) en stretga collavuraziun cun ils suandants posts da servetsch da l'administraziun federala:

- Uffizi federal da cultura (UFC)
- Servetsch per il cumbat cunter il rassissemm (SCRA)
- Uffizi federal da statistica (UST)
- Uffizi federal da giustia (UFG)
- Delegada federala per la plurilinguitad
- Servetschs linguistics centrals da la Chanzlia federala
- Uffizi federal da communicaziun (UFCOM)
- Secretariat da stadi per l'economia (SECO)
- Delegà da la Rait naziunala da segirezza

La Cumissiun federala cunter il rassissem (CFR), ina cumissiun extraparlamentara ed independenta, è medemamain stada participada per elavurar la posiziun.

Tut ils chantuns sco er la Conferenza da las regenzas chantunalas (CdC), la Conferenza svizra dals directurs chantunals da l'educaziun publica (CDEP) e la Conferenza svizra dals directurs da construcziun, da planisaziun e da protecziun da l'ambient (CCPA) èn medemamain vegnids envidads d'inoltrar posiziuns. Tras lur federaziuns representativas èn vegnidas consultadas er las vischnancas e las citads, medemamain la Fundaziun «In futur per ils viagiants svizzers».

Las explicaziuns qua survart èn vegnidas redigidas respectivamain translatadas, sco il Quart Rapport da la Regenza svizra davart la realisaziun da la Convenziun da basa, en las quatter linguas uffizialas da la Svizra: en franzos, en tudestg, en talian ed en rumantsch. Il quart Parairi dal Comité consultativ, ch'è avant maun per la Svizra en franzos ed en englais, è medemamain vegnì translatà da la Chanzlia federala en las quatter linguas uffizialas. Tut ils documents vegnan publitgads sin la pagina d'internet da la DDIP.

Per facilitar la lectura èn las explicaziuns da las autoritads svizras vegnidas integradas directamain en il document dal quart Parairi davart la Svizra. Las explicaziuns èn **marcadas cun gris**. La «Resumaziun» e las «Constataziuns las pli impurtantas» dal quart Parairi èn vegnidas commentadas essenzialmain tar las correspondentes «Constataziuns tar ils singuls artitgels». Analogamain èn vegnidas commentadas las «Recumandaziuns per in agir immediat» tar las «Constataziuns tar ils singuls artitgels» e tar las recumandaziuns sut «Remartgas finalas».

# **COMITÉ CONSULTATIV DA LA CONVENZIUN DA BASA PER PROTEGER LAS MINORITADS NAZIUNALAS**

---

## **Quart Parairi davart la Svizra – deliberà ils 31 da matg 2018**

### **Resumaziun**

Il sistem per proteger las persunas che appartegnan a las minoritads naziunalas è sa sviluppà cuntinuadament en Svizra en il decurs dals onns. La Svizra dat er vinavant ina gronda impurtanza als dretgs da persunas che appartegnan a las minoritads naziunalas, particularment applitgond la Convenziun da basa. La Confederaziun, ils chantuns e las vischnancies sa stentan da promover ina dretga chapientscha tranter las culturas en la societad. Ma i regia er en Svizra in tschert populissem.

Las persunas che appartegnan a las minoritads naziunalas sentan en general ina intoleranza pli e pli gronda envers ellus; ina intoleranza che sa manifestescha er en il discurs politic ed en l'internet. In proceder pli efficazi cunter pleuds instigants para necessari. La politica e la legislaziun per cumbatter cunter la discriminaziun n'èn betg sa midadas, malgrà repetidas recumandaziuns da chattar ina proposta cumplessiva en quest sectur. L'access a la giustia n'è betg vegnì facilità suffizientamont per persunas che appartegnan a las minoritads naziunalas e che davantan victimas da pleuds instigants u da discriminaziun.

En connex cun la protecziun da persunas che appartegnan a las minoritads linguisticas èn vegnids fatgs ulteriurs progress sin plaun federal. Dacurt è vegnida refusada ina iniziativa dal pievel davart ils servetschs da dretg public dal radio e da la televisiun. Quai ha reflectà in confess da princip da las votantas e dals votants per la plurilinguitad. Tuttina ston ils chantuns rinforzar lur stentas per promover e per proteger la plurilinguitad en l'administraziun chantunala dals chantuns bilings e trilings. Ultra da quai hai num da cumbatter cunter stentas localas che mettan en dumonda l'instrucziun en e da las linguas minoritaras, perquai ch'ellas indebleschan il consens che gauda in vast sustegn.

Las autoritads svizras han concludì da betg pli duvrar la noziun generala «viagiants svizzers», mabain da discurrer da Jenics, Sinti e Manouches. Malgrà las stentas da las autoritads federalas e d'intgins chantuns regia anc adina ina mancanza da pazzas da staziunament e da transit per persunas che appartegnan a questas minoritads. Stgaffir novas pazzas fa difficultads, perquai che en la populaziun locala existan stereotips stinads a regard la moda da viver nomada.

## **Recumandaziuns per in agir immediat:**

- Las autoritads federalas ston infurmar la populaziun pli e pli davart il dretg vertent per cumbatter cunter la discriminaziun e ston prender puspè en consideraziun ina legislaziun generala federala cunter la discriminaziun; facilitar l'access a la giustia per personas che appartegnan a las minoritads naziunalas e ch'en daventadas victimas da discriminaziuns, particularmain cun autorisar organisaziuns nungovernmentalas d'agir en l'interess general e da defender ils dretgs ed ils interess da las victimas; stgaffir uschè baud sco pussaivel ina instituziun dals dretgs umans en il senn dals Princips da Paris, ch'e independenta instituunalmain e finanzialmain e da la quala il mandat e l'abilitad d'agir per promover e per proteger ils dretgs umans èn plainamain garantids; crear posts da mediaziun («persuna da mediaziun instituziuns») sin plaun federal e chantunal.
- En il rom da proceduras accessiblas, imparzialas e transparentas: sustegnair finanzialmain projects che mantegnan e promovan l'identitat e la cultura da personas cun ina moda da viver nomada; conceder a la fundaziun «In futur per ils viagiants svizzers» meds finanzials e persunals sufficients, per ch'ella possia ademplir sias incumbensas e cuntanscher las cuminanzas pertutgadas; deliberar uschè baud sco pussaivel il sboz dal plan d'acziun federal per promover Jenics, Sinti e Manouches e realisar svelt las mesiras ch'en cuntegnidas en quel; sensibilisar la populaziun per la moda da viver nomada; stgaffir avunda plazzas da staziunament e da transit entaifer il termin ch'e previs en il sboz dal plan d'acziun.
- Sentenziar sistematicamain ed immediatamain tut las furmas d'intoleranza, particularmain quellas manifestadas publicamain, saja quai antiziganisse, antisemitisse u ostilitad envers Muslims; analisar sistematicamain talas manifestaziuns e perseguitar penalmain ils auturs da quellas; dar la pussaivladad a personas che appartegnan a las minoritads naziunalas, sco victimas da plebs instigants, da purtar plant davant dretgira, particularmain cun autorisar organisaziuns nungovernmentalas d'agir en l'interess da la generalitat e da defender ils dretgs ed ils interess da las victimas; perseguitar senza retard las mesiras identifitgadas e las realisar sin plaun federal e chantunal, per che la segirezza da las personas che appartegnan a las minoritads naziunalas saja garantida.

## I. Las constataziuns las pli impurtantas

### Procedura d'examinaziun

13. Quest quart Parairi davart la Svizra è vegnì deliberà en concordanza cun l'artitgel 26 alinea 1 da la Convenziun da basa per proteger las minoritads naziunalas (en quai che suonda: Convenziun da basa) e cun la regla 23 da la Resoluziun (97) 10 dal Comité dals ministers. Las enconuschientschas sa basan sin las infurmaziuns cuntegnidas en il quart rapport statal ch'è arrivà ils 15 da favrer 2017, sin ulteriuras infurmaziuns en scrit sco er sin las infurmaziuns ch'il Comité consultativ ha pudì rimnar tras ses contacts cun posts statals e betg statals a chaschun da sia visita a Bern/Berne<sup>1</sup>, Joux-des-Ponts e Chur/Cuira/Coira dals 5 fin ils 8 da mars 2018. Il Comité consultativ engrazia a las autoritads svizras per la collavuraziun excellenta en connex cun la realisaziun da la visita. Il Comité consultativ engrazia ultra da quai a tut ils interlocuturs che l'han dà infurmaziuns.

14. Il rapport statal che avess stuì vegnir inoltrà il 1. da favrer 2015, è deplorablament sa retardà per 2 onns. Il Comité consultativ engrazia a las autoritads federalas per la consultaziun detagliada dals posts statals e betg statals, ch'è vegnida fatga en il rom da l'elavuraziun dal rapport statal sco er per la publicaziun en l'internet en las quatter linguas naziunalas. Ils 9 da december 2013 han il Departament federal d'affars exteriurs ed il Departament federal da l'intern organisà a Bern/Berne ina dieta davart las linguas minoritaras en Svizra. Ils 27 da mars 2015 è il Departament federal d'affars exteriurs sa participà ad in colloqui a l'Universitat da Freiburg/Fribourg davart la vernissascha d'in cudesch che cuntegna in commentari tudestg tar la Convenziun da basa ed ha preschentà las difficultads dals Jenics, Sinti e Manouches svizzers cun ina moda da viver nomada. Il 1. da december 2015 han il Departament federal d'affars exteriurs ed il Departament federal da l'intern organisà a Bern/Berne ina dieta davart la situaziun da la minoritad gidieua en Svizra. Plirs commembres dal Comité consultativ han prendì part a questas occurrentzas.

### Survista da la situaziun actuala

15. Il sistem per proteger las persunas che appartegnan a las minoritads naziunalas è sa sviluppà cuntuadament en Svizra en il decurs dals onns. La Svizra dat er vinavant ina gronda impurtanza als dretgs da persunas che appartegnan a las minoritads naziunalas. Quai sa manifestescha particularment applitgond la Convenziun da basa. La Svizra consista da 26 chantuns suverans. Quai è francà en l'artitgel 3 da la Constituziun federala<sup>2</sup>. Ils chantuns han Constituziuns chantunalias sco er agens organs da la legislativa, da la giudicativa, dals fatgs fiscals e da l'administraziun. Las cumpetenças da la Confederaziun sa restrenschan sin quels secturs che vegnan numnads en la Constituziun federala. Ils chantuns èn sutdividids en vischnancas. Las cumpetenças da las vischnancas èn determinadas en emprima lingia en las Constituziuns chantunalias ed èn differentas da chantun a chantun. Tenor il princip da la subsidiarität en l'artitgel 5 da la Constituziun federala han las autoritads federalas in dretg d'intervenziun limità pertutgant ils secturs da cumpetença dals chantuns e da las vischnancas, uschia per exempl en ils secturs da la cultura e da la furmaziun<sup>3</sup>. En il senn da l'artitgel 48 da la Constituziun federala pon ils chantuns far contracts in cun l'auter, particularment per armonisar las politicas chantunalias e per coordinar lur proceder sin plaun naziunal. Uschia prevesa per exempl l'artitgel 62 alinea 4 da la Constituziun federala<sup>4</sup> pertutgant ils fatgs da

<sup>1</sup> Ils noms locals vegnan numnads en quest Parairi en las linguas uffizialas dal chantun respectiv.

<sup>2</sup>L'artitgel 3 da la Constituziun federala sa cloma sco suonda: «Ils chantuns èn suverans, sche lur suveranitat na vegn betg limitada tras la Constituziun federala; els exerciteschan tut ils dretgs che n'èn betg attribuïds a la Confederaziun.»

<sup>3</sup>L'artitgel 5a da la Constituziun federala sa cloma sco suonda: «Tar l'attribuziun e tar l'adempilment d'incumbensas dal stadi sto vegnir resguardà il princip da la subsidiarität.» Guarda er artitgel 43a alinea 1: «La Confederaziun surpiglia mo las incumbensas che surpassan las pussaivladads dals chantuns u che dovràn ina regulaziun unitara tras la Confederaziun.»

<sup>4</sup> L'artitgel 62 alinea 4 da la Constituziun federala sa cloma: «Sch'i na dat nagina armonisaziun dals fatgs da scola en ils secturs da la vegliadetgna da cumentzar la scola, da l'obligaziun d'ir a scola, da la durada e da las finamiras dals stgalims da

scola, che tscherts parameters dal sistem da furmaziun sin plaun naziunal ston vegnir coordinads. Questa coordinaziun è en emprima lingia ina incumbensa dals 26 ministers chantunals da furmaziun. Per quest intent furman els in gremi politic, la Conferenza svizra dals directurs chantunals da l'educaziun publica (CDEP). La CDEP sa basa sin contracts interchantunals cun forza legala (Concordats), en moda ch'ils chantuns decidan suveranamain, sch'els vulan suttascriver quels. In gremi analog coordinescha ils fatgs interchantunals da giustia e da polizia.

*Rectificaziun: Il plan da la subsidiaritad è fixà en l'artitgel 5 litera a da la Constituziun federala.*

*Correctura en il text franzos: La designaziun correcta da la CDEP tuna per franzos «Conférence suisse des directeurs cantonaux de l'instruction publique».*

16. Areguard la politica da linguas stoi vegnir constatà che tudestg, franzos, talian e rumantsch èn bain renconuschids sco linguas naziunalas<sup>5</sup>, ma che en l'administraziun federala valan mo tudestg, franzos e talian sco linguas uffizialas. Mintga chantun fixescha dal rest sez sias linguas uffizialas. Trais chantuns renconuschan las duas linguas uffizialas tudestg e franzos (Bern/Berne, Freiburg/Fribourg, Wallis/Valais) ed in chantun (Graubünden/Grischun/Grigioni) renconuscha traís linguas uffizialas (tudestg, rumantsch e talian). Il chantun Ticino renconuscha mo talian sco lingua uffiziala. Mintga chantun regla ils dretgs da las minoritads en la legislaziun chantunala. En quest connex ston vegnir observadas las disposiziuns da la Constituziun federala. Schebain che – sin plaun federal – èn vegnids fatgs ulteriurs progress en connex cun la protecziun da las minoritads linguisticas, duain vegnir rinforzadas las stentas sin plaun chantunal. Dacurt è vegnida refusada ina iniziativa dal pievel davart ils servetschs da dretg public dal radio e da la televisiun. Quai ha reflectà in confess da princip da las votantas e dals votants per la plurilinguitad.

*En l'artitgel 70 alinea 1 da la Constituziun federala hai num: «En il contact cun persunas da lingua rumantscha è er il rumantsch lingua uffiziala da la Confederaziun».*

17. La denominaziun collectiva «viagiants svizzers» è vegnida remplazzada tras ina denominaziun differenziada: «Jenics, Sinti e Manouches». Questas noziuns designeschon persunas che han ina moda da viver nomada u mez nomada ubain che han in domicil stabel. Malgrà las stentas da las autoritads federalas e da tscherts chantuns regia anc adina ina mancanza da pazzas da staziunament e da transit. La creaziun da novas pazzas – pazzas da staziunament per ils mais d'enviern, pazzas da passagi per ils mais da stad e pazzas da transit – è in tema politic delicat, particularmain en las vischnancas. La ristga d'ina iniziativa federala dal pievel (q.v.d. d'ina votaziun locala) lascha targlinar ils represchentants da las autoritads da s'engaschar cumplainamain a favur d'ina soluziun dal problem (cf. artitgel 5). Las ultimas midadas da la Lescha federala davart il commerzi ambulant pudessan restrenscher ulteriuramain la pussaivladad da fermadas spontanas sin bains immobigliars privats (cf. artitgel 5) e far donn a l'integraziun sociala ed economica dals viagiants (cf. artitgel 5). En quest regard vegn constatada ina intoleranza creschenta envers Jenics, Sinti e Manouches, er en il discurs politic ed en l'internet. Concretamain han già lieu demonstraziuns cunter l'installaziun da pazzas da staziunament e da transit durant la perioda d'examinaziun. Er las medias n'intermedieschan betg gist in maletg avantagius da questas cuminanzas. I sa tracta da minoritads, che la maioritat n'enconuscha anc adina per gronda part betg. Ellas na cumparan er betg en la retschertga da datas davart discriminaziun, schebain che la societad civila ha annunzià cuntravenziuns correspudentas. Il Comité consultativ ha prendì enconuschienscha che las autoritads prendan regularmain mesiras per meglierar las cundiziuns (cf. part

---

furmaziun, dals passadis d'in stgalim a l'auter sco er da la renconuschienscha da diploms, decretescha la Confederaziun las prescripcziuns necessarias.»

<sup>5</sup> L'artitgel 4 da la Constituziun federala sa cloma: «Las linguas naziunalas èn il tudestg, il franzos, il talian ed il rumantsch.»

«Giudicament da las mesiras sin fundament da las ulteriuras recumandaziuns dal terz ciclus da surveglianza»). Sin plaun federal è pront in plan d'acziun per la deliberaziun (en quai che suonda: sboz dal plan d'acziun federal). Elavurà è el vegnì da la Gruppa da laver «per meglierar las condizioni per la moda da viver nomada e per promover la cultura dals Jenics, Sinti e Roma en Svizra» ed el resguarda tut ils aspects relevantes, inclusiv la promozion da la cultura e da l'istorgia dals Jenics sco er inclusiv las difficultads specificas en il sectur da scola. Pertugant la participaziun da Jenics, Sinti e Manouches a la vita publica (cf. artitgel 15) manca ina represchentanza duraivla sin tut ils plauns – er sin plaun chantunal ed interchantunal.

*Las suandardas rectificaziuns ston vegnir fatgas:*

- 1.° Per contestar in relasch legislativ d'in chantun u d'ina vischnanca po la populaziun da quest chantun u da questa vischnanca lantschar in referendum, betg ina iniziativa.*
- 2.° Las cuminanzas dals Jenics, Sinti e Roma èn medemamain registradas en las datas davart la discriminaziun: En il rapport biennal dal Servetsch per il cumbat cunter il rassism (SCRA) «Discriminaziun rassistica en Svizra» vegn observada la situaziun dals Jenics, Sinti e Manouches cun ina moda da viver stabla e nomada en Svizra (rapport 2016, p. 110). Er la situaziun dals Roma en Svizra vegn resguardada (rapport 2016, p. 116):*

*<https://www.edi.admin.ch/edi/de/home/fachstellen/frb/berichterstattung-und-monitoring/bericht--rassistische-diskriminierung-in-der-schweiz-.html>*

*Ultra da quai è deditgà il modul d'approfondaziun «Omnibus» che vegn realisà l'onn 2019 en il rom da la retschertga «Convivenza en Svizra», spezialmain a la discriminaziun da la moda da viver nomada en Svizra.*
- 3.° Tenor il sboz dal plan d'acziun federal «Jenics, Sinti, Roma» na duai betg mo vegnir tematisada l'istorgia dals Jenics en l'instrucziun da scola, mabain er quella dals Sinti, Manouches e Roma.*

18. La politica per cumbatter cunter la discriminaziun e la legislaziun respectiva n'èn betg sa sviluppadas vinavant (cf. artitgel 4). Ultra da quai para d'esser necessari in proceder pli efficazi cunter pleuds instigants (cf. artitgel 6). En il decurs da l'ultima perioda da surveglianza èn vegnids annunziads en quest connex problems da segirezza che pertugan cunzunt la minoritad gidieua (cf. artitgel 6). Mesiras preventivas per meglierar la situaziun vegnan elavuradas actualmain. La libertad e la pluralidad da las medias èn garantidas sufficientamain, las medias publicas èn activas en las quatter linguas naziunals. La refusa da l'Iniziativa «No Billag» (cf. artitgel 9) ha mussà dacurt che la plurilinguitad chatta in vast consentiment en la populaziun. En l'administraziun federala vegn prest ad esser cuntanschida la represchentanza proporziunala da las minoritads linguisticas en il senn da la Lescha da linguas (cf. artitgel 10). Sin plaun chantunal basegni ulteriuras stentas per promover pli intensivamain la represchentanza proporziunala, particularmain en il chantun Graubünden/Grischun/Grigioni.

### **Giudicament da las mesiras sin fundament da las recumandaziuns dal terz ciclus da surveglianza per in agir immediat**

19. Malgrà las stentas da las autoritads da la Confederaziun e d'intgins chantuns ston ins constatar in regress en connex cun il dumber total da plazzas da staziunament, da passagi e da transit per personas cun moda da viver nomada. Las autoritads da tut ils plans sco er ils represchentants dals Jenics, Sinti e Manouches cun ina moda da viver nomada èn d'accord ch'il dumber da las plazzas stoppia vegnir augmentà. Dentant stagnescha la situaziun pervia da differents facturs. Cunzunt envers las personas che appartegnan a minoritads (Jenics, Sinti

e Manouches), oravant tut envers talas cun ina moda da viver nomada, existan anc adina pregiudizis.

20. Tranter il dumber da cas da dretgira en connex cun pleuds instigants e cun discriminaziun e las retschertgas d'organisaziuns nungouvernementalas ch'en activas en quest sectur, datti anc adina grondas differenzas. Jenics, Sinti e Manouches sco er persunas che appartegnan a las cuminanzas gidieuas e muslimas vegnan anc adina confruntads cun tenutas ostilas. Annunziadas èn vegnidas attatgas sin persunas che appartegnan a questas minoritads.<sup>6</sup> Ostilitads publicas envers persunas che appartegnan a minoritads s'augmentan, cunzunt en las raits socialas<sup>7</sup> ed er da personalitads politicas. Tals acts na vegnan betg sentenziads sistematicamain sin via uffiziala. I dat mesiras preventivas salidaivlas, particularmain quellas da la Cumissiun federala cunter il rassissem, sco per exempl la campagna per toleranza e per in dialog intercultural. L'access a la giustia per las victimas da pleuds instigants è percuter memia cumplitgà. Las organisaziuns nungouvernementalas n'en plinavant betg autorisadas ni d'agir en l'interess general, ni da represchentar ils dretgs ed ils interess da las victimas.

21. Sin plaun federal èn vegnidas fatgas stentas considerablas per promover ils dretgs linguistics da las persunas che appartegnan a las minoritads naziunalas. Il dretg da pudair duvrar l'atgna lingua en l'administraziun federala è vegnì rinforzà e vegn er observà. En connex cun la represchentanza proporziunala da tut las minoritads linguisticas en l'administraziun federala paran d'esser necessarias ulteriuras stentas, particularmain en vista a la part da las minoritads talianas e rumantschas. L'autonomia e las cumpetenzas da la delegada u dal delegà federal per la plurilinguitad èn vegnidas rinforzadas.

### **Giudicament da las mesiras sin fundament da las ulteriuras recumandaziuns dal terz ciclus da surveglianza**

22. Cun mesiras concretas è la populaziun vegnida sensibilisada per las pussaivladads da cumbatter cunter la discriminaziun. Da menziunar èn spezialmain in mussavia giuridic per victimas da discriminaziun e l'elavuraziun da programs chantunals d'integraziun. Ma las autoritads n'han betg l'intenziun ni da decretar ina lescha cumplessiva cunter la discriminaziun, ni da divergiar da lur proposta secturiala.<sup>8</sup> La proposta secturiala per la protecziun cunter la discriminaziun prevesa en emprima lingia da decretar leschas specificas per mintga singul sectur; leschas ch'en adattadas als fatgs respectivs (p.ex. Lescha federala davart l'egalitat da dunna ed um, Lescha davart l'egalitat da persunas cun impediments). Cun ina tala proposta dovri medemamain stentas pli vastas per render enconuschenas entaifer la populaziun svizra ed accessiblas per tuts las pussaivladads giuridicas en il cumbat cunter la discriminaziun.

23. Igl è vegnì decidì d'augmentar l'agid finanzial per Jenics, Sinti e Manouches. Quest augment è francà per l'ina en la missiva deliberada dal parlament per finanziar la promozion da la cultura federala durant ils onns 2016-2020 (en quai che suonda: Missiva davart la cultura) che cuntegna tut ils programs e tut las politicas da quest sectur, e per l'autra en il sboz dal plan d'acziun federal<sup>9</sup>. Questas mesiras na vegnan anc betg realisadas, uschia che lur consequenzas concretas n'en anc betg enconuschenas. Mecanissem efficazis per tadlar Jenics, Sinti e Manouches sin plaun interchantunal n'en anc betg avant maun (cf. artitgel 15).

---

<sup>6</sup> Federaziun svizra da las communitads israelitas e Fundaziun cunter rassissem ed antisemitism, Analyse Antisemitismusbericht 2017, da consultar sin: <http://www.antisemitismus.ch/content/analyse-antisemitismusbericht-2017>

<sup>7</sup> Cumissiun federala cunter il rassissem (CFR), communicaziun a las medias dals 20 da mars 2018, da consultar sin: <https://www.admin.ch/gov/de/start/dokumentation/medienmitteilungen.msg-id-70147.html>

<sup>8</sup> Rapport statal, alinea 74; cf. er rapport dal Center svizzer da cumpetenza per ils dretgs umans, «Zugang zur Justiz in Diskriminierungsfällen», Bern/Berne, fanadur 2015.

<sup>9</sup> Plan d'acziun versiun december 2016 da consultar sin:

<https://www.bak.admin.ch/bak/de/home/sprachen-und-gesellschaft/jenische-und-sinti-als-nationale-minderheit/aktionsplan.html>

*Per realisar la Missiva davart la cultura èn gia vegnidas prendidas pliras mesiras concretas che s'accordan er cun il plan d'acziun federal «Jenics, Sinti, Roma»: la nova concepziun da la Fundaziun «In futur per ils viagiants svizzers», la promozion da projects da cultura, da sensibilisaziun e d'intermediaziun, la nominaziun d'ina gruppera da lavour cun represchentantas e represchentants federales e chantunals pertutgant il tema plazzas da transit per viagiants e.u.v.*

24. Pliras occurrentzas culturalas dals Jenics, Sinti e Manouches èn vegnidas sustegnidias finanzialmain e politicamain. Per cumbatter cunter la chapientscha mancanta da la moda da viver nomada en la publicitat èn dentant necessarias stentas sistematicas. Resultads èn plirs projects da pilot per la scolarisaziun d'uffants da Jenics, Sinti e Manouches. Cun la Gruppa da lavour «per megliiar las condizioni per la moda da viver nomada e per promover la cultura dals Jenics, Sinti e Roma en Svizra» ha la Confederaziun appellà al dialog e lantschà quel tranter ils chantuns, las vischnancas, las scolas e las famiglias pertutgadas. Ma ils resultats obtegnids èn ambivalents. La refusa da l'iniziativa «No Billag» è stà in ferm signal a favur da las medias ch'emettan lur program en las linguas minoritaras (cf. artitgel 9). L'obligaziun da la societad da dretg public da radio e televisiun d'emetter emissiuns en las linguas minoritaras na vegn betg adina observada. La concessiun sto pia vegnir extendida en quest regard.

*Las suandantas rectificaziuns ston vegnir fatgas: La Societat svizra da radio e televisiun (SRG SSR) ademplescha in mandat public da distribuziun, n'è dentant betg organisada sco gestiunaria publica. Sias incumbensas n'en betg regladas en «contracts da licenza», sco ch'i sugerescha il text franzos, mabain en ina concessiun.*

## **II. Constataziuns tar ils singuls artitgels**

### **Artitel 3 da la Convenziun da basa**

#### **Champ d'applicaziun personal e territorial da la Convenziun da basa**

25. Sco minoritads naziunalas renconuscha la Svizra – tenor la decleraziun interpretanta<sup>10</sup> ch'ella ha deponì en il document da ratificaziun da la Convenziun da basa – tut las persunas che appartegnan a la minoritat linguistica franzosa, taliana e rumantscha, ma er las persunas da lingua tudestga en chantuns u vischnancas, nua ch'ellas furman la minoritat<sup>11</sup>, sco er ils «viagiants» svizzers e las persunas che appartegnan a la cuminanza gidieua en Svizra. En quest connex han las autoritads svizras concludì l'onn 2016, sin basa d'ina dumonda correspundenta da pliras organisaziuns che represchentan questas minoritads, da betg pli duvrar la noziun generala «viagiants». A medem temp han ellas confermà ch'ils «Jenics, Sinti e Manouches» valan sco minoritads naziunalas, independentamain dal fatg, sch'els han in domicil stabel u pratigeschan ina moda da viver nomada<sup>12</sup>. Il Comité consultativ beneventa questa midada da noziun, che resguarda il dretg da la libra identificaziun.

26. Il Comité consultativ beneventa che las autoritads svizras han dumandà ils chantuns e las vischnancas – a chaschun da la consultaziun en connex cun l'elavuraziun dal Rapport statal per il quart ciclus da survegianza – sch'els resguardian quai sco cunvegnent da renconuscher ulteriuras cuminanzas linguisticas, culturalas u religiusas sco minoritads naziunalas. Da las infurmaziuns preschentadas resorta che nagina gruppera n'ademplescha – tenor l'avis dals chantuns – tut ils criteris ch'en menziunads en la decleraziun interpretanta. Il chantun Neuchâtel ha dentant declarè che «las cuminanzas ch'en resortidas da la migraziun» pudessan vegnir en dumonda, sch'ellas han «relaziuns ch'existan dapi ditg cun la Svizra»<sup>13</sup>. Concernent la decleraziun interpretanta sezza renconuscha il Comité consultativ il fatg ch'ils stadis han ina tscherta libertad da decider davart la fixaziun dal champ d'applicaziun personal da la Convenziun da basa; el renda dentant danovamain attent ch'el sto examinar, sche la metoda tschernida per il champ d'applicaziun na chaschuna betg differenziaziuns arbitraras u nunmotivadas tranter differentas cuminanzas areguard l'access a dretgs<sup>14</sup>.

---

<sup>10</sup> Decleraziun interpretanta dals 21 d'october 1998 che la Svizra ha deponì en ses document da ratificaziun da la Convenziun da basa: «Sco minoritads naziunalas en il senn da questa Convenziun da basa valan en Svizra quellas gruppas da persunas ch'en numericamain pli pitschnas ch'il rest da la populaziun da la Svizra u d'in chantun, da las qualas ils commembres possedan la naziunalitat svizra, han dapi ditg relaziuns existentes, solidas e duraivlas cun la Svizra ed èn animads da la voluntad da mantegnair cuminaivlamain quai che fa ora lur identidad, en spezial lur cultura, lur tradiziuns, lur religiun u lur lingua. »

<sup>11</sup> Comité consultativ, emprim Parairi davart la Svizra, deliberà ils 20 da favrer 2003, alineas 20 e 21.

<sup>12</sup> Rapport statal, alineas 59–62.

<sup>13</sup> Quart rapport statal da la Svizra (qua sutvart «il rapport statal»), alinea 64, da consultar sut: <http://rm.coe.int/doc/09000016806f54f8>

<sup>14</sup> Comité consultativ da la Convenziun da basa, commentari tematic nr. 4, «La Convenziun da basa: in instrument essenzial per diriger la diversitat cun agid dals dretgs da las minoritad», alinea 26.

27. L'avrigl 2015 han duas organisaziuns (la fundaziun «Rroma Foundation» e l'uniun «Romano Dialog») inoltrà al Departament federal d'affars exteriurs ina dumonda da renconuscher ils Roma sco minoritad naziunala. Sin quai è veginida furmada ina gruppera da laver interdepartamentalala cun represchentants da l'Uffizi federal da cultura, da l'Uffizi federal da giustia, dal Servetsch per il cumbat cunter il rassissem e dal Departament federal d'affars exteriurs. Il zercladur 2015 è sa scuntrada questa gruppera da laver cun las organisaziuns petentas. Il barat tranter la gruppera da laver e las duas organisaziuns dals Roma è lura veginì cuntinuà en scrit.

*Cun il conclus dal 1. da zercladur 2018 ha il Cussegl federal decidì davart la dumonda da la renconuschientscha dals Roma svizzers sco minoritad naziunala en il senn da la Convenziun da basa. El è arrivà a la conclusiun ch'ils criteris per ina tala renconuschientscha na sajan betg ademplids tenor la decleraziun interpretanta da la Svizra. Tant il criteri da la naziunalitat svizra sco er il criteri da la volontad da mantegnair l'identitat cuminaivla, na sajan betg cumprovads suffizientamain. Ultra da quai na saja betg adempli il criteri da las relaziuns existentes dapi ditg cun la Svizra. Ma il Cussegl federal ha constatà ch'ils Roma sajan ina part integrala da la societad svizra ed ha accentuà quant impurtant ch'i saja d'als proteger cunter rassissem e cunter discriminaziun.*

28. Il schaner 2016 ha il Center svizzer da cumpetenza per ils dretgs umans publitgà in'expertisa giuridica davart quest tema<sup>15</sup>. Tenor quella ston organisaziuns che dumondan ina renconuschientscha ademplir ils criteris da la decleraziun che la Svizra ha deponì cun il document da ratificaziun da la Convenziun da basa. L'expertisa è veginida a la conclusiun ch'ils dus emprims criteris («esser numericamain pli pitschnas ch'il rest da la populaziun da la Svizra u d'in chantun» e «posseder la naziunalitat svizra») sajan nunproblematics, ma per che las organisaziuns hajan «bunas schanzas»<sup>16</sup> da veginir renconuschidas, duajan elllas cumprovar la preschientscha dals Roma sco cuminanza en Svizra dapi almain la fin dal 19. tschientaner sco er il dumber da persunas che appartegnan a la cuminanza dals Roma. Impurtant saja ultra da quai che la dumonda veginia sustegnida «sche pussaivel tras tut»<sup>17</sup> las organisaziuns da Roma ch'existan en Svizra e ch'i veginia cumprovà che la cuminanza vivia er anc oz sias tradiziuns culturalas. Il settember ed il november 2016 han las organisaziuns che avevan inoltrà la dumonda da veginir renconuschidas sco minoritad naziunala, inoltrà ulteriurs documents.

29. Las autoritads federalas svizras han consultà tut ils 26 chantuns davart questa dumonda. Da 15 chantuns che han respundi sa dosta in chantun cunter la renconuschientscha, in auter sustegna cleramain la dumonda. Ils auters 13 chantuns han declerà ch'els hajan ina tenuta positiva envers ina renconuschientscha, sch'ils Roma svizzers adempleschian ils criteris cumulativs per ina renconuschientscha sco minoritad naziunala. Plirs chantuns vesan ina tala renconuschientscha sco avantatg per cumbatter cunter pregiudizis e stigmatisaziuns. Concernent il criteri da las relaziuns ch'existan dapi ditg cun la Svizra<sup>18</sup> ed il criteri da la naziunalitat exista – tenor l'avis dal Comité consultativ – il privel che la protecziun vegin

<sup>15</sup>Expertisa giuridica «Anerkennung der Roma als Minderheit, Kurzgutachten zur Beurteilung einer Anerkennung von Roma als Minderheit in der Schweiz», prof. em. Walter Kälin, lic. iur. Reto Locher, Bern/Berne, 27 da schaner 2016, da consultar sut:

[http://www.skmr.ch/cms/upload/pdf/160317\\_Kurzgutachten\\_Roma\\_Minderheit.pdf](http://www.skmr.ch/cms/upload/pdf/160317_Kurzgutachten_Roma_Minderheit.pdf)

<sup>16</sup>Expertisa giuridica «Anerkennung der Roma als Minderheit, Kurzgutachten zur Beurteilung einer Anerkennung von Roma als Minderheit in der Schweiz», prof. em. Walter Kälin, lic. iur. Reto Locher, Bern/Berne, 27 da schaner 2016, da consultar sut:

[http://www.skmr.ch/cms/upload/pdf/160317\\_Kurzgutachten\\_Roma\\_Minderheit.pdf](http://www.skmr.ch/cms/upload/pdf/160317_Kurzgutachten_Roma_Minderheit.pdf), p. 13.

<sup>17</sup>Expertisa giuridica «Anerkennung der Roma als Minderheit, Kurzgutachten zur Beurteilung einer Anerkennung von Roma als Minderheit in der Schweiz», prof. em. Walter Kälin, lic. iur. Reto Locher, Bern/Berne, 27 da schaner 2016, da consultar sut:

[http://www.skmr.ch/cms/upload/pdf/160317\\_Kurzgutachten\\_Roma\\_Minderheit.pdf](http://www.skmr.ch/cms/upload/pdf/160317_Kurzgutachten_Roma_Minderheit.pdf), p. 13. Versiun tudestga originala: «Unterstützung eines Gesuchs durch möglichst alle in der Schweiz existierenden Organisationen der Roma.»

<sup>18</sup>Cf. tranter auter Cumissiun da Venezia, Rapport davart ils dretgs dals burgais esters e da las minoritads, CDL-AD(2007)001, e Cumpilaziun dals avis e dals rapports da la Cumissiun da Venezia concernent la protecziun da las minoritads naziunalas, CDL(2011)018.

restrenschida sin ils Roma cun naziunalitat svizra, sche la decleraziun interpretanta vegn applitgada en moda severa. Il Comité beneventa da vegl ennà ina metoda inclusiva per il champ d'applicaziun, renda dentant attent che la durada da la dimora en in pajais na dastga, abstrahà da quai, betg esser in criteri per applitgar la Convenziun da basa sco unitad<sup>19</sup>. A gruppas da Roma da naziunalitat estra, che viageschan durant la stad tras la Svizra e che vegnan per regla da la Frantscha, da la Germania u da la Spagna, èsi savens scumandà da duvrar tschertas plazzas da staziunament u da transit ch'en reservadas per burgais svizzers che pratigeschan ina moda da viver nomada (cf. artitgel 4). Gia en il passà ha il Comité adina rendì attent ch'ina restricziun da l'applicaziun da la Convenziun da basa sin ils burgais da l'agen pajais pudess chaschunar discriminaziuns<sup>20</sup> e saja perquai d'evitar. Empè da quai duess vegnir tschernida ina metoda inclusiva, e per mintga artitgel duessi vegnir examinà, sch'i existan motivs legitims da conceder differents dretgs d'access a las personas tut tenor la naziunalitat. Il medem mument beneventa il Comité consultativ che las autoritads applitgeschan en la pratica ina metoda inclusiva envers ils Roma d'autras naziunalitads, cumbain che la Svizra ha introduci il criteri da la naziunalitat en la decleraziun interpretanta ch'è vegnida deponida cun il document da ratificaziun. Questa pratica sa mussa per exemplu a maun dal fatg ch'ils basegns correspondents vegnan resguardads tar la planisaziun da novas plazzas da staziunament e da transit (cf. artitgel 5).

*Schebain che Romas esters che viagian durant ils mais da stad tras la Svizra, na pon betg vegnir renconuschids sco personas che appartegnan ad ina minoritad svizra, pon els tuttina profitar da pliras mesiras federalas e chantunalas. Da quellas fan part il Concept naziunal planisà per eliminar la mancanza da grondas plazzas da transit (cf. Explicaziuns tar la cifra 51 qua sutwart), las plazzas da transit endrizzadas d'intgins chantuns sco Friburg u Berna per lung da las axas principales ubain la purschida – sustegnida finanzialmain da l'Uffizi federal da cultura (UFC), dal Servetsch per il cumbat cunter il rassissem (SCRA) e dal chantun Berna – per la lavur d'intermediaziun cun la populaziun locala. La fin da la stagiun da stad 2018 han las federaziuns ed ils chantuns ch'en participads a quest project d'intermediaziun e che han fatg enconuschienschas correspondentes tratg ina bilantscha fitig positiva: Ils conflicts dals onns precedents han pudi vegnir evitads gist uschia sco ils rapports negativs davart quest tema en la pressa. Il chantun Berna beneventa il project zunt spezialmain, perquai ch'el ha gidà ils onns passads a reducir las tensiuns sin ses territori, particularmain a Wileroltigen. La plaza da transit temporara a Brügg BE è vegnida messa a disposizion a plaina cumentientscha da ses utilisaders, ed ella è vegnida occupada durant l'entira stagiun senza disturbis. Er il chantun Grischun ha grond interess ch'il project progredeschia. La Confederaziun vegn a cuntinuar cun ses sostegn finanzial fin l'onn 2019, en cas da basegn er ulteriuramain.*

*Areguard las differenzas tranter las plazzas da staziunament per viagiants esters respectivamain per viagiants svizzers vegni renvià a las remartgas sut cifra 74.*

*Ils Roma svizzers han, correspondentamain a la brev ch'è vegnida scritta ad els suenter il conclus dal Cussegl federal dal 1. da zercladur 2018 davart ils fatg ch'els n'en betg vegnids renconuschids sco minoritad naziunala, ils medems dretgs sco auters burgais svizzers. Particularmain han els il dretg da tgirar lur atgna cultura e da discurrer lur atgna lingua, sco er il dretg da protecziun cunter tut las furmas da discriminaziun. Plinavant als vegni rendì attent che – en concordanza cun la pratica dal Comité consultativ – tscherts dretgs ch'en previs en la Convenziun da basa pon vegnir applitgads independentamain da la renconuschienschas sco minoritad naziunala.*

<sup>19</sup> Cf. Comité consultativ da la Convenziun da basa, commentari tematic nr. 4 tar il champ d'applicaziun da la Convenziun da basa, matg 2016, alinea 31, nua ch'i vegn accentuà ch'i resorta da l'artitgel 10 alinea 2, da l'artitgel 11 alinea 3 e da l'artitgel 14 alinea 2 da la Convenziun da basa che la durada dal domicil en il pajais dastga vegnir tratga en consideraziun mo per l'applicaziun da las disposiziuns da questi artitgels, betg dentant per l'applicaziun generala da la Convenziun da basa.

<sup>20</sup> Comité consultativ da la Convenziun da basa, commentari tematic nr. 4, «La Convenziun da basa: in instrument essenzial per diriger la diversitat cun agid dals dretgs da las minoritads», alinea 29.

30. Sa referind a ses terz Parairi davart la Svizra<sup>21</sup> constatescha il Comité consultativ ch'ils represchentants da las cuminanzas muslimicas n'han betg formulà il giavisch da vegnir renconuschidas sco minoritad naziunala sin plaun federal. Sin la dumonda dal Comité consultativ davart questa pussaivladad han ils represchentants declerà che lur relaziuns tar las autoritads sajan caracterisadas da pragmatissim e ch'els temian ch'ina dumonda per ina tala renconuschientscha pudess esser cuntraproductiva ed eventualmain anc rinforzar la stigmatisaziun da persunas muslimicas.

#### Recumandaziun

31. Il Comité consultativ encuraschescha las autoritads federalas da perseguitar er vinavant ina metoda inclusiva areguard il champ d'applicaziun da la Convenziun da basa. A medem temp recumonda el d'examinar per mintga singul artitgel il criteri da las relaziuns ch'existan dapi ditg ed il criteri da la naziunalidad, per uschia possiblitar a las persunas che appartegnan a minoritads naziunalias da far valair quests dretgs. El supplitgescha las autoritads d'elavurar las dumondas per ina renconuschientscha sco minoritad naziunala entaifer in temp util.

*Las autoritads svizras chapeschan ed acceptan questa recumandaziun sco incumbensa da mantegnair lur metoda inclusiva sin il champ d'applicaziun da la Cunvegna da basa, particularmain cun examinar sia applicaziun artitgel per artitgel, sche quai è cunvegnet.*

---

<sup>21</sup> Comité consultativ per la Convenziun da basa, terz Parairi davart la Svizra, deliberà ils 5 da mars 2013, alineas 26–28.

## Metoda da retschertga

32. Il Comité consultativ constatescha che l'ultima dumbraziun dal pievel ha ḡ lieu l'onn 2000<sup>22</sup>. Dapi lura è vegnida applitgada la metoda d'ina enquista da structura annuala (u «controlla da sondagi»)<sup>23</sup> cun ina prova da controlla tar 200 000 persunas. Quella consista d'enquistas fatgas per telefon cun persunas da la populaziun permanenta da 15 onns e dapli, suandadas da dumondas d'infurmaziuns en scrit sin palpiri u online. Las persunas interrogadas pon responder per tudestg, per franzos u per talian. Ils represchentants da las minoritads rumantschas han exprimì lur resalvas davart la metoda tschernida, perquai ch'els dubiteschan ch'i vegnian registrads uschia gruppas pli pitschnas da persunas che appartegnan a minoritads naziunalas. Tscherts interlocuturs dal Comité consultativ supponan che questa metoda pudess reducir artifizialmain il dumber da persunas che appartegnan a minoritads naziunalas ordaifer lur territoris d'abitadi tradiziunals, particularmain areguard persunas da lingua taliana e rumantscha. Suenter ina discussiun cun in represchentant da l'Uffizi federal da statistica è il Comité consultativ vegnì a la conclusiun che la metoda applitgada ha effectivamain mancanzas: Pli pitschna che la gruppera è, e pli grond ch'il privel è che la metoda applitgada per la retschertga n'è betg buna d'identifitgar questa gruppera. L'Uffizi federal da statistica tschertga actualmain pussaivladads per meglierar la metoda.

*Las suandardas rectificaziuns ston vegnir fatgas:*

*Dapi l'onn 2010 vegn la dumbraziun dal pievel fatga ed evaluada en in ritmus annual sco enquista che sa basa sin registers cun enquistas cumplementaras da structura e tematicas.*

*L'enquista da structura ch'è integrada en il sistem da dumbraziun dal pievel, è in'enquista da sondagi annuala tar almain 200 000 persunas ch'en 15 onns u pli veglias e che vivan en chasadas privatas. En in'enquista en scrit infurmescha la persuna davart sasezza e davart la chasada, en la quala ella viva. La participaziun a l'enquista è obligatorica. Igl è pussaivel da responder per internet u en scrit cun questiunaris sin palpiri. Duvradas pon vegnir ina da las quatter linguas naziunalas, q.v.d. franzos, tudestg, talian u rumantsch, sco er englais (mo sch'ins respunda per internet). Per ils locuturs da las tschintg linguas estras las pli frequentas (albanais, serb/croat, spagnol, portugais e tirc) datti ultra da quai in agid da translaziun.*

*L'enquista actuala ha numerus avantatgs. Dentant pli pitschna che la gruppera è, e pli grond ch'il privel è che la metoda applitgada na saja betg buna d'identifitgar suffientamain questa gruppera. Quai na vala betg per la minoritat taliana che viva ordaifer ses territori linguistic e ch'è registrada cun in aut grad da detagls. Las cumpontitas dal sistem vegnan examinadas ed adattadas permanentamain da l'Uffizi federal da statistica (UST).*

*En cumparegliazion cun las retschertgas cumpletas che vegnivan fatgas fin l'onn 2000, na stat ina part da las infurmaziuns betg pli a disposizion sin nivel communal u da quartier. Las datas ch'en vegnidas registradas en il rom da l'enquista da structura furneschan resultats annuals per la Svizra, per las regiuns grondas, per ils chantuns e per las vischnancas che han almain 15 000 abitants. La cumulaziun dals resultats sur trais fin tschintg onns permetta però da far in'evaluaziun da pli pitschna dimensiun geografica. Uschia correspunda la cumulaziun da las datas da tschintg onns ad in'emprova da controlla da quasi in million persunas e furnescha infurmaziuns statisticas detagliadas per gruppas da circa 3000 persunas. Per intensifitgar l'expressivitat e la profunditat locala da las datas per lur territori, pon ils chantuns e las citads augmentar lur emprovas da controlla; ina pussaivladad, da la quala plirs d'els profitan.*

<sup>22</sup> Cf. tranter autor «Sprachliche Praktiken in der Schweiz, Erste Ergebnisse der Erhebung zur Sprache, Religion und Kultur 2014», Departament federal da l'intern, Uffizi federal da statistica, Neuchâtel, 2016.  
Remartha: Questa annotaziun renviescha ad ina retschertga tematica senza relazion cun la dumbraziun federala dal pievel 2000.

<sup>23</sup> Cf. Uffizi federal da statistica, «Erhebungsprogramm der eidgenössischen Volkszählung», 2008, da consultar sut: <https://www.bfs.admin.ch/bfs/de/home/grundlagen/volkszaehlung.assetdetail.322647.html>

*Cun la nova metoda pon ins analisar – tut tenor las funtaunas utilisadas (enquistas che sa basan sin registers u enquistas da structura) – pitschnas gruppas da la populaziun sco er minoritads linguisticas u autres. Cumplettadas vegnan las enquistas che sa basan sin registers e las enquistas da structura cun enquistas tematicas, numnadamaain cun la «Enquista davart la lingua, la religiun e la cultura» (ELRC), che permettan medemamain da distinguer tenor categorias da parts da la populaziun entaifer ils cunfins definids en connex cun in'oprova da controllo. Las infurmaziuns obtegnidas cun quest nov sistem d'enquista èn bler pli actualas e tematicamain bler pli ritgas. Il sistem ha chattà l'accoglientscha dal Cussegl federal e dal parlament ed è vegnì valità en in rapport d'evaluazion. Tenor quest rapport ademplescha el dal tuttafatg las finamiras e meglierescha en moda decisiva las infurmaziuns ch'en avant maun (cf. UST, 2017, Das neue Volkszählungssystem – Evaluationsbericht). Rapport dal Cussegl federal. Berna:*

<https://www.bfs.admin.ch/bfs/de/home/aktuell/neue-veroeffentlichungen.assetdetail.3922064.html>.

## Recumandaziun

33. Il Comité consultativ recumonda a las autoritads federalas d'optimar anc vinavant la metoda da retschertga. El cusseglia a las autoritads federalas da cumplettar las statisticas da la populaziun cun datas da posts da perscrutaziun independents e d'analisar quellas conscienciusamain en stretga collavuraziun cun represchentants da las minoritads, cunzunt sche las autoritads dovran las statisticas sco basa per applitgar ils dretgs da minoritads, per ch'ellas survegnian in maletg pli signifitgant dals lieus da domicil da las personas che appartegnan a minoritads naziunalas.

*Las mesiras numnadas en questa recumandaziun èn gia veginadas instradadas. Questa recumandaziun sto pia vegin precisaada sco suonda:*

*Optimaziun da la metoda da retschertga:* *Las componentas dal sistem vegnan meglieradas permanentamain. Previsas n'en dentant betg midadas pli extendidas da la metoda da la retschertga en la procedura d'oprovas da controllo. En la cumparegliazion internaziunala dispona il UST – tras l'enquista da structura e tras l'enquista tematica ELRC – gia da datas detagliadas ed actualas per la registrazion statistica da las linguas.*

*Statisticas dad instituts da perscrutaziun independents:* *Il UST fa ed analysescha sez statisticas e resguarda – en vista a lur derasaziun – ils ultims svilups sin ils champs pertutgads. Il UST tgira contacts cun sia clientella e cun auters producents da statisticas en Svizra ed a l'exterior. Ils partenaris ed autres partidas participadas vegnan integrads a temp util en ils process da decisiun. Ils instituts da perscrutaziun pon integrar lur atgnas datas en il sistem per cumplettar lur projects da perscrutaziun. Il sistem permetta e promova questa furma da collavuraziun.*

*Collavuraziun cun represchentants da las minoritads:* *Il UST stat a disposiziun als utilisaders per analisas e per dumondas. En cas da statisticas incumpletas u en cas da largias en l'areal da registrazion vegnan fatgas meglieraziuns en il rom da programs da perscrutaziun.*

*Ultra da quai controllo il Servetsch per il cumbat cunter il rassissemm (SCRA) – ensemen cun il UST – il mument la pratica actuala per registrar datas sco er las pussaivladads ed ils cunfins per la cumplettar cun datas che pertutgan l'appartegnientscha a las gruppas da la populaziun pli specificas. In rapport correspudent duai cumparair durant l'onn 2019.*

## Artitgel 4 da la Convenziun da basa

### Legislaziun cunter la discriminaziun ed applicaziun da disposiziuns correspudentas

34. Il rom giuridic per cumbatter sin plau federal cunter discriminaziuns n'è betg sa midà dapi il terz ciclus da surveganza. En l'artitgel 8 alinea 2 prevesa la Constituziun federala svizra il suandard: «Nagin na dastga vegnir discriminà, particularmain betg pervia da l'origin, da la razza, da la schlattaina, da la vegliadetgna, da la lingua, da la posiziun sociala, da la persvasiun religiosa, filosofica u politica u pervia d'in impediment corporal, spierital u psichic». Questa disposiziun po vegnir fatga valair davant mintga dretgira. Ultra da quai cuntegnan l'artitgel 261bis dal Cudesch penal ed autres leschas federalas (tranter auter la Lescha federala davart l'egalitat da dunna ed um e la Lescha federala davart l'eliminaziun dals dischavantatgs envers personas cun impediments) disposiziuns cunter discriminaziuns. Chastiada vegn pia mo la discriminaziun pervia da la razza, da l'etnia e da la religiun.

*Svilups positivs datti en ils chantuns en connex cun il cumbat cunter discriminaziuns; chantuns che sa stentan d'elavurar ulteriuras mesiras sur lur programs chantunals d'integrazion (PCI). Uschia duain registrar las mesiras da preventziun cunter la discriminaziun ed il rassisseem previsas en il PCI II dal chantun Genevra (2018–2021) ussa er gruppas da la populaziun spezialas sco ils commembers da las cuminanzas gidieus, ils Jenics, ils Sinti e Manouches ed ils Roma. Da menziunar è er il chantun Neuchâtel che ha orientà l'onn 2018 davart in urari per l'introducziun d'in tractament egual e che ha acceptà in'administraziun averta per la diversitat, cun l'intent da garantir ch'i vegnian resguardadas personas cun ina biografia da migraziun e personas che appartegnan a minoritads, e quai betg mo sco utilisaders da servetschs da l'administraziun chantunala ed en connex cun lur engaschament, mabain er en connex cun la represchentanza en las cumissiuns chantunalas ed en il discurs public da las autoritads.*

35. Il Comité consultativ ha prendì enconuschientscha d'in studi dal Center svizzer da cumpetenza per ils dretgs umans davart l'access a las dretgiras en cas da discriminaziuns<sup>24</sup>. Bain mussa quest studi d'ina vart ils avantatgs da la «metoda secturiala» applitgada da las autoritads svizras. Il studi renda dentant er attent al fatg che las victimas da discriminaziuns scuntran sin differents obstachels, sch'ellas vulan far valair lur dretgs ed en spezial acceder a las dretgiras. Sco exemplu numna il studi tranter auter il fatg che las organisaziuns nunguvernementalas n'han naginas pussaivladads da purtar plant. Il Comité consultativ prenda enconuschientscha dal fatg ch'in tal mecanissem exista gia en la legislaziun svizra, per exemplu en il dretg d'ambient. Sco ulteriurs impediments per l'access a la giustia numna il studi la mancanza da mecanissem per facilitar a victimas la chargia da cumprova e plinavant la media dals custs da procedura. Il Comité consultativ constatescha ch'ina «metoda secturiala» possia bain cuvrir ils basegns dals singuls secturs; qua tras possian dentant resultar numerusas disposiziuns materialas<sup>25</sup> che sa basian sin differents concepts, uschia ch'ins ristgia che las disposiziuns vegnian interpretadas differentamain tut tenor la procedura, pervia da giurisdicziuns divergentas. Per exemplu stuess ina victima d'ina discriminaziun multipla eventualmain inoltrar plirs plants che sa basan sin disposiziuns materialas specificas e ch'en reglads tras differents princips da procedura. Il Comité consultativ è perquai da l'avis ch'i dovria – cun ina «metoda secturiala» – sforzs pli gronds per sensibilisar la publicitat per las disposiziuns respectivas cunter discriminaziuns en mintga singul sectur. El beneventa en quest connex las stentas canticuantas dal Servetsch per il cumbat cunter il rassisseem (SCRA) da sensibilisar la publicitat per la legislaziun federala e chantunal vertenta cunter la

<sup>24</sup> Center svizzer da cumpetenza per ils dretgs umans, «Der Zugang zur Justiz in Diskriminierungsfällen» Bern/Berne, fanadur 2015. Il studi na sa referescha dentant betg specificamain a personas che appartegnan a minoritads naziunalas.

<sup>25</sup> Tar las disposiziuns che vegnan numnadas en il rapport dal Servetsch per il cumbat cunter il rassisseem da l'onn 2016 tutgan per exemplu l'art. 49 al. 3 da la nova Lescha davart il provediment cun ospitals dal chantun Bern/Berne, l'art. 18 da l'Ordinaziun tar la Lescha davart l'agid social dal chantun Turtigt, l'art. 10 da la Lescha da furmaziun dal chantun Sursilvania, l'art. 25 al. 1 lit. b da la Lescha davart il dretg da burgais dal chantun Basilea-Citad, l'art. 15 al. 2 dal Reglament dal personal da l'Ospital universitar da Turitg, l'art. 5 da l'Ordinaziun dal personal da l'Universidad da Basilea u l'art. 25 da l'Ordinaziun davart il center da mesiras per personas giuvnas creschidas dal chantun Basilea-Champagna.

*Rectificaziun:* Qua n'è betg manegià l'artitgel 25 alinea 1 litera b da la Lescha davart il dretg da burgais dal chantun Basilea-Citad, mabain da la Lescha dal dretg da burgais dal chantun Son Gagl (Lescha davart il dretg da burgais songagliais [LDB]).

discriminaziun, en spezial tras la publicaziun e tras l'actualisaziun dal Mussavia giuridic cunter la discriminaziun rassistica (er sche quel na sa referescha betg a persunas che appartegnan a minoritads naziunalas sco talas) sco er tras furmaziuns supplementaras per acturs chantunals e communals, per posts da mediaziun, per biros d'integrazion, per sindicats e per organisaziuns da la societad civila.

*Il SCRA ha l'intenziun da sustegnair finanzialmain projects che servan a sensibilisar per la legislaziun cunter la discriminaziun e d'organisar occurrenzas davart quest tema. Ses mussavia giuridic «Discriminaziun rassistica» vegn actualisà permanentamain e stat cumplementarmain a disposiziun – ultra da la versiun stampada publitgada – er en ina versiun online. Il mussavia giuridic duai servir er en l'avegnir sco object per furmaziuns supplementaras.*

36. Areguard il dumber da discriminaziuns constatescha il Comité consultativ ina discrepanza tranter las statisticas uffizialas da las dretgiras e las datas da las organisaziuns nunguvernamentalas. Questa discrepanza lascha supponer che victimas potenzialas da discriminaziun n'en betg infurmadas suffizientamain davart ils meds legals che las stessan a disposiziun. Il Comité consultativ è conscient dal fatg che cumparegliaziuns directas da las statisticas n'en betg pussaivlas, saja quai pervia dals termins da dretgira ed eventualmain pervia da definiziuns differentas. El renda dentant attent che per exempl il dumber da cas da discriminaziun manifests e registrads pervia da l'appartegnientscha religiusa, tractads da las dretgiras svizras l'onn 2016, è cleramain pli bass ch'il dumber da discriminaziuns ch'en vegnidas inditgadas per l'onn correspondent en enquistas publicas u en las datas d'organisaziuns nunguvernamentalas ch'en activas en quest sectur<sup>26</sup>. Entant che la Collecziun uffiziala [da la Cumissiun federala cunter il rassissem CFR] enumerescha totalmain 22 cas respectivs per tut las persvasiuns religiusas<sup>27</sup>, han las organisaziuns gidieuas registrà 153 cas<sup>28</sup> mo gia per la part francofona dal pajais ed unicamain cunter persunas gidieuas.

37. Envers persunas cun ina moda da viver nomada n'en vegnids registrads l'onn 2016 nagins cas «manifests e registrads» da discriminaziun, cumbain che tut ils interlocuturs dal Comité consultativ ch'en activs en quest sectur han rapportà davart problems da discriminaziun envers questa minoritad. En spezial tut las represchentantas e tut ils represchentants da las organisaziuns da Jenics, Sinti e Manouches èn stads inquietads pervia d'in profiling supponì da persunas cun ina moda da viver nomada sco er pervia da controllas repetidas da l'identitat. A chaschun d'in barat cun il Comité consultativ ha in represchentant dal Departament federal da l'intern percuter declerà ch'ina tala politica da profiling n'existia betg.

38. Il Comité consultativ recorda ch'il Center svizzer da cumpetenza per ils dretgs umans (CSDU) è vegni installà l'onn 2011 – en il rom d'in project da pilot da la Confederaziun – de facto sco instituziun naziunala dals dretgs umans e che la Confederaziun po sa drizzar a quest center per cussegls davart dumondas relevantas che tutgan en ses sectur da cumpetenza. Il center è vegni indemnisià per singuls mandats mintgamai sin basa da contracts da prestaziun correspundents cun la Confederaziun. Prestaziuns sumegliantas pudess el furnir sin basa contractuala er per chantuns, per organisaziuns nunguvernamentalas u per acturs privats. En il senn d'in ulteriur svilup dal project da pilot lantschà l'onn 2011 ha il Cussegl federal decidì il zercladur 2016 da crear ina instituziun naziunala dals dretgs umans, la INDU<sup>29</sup>. Il zercladur 2017 è vegnida averta la consultaziun tar il sboz d'ina «Lescha davart il sustegn d'ina instituziun naziunala dals dretgs umans». Questa lescha prevesa ina finanziaziun

<sup>26</sup> Cf. Uffizi federal da statistica, Retschertga davart la convivenza en Svizra, 2016; CICAD, Antisémitisme en Suisse romande, rapport 2017; e Nermina Ademović-Omerčić: «Islamophobia in Switzerland: National Report 2017», en: Enes Bayraklı & Farid Hafez, *European Islamophobia Report 2017*, Istanbul, SETA, 2018.

<sup>27</sup> Servetsch per il cumbat cunter il rassissem (SCRA), rapport che cumpara mintga 2 onns, 2016, chapitel 5.3.1.

<sup>28</sup> Servetsch per il cumbat cunter il rassissem (SCRA), rapport che cumpara mintga 2 onns, 2016, chapitel 5.3.1., cf. er CICAD, «Antisémitisme en Suisse romande», rapport 2017, p. 16.

<sup>29</sup> Rapport statal, alineas 79-80.

fundamental da 1 million francs per onn<sup>30</sup> ed extenda la cumpetenza da la INDU sin tut las dumondas che pertutgan ils dretgs umans. Il Comité consultativ constatescha dal rest che mosis da 26 chantuns<sup>31</sup> sco er sis vischnancas<sup>32</sup> han créa posts da mediaziun e ch'in tal post n'exista betg sin plaun federal. Il Comité consultativ sustegna l'opiniun exprimida en il rapport explicativ tar il sboz preliminar da la lescha federala<sup>33</sup>, numnadaman ch'ina instituziun naziunala dals dretgs umans po esser il garant per in'avischinaziun pli armonisada en tut la Svizra, sch'ella vegn concepida en concordanza cun ils Princips da Paris<sup>34</sup>, en spezial sch'ella è instituziunalmain e finanzialmain independenta, sch'ella po promover e proteger ils dretgs umans en atgna responsabladad e sch'ella dispona d'in mandat correspondent. Er la mancanza da posts da mediaziun sin plaun federal e chantunal restrenscha l'access al sistem giudizial per persunas che appartegnan a minoritads naziunalas, sch'ellas èn daventadas victimas da discriminaziuns.

*L'administraziun federala sa stenta actualmain da crear la basa per endrizzar ina instituziun naziunala dals dretgs umans. Las lavurs èn vegnidas prendidas per mauns.*

*Plinavant è il dumber dals chantuns che han créa posts cumparegliabels a posts da mediaziun, pli aut ch'explitgà qua survart. Uschia datti en il chantun Genevra in servetsch da mediaziun administrativ ed en il chantun Argovia il «Post da consultaziun per l'integrazion / Anlaufstelle Integration» (AIA), ina instituziun independenta da l'administraziun chantunala che funghescha sco post da mediaziun. Intgins chantuns pli pitschens, sco per exemplil il chantun Uri, argumenteschan percuter che l'instituziun d'in post da mediaziun spezial saja ina sfida per els en vista al probabel dumber da cas. Questa incumbensa possia però vegnir ademplida d'auters posts chantunals.*

## Recumandaziuns

39. Il Comité consultativ recumonda a las autoritads federalas d'intensivar lur stentas e da sensibilisar la publicitat per las disposiziuns legalas respectivas cunter discriminaziuns. Plinavant repeta el sias recumandaziuns a las autoritads federalas d'examinar anc ina giada la pussaivladad d'ina lescha cumplessiva cunter la discriminaziun. El envida las autoritads da facilitar l'access a la giustia per persunas che appartegnan a minoritads naziunalas e ch'en daventadas victimas da praticas discriminantas, cunzunt tras quai che las organisaziuns nunguvernementalas vegnan autorisadas d'agir en l'interess general e da represchentar ils dretgs ed ils interess da questas victimas.

*Ina resalva è giustifitgada areguard la recumandaziun «d'examinar anc ina giada la pussaivladad d'ina lescha cumplessiva cunter la discriminaziun». Sco gia explitgà en il Quart Rapport da la Svizra davart la realisaziun da la Convenziun da basa (cifra 74) e sco ch'igl è vegni confermà en la terza Examinaziun periodica universala (Universal Periodic Review, UPR) da la Svizra durant la perioda dal november 2007 fin il favrer 2018, correspunda la mancanza d'ina lescha cumplessiva cunter la discriminaziun a la tradiziun monistica da la Svizra ed a ses sistem federativ. Tenor l'avis dal Cussegl federal e dal parlament porschan ils instruments giuridics existents ina proteczion efficazia cunter discriminaziun. Ma il Cussegl federal renconuscha ch'ins sto meglierar l'enconuschientscha da questi medis legals e ch'ins sto facilitar ulteriuramain l'access a la giustia.*

<sup>30</sup> Il curs da stgomi tranter l'euro ed il franc svizzer era ils 2 da matg 2018 – tenor las indicaziuns da la Banca naziunala svizra – 1,1944.

<sup>31</sup> Basilea-Champagna, Basilea-Citad, Friburg, Turitg, Vad, Zug.

<sup>32</sup> Berna, Lucerna, Rapperswil-Jona, Son Gagl, Turitg, Winterthur.

<sup>33</sup> Rapport explicativ tar il sboz preliminar d'ina Lescha federala davart il sustegn d'ina instituziun naziunala dals dretgs umans dals 28 da zercladur 2017.

<sup>34</sup> Princips concernent la posiziun ed il funcziunament da las instituziuns naziunalas (Princips da Paris), deliberads en l'agiunta da la resoluziun 48/134 da l'Assamblea generala dals 20 da december 1993, da consultar sut: <http://www.un.org/depts/german/gv-early/ar48134.pdf>

*A regard la legitimazion da far recurs d'organisaziuns nungouvernementalas en cas da discriminaziun cunter las razzas vegni renvià a las rectificaziuns correspondentes sut cifra 67.*

40. Il Comité consultativ recumonda a las autoritads federalas da crear uschè svelt sco pussaivel ina instituziun naziunala dals dretgs umans tenor ils Princips da Paris e da procurar en spezial ch'ella saja instituzionalmain e finanzialmain independenta, possia promover e proteger ils dretgs umans en atgna responsabladad e disponia d'in mandat correspondent. A las autoritads federalas e chantunalas che n'han betg anc installà posts da mediaziun («ombudsperson institutions») sin lur plaun, appellescha il Comité consultativ ultra da quai da stgaffir tals posts.

*Pertutgant l'endrizzar ina instituziun naziunala dals dretgs umans vegni renvià a las actualisaziuns ed a las rectificaziuns tar cifra 38 qua survart.*

*Pertutgant l'endrizzar posts da mediaziun vegni renvià a las rectificaziuns tar cifra 38 qua survart.*

## **Artitgel 5 da la Convenziun da basa**

### **Sustegn dal mantegniment e dal svilup da l'identitat da las minoritads naziunals**

41. L'orientaziun strategica dal Cussegl federal en il sectur da la cultura s'orientescha tenor la Lescha federala davart la promoziun da la cultura. Precisada vegn questa orientaziun en la missiva davart la promoziun da la cultura durant ils onns 2016–2020 (en quai che suonda: «Missiva davart la cultura»). Questa missiva, ch'è vegnida deliberada dal parlament, dat ina survista da tut ils programs e tut las politicas da quest sectur. Sin basa da l'artitgel 17 da la Lescha federala davart la promoziun da la cultura<sup>35</sup> vul la Confederaziun metter a disposiziun – da l'onn 2016 fin l'onn 2020 – 3,8 milliuns francs per organisaziuns che represchentan las cuminanzas dals Jenics, Sinti e Manouches<sup>36</sup>. Quests medis finanzials èn previs principalmain per stgaffir plazzas e per sustegnair projects culturals. Pli detagliadament vegnan quels descrits en il plan d'acziun da la Confederaziun, che vegn actualmain elavurà da la gruppera da lavur «per meglierar las cundiziuns per la moda da viver nomada e per promover la cultura dals Jenics, Sinti e Roma». Il Comité consultativ ha constatà cun satisfaciun che la gruppera da lavur planisescha novas plazzas resguardond er ils interess dals Roma betg svizzers che mainan ina moda da viver nomada.

42. La missiva accentuescha er ch'i saja impurtant da rinforzar la fundaziun «In futur per ils viagiants svizzers» (en quai che suonda: «la Fundaziun»)<sup>37</sup> per render pli enconuschenta la moda da viver nomada a las autoritads ed a la publicitat e per promover l'intermediaziun da la lingua e cultura dals Jenics (cf. artitgel 12). Ultra da la contribuziun federala annuala da 150 000 francs per cuvrir ils custs da gestiun survegn la Fundaziun dapi l'onn 2016 supplementarmain 50 000 francs da l'Uffizi federal da cultura per sustegnair projects da cultura. La Fundaziun occupa dentant anc adina mo ina persuna cun in pensum parzial (l'emprim 40 %, dapi il 1. d'avrigl 2018 80 %). A regard il sustegn da projects n'indigescha u

<sup>35</sup> L'artitgel 17 da la lescha prevesa il suandard: «La Confederaziun po prender mesiras per possibilitar als viagiants ina moda da viver che correspunda a lur cultura. »

<sup>36</sup> Missiva davart la cultura 2016–2020, chapitel 2.2.7.

<sup>37</sup> La fundaziun «In futur per ils viagiants svizzers» è vegnida stgaffida l'onn 1997 tras la Lescha federala davart la fundaziun «In futur per ils vagants svizzers» (CS 449.1). Il cussegl da fundaziun sa cumpona da dudesch commembers. Mintgamai dus commembers represchentan la Confederaziun, ils chantuns e las vischnancas. Sis commembers represchentan ils viagiants (cf. artitgel 15). La Fundaziun serva sco forum da barat, nua che represchentants da tut ils acturs participads elavuran cumainvlamain soluziuns per problems actuals, per exemplu la mancanza da plazzas da staziunament e da transit, permissiuns per il commerzi ambulant, la scolaziun u il passagi da personas betg svizras cun ina moda da viver nomada.

n'explitgescha la pagina d'internet da la Fundaziun betg che talas finanziaziuns sajan disponiblas e co che organisaziuns u personas pon dumandar talas. Il Comité consultativ ha survegnì reclamaziuns davart la moda e maniera, co ch'il cussegl da fundaziun reparta ils meds. Plirs interlocuturs dal Comité consultativ han declarà ch'els giavischian dapli transparenza en quest regard.

*Las suandardas explicaziuns ston vegin precidas:*

- *En la Missiva davart la cultura na sa tracti betg da «promover» l'intermediaziun da lingua e la cultura dals Jenics, mabain da sustegnair iniziativas che vegin prenidas en quest regard.*
- *Il fond da cultura da la Fundaziun «In futur per ils viagiants svizzers» en la summa da 50 000 francs è vegin fundà a la fin da l'onn 2016 ed ha pudì vegin duvrà pir a partir da l'onn 2017 per promover projects. Projects da cultura èn veginids sustegnidis gia ordavant da la fundaziun.*
- *Il temp da laver dal mainagestiun da la fundaziun è vegin augmentà il matg 2018.*

*Ultra da quai ston las remartgas davart la concessiun dals meds finanzials tras la fundaziun vegin relativadas resguardond ils suandardas aspects:*

*Ils criteris per distribuir ils daners èn veginids fixads en enclegentscha cun l'Uffizi federal da cultura (UFC). Els vegin communitgads als petents. En il rom da la nova concepziun da la pagina d'internet da la fundaziun ch'è previsa fin la fin da l'onn 2018, duain las infurmaziuns davart la dumonda ed ils criteris vertents vegin publitgadas online. La fundaziun ha ina tscherta libertad da decider cun controllar, sche questi criteris èn veginids ademplids. Questa controlla fa ella en moda objectiva e nunpartischanta. Ils meds finanzials disponibels en la summa da 50 000 francs vegin surdads per novas dumondas da promoziun tenor ina tscherta rangaziun. Mintga decisiun respectiva vegin motivada dad ella. Apparentamain èn decisiuns positivas da conceder daners veginidas tematisadas pli pauc che decisiuns negativas. Dapi l'onn 2017 e dapi l'instituziun dal fond da cultura publitgescha la fundaziun ina glista dals projects ch'ella ha finanzià en ses rapport da gestiun. Actualmain examinescha ella la pussaivladad da publitgar questa glista sin sia nova pagina d'internet.*

43. Il mument che quest Parairi è veginì deliberà, n'era l'elavuraziun dal plan d'acziun da la Confederaziun tras la gruppa da laver «per meglierar las condizioni per la moda da viver nomada e per promover la cultura dals Jenics, Sinti e Roma» betg anc terminada (areguard la cumposiziun da la gruppa da laver cf. artitgel 15). Il Comité consultativ constatescha cun satisfaciun che las discussiuns da questa gruppa da laver prevesan en spezial la pussaivladad d'integrar la moda da viver nomada dals Jenics, Sinti e Manouches en la «Glista da las tradiziuns vivas da la Svizra»<sup>38</sup> e che questa proposta è veginida resguardada en la nova ediziun da la glista che l'Uffizi federal da cultura ha edì l'october 2017. Uschia èn questas culturas renconuschidas ussa sco parts integralas dal patrimoni cultural da la Svizra. Il Comité consultativ prenda er enconuschiantscha dal fatg che la Lescha federala davart las mesiras repressivas preventivas ed ils plazzamenti extrafamigliars avant 1981 (LMRPE) è entrada en vigur il 1. d'avrigl 2017. Sias disposiziuns pon vegin applitgadas per ils Jenics ch'en daventads victimas da violaziuns dals dretgs umans tranter auter tras la fundaziun *Pro Juventute*<sup>39</sup>. Questa lescha correspunda a l'opiniun ch'il Comité consultativ ha exprimì en ses

<sup>38</sup> La glista da las tradiziuns vivas da la Svizra è veginida stabilida, suenter che la Svizra ha ratifitgà l'onn 2008 la Convenziun da la UNESCO per il mantegniment dal patrimoni cultural immaterial.

<sup>39</sup> Dal 1926 fin il 1973 ha la *Pro Juventute*, ina fundaziun svizra per uffants, persequità ina politica semiuffiziala che aveva la finamira da plazzar geniturs jenics en instituziuns e da laschar adoptar lur uffants tras famiglias svizras «normalas». Var 600 uffants èn veginids separads da lur geniturs. Cf. tranter auter la pagina d'internet da la fundaziun «In futur per ils viagiants svizzers»: <http://www.fondation-gensduvoyage.ch/autrefois-nosjours/de/geschichte-der-fahrenden/aktion-kinder-der-landstrasse>

emprim Parairi davart la Svizra: Quella giada aveva el cussieglià da betg emblidar quest scandal, sch'i vegnan concludidas novas mesiras che pudessan pertutgar persunas che appartegnan a las minoritads dals Jenics, Sinti e Manouches<sup>40</sup>, independentamain dal fatg sch'els han in domicil stabel u pratitgeschan ina moda da viver nomada.

*Il dossier «Cultura nomada dals Jenics e Sinti svizzers» da la «Glista da las tradiziuns vivas en Svizra» stat ussa a disposizion en l'internet per franzos, per tudestg e per talian. Cumplementarmain è avant maun ina versiun curta translatada en rumantsch ed en englais:*

<http://www.lebendigetraditionen.ch/traditionen/00324/index.html?lang=de>

44. Il mantegniment ed il svilup da las identitads e da las culturas da persunas cun ina moda da viver nomada premetta er ch'i vegnia guardà, co ch'ils Jenics, Sinti e Manouches cun ina moda da viver nomada pon finanziar ils custs da viver per lur famiglias. Blers dad els han in'activitatda gudogn independenta e lavuran en il commerzi u en il mastergn. Tenor il text actual da la Lescha federala davart il commerzi ambulant<sup>41</sup> dovràn els ina permissiun per dastgar pratitgar in commerzi ambulant. Per quest intent ston els inoltrar ina dumonda almain 20 dis avant che cumenzar cun l'activitat<sup>42</sup>. Sch'els pratitgeschan lur activitat senza questa permissiun, pon els vegnir chastiads cun ina multa da fin 20 000 francs<sup>43</sup>. La permissiun po vegnir retratga, sche las condizioni legalas per survegnir la permissiun n'en betg pli ademplidas u sche las prescripcions legalas per pratitgar l'activitat commerziala na vegnan betg pli observadas<sup>44</sup>.

45. Sin basa da la Lescha federala davart las linguas naziunalas conceda la Confederaziun in budget annual da 13 milliuns francs per champs tematici sco «promozion da la chapientscha e dal barat tranter las cuminanzas linguisticas», «sustegn dals chantuns plurilingui» e «mantegniment e promozion da la lingua e cultura rumantscha e taliana». La Missiva davart la cultura 2016–2020<sup>45</sup> prevesa da promover en emprima lingua il barat da las scolas (tras la finanziaziun directa da projects) ed il sustegn da la lingua e cultura taliana ordaifer las regiuns italofonas da la Svizra, cun la finamira da meglierar las condizioni da l'instruziun da talian, da sviluppar purschidas da furmaziun bilinguas e da rinforzar la preschientscha dal talian tras il sustegn d'occurrenzas culturalas.

*La Missiva davart la cultura n'ha betg l'intenziun da sviluppar «purschidas da furmaziun bilinguas», mabain maturitads bilinguas cun talian.*

*Pertugant il barat linguistic en il sectur da scola stoi vegnir remartgà che las instituziuns federalas e chantunales ch'en cumpetentas per sia promozion, han decidì da far frunt a las sfidas actualas cun ina strategia cuminaivla. La «Strategia svizra per barat e mobilitad» è vegnida sviluppada da la Confederaziun e dals chantuns ed è vegnida deliberada silsuenter – l'atun 2017 – dal chef dal Departament federal da l'intern (DFI) e dal chef dal Departament federal d'economia, furmaziun e retschertga (DEFR) sco er dal directur da la CDEP. Cun questa strategia han la Confederaziun ed ils chantuns per l'emprima giada ina visiun cuminaivla. La finamira è quella da rinforzar il barat e la mobilitad qualitativamain e quantitativamain e d'augmentar il dumber da participants.*

## Recumandaziuns

46. Il Comité consultativ appellescha a las autoritads federalas da metter a disposiziun il sustegn finanzial necessari e d'attribuir tal – en il rom da proceduras accessiblas, imparzialas e

<sup>40</sup> Comité consultativ per la Convenziun da basa, emprim Parairi davart la Svizra, deliberà ils 20 da favrer 2003, alinea 33.

<sup>41</sup> Lescha federala davart il commerzi ambulant, artitgel 2. Da consultar sut: <https://www.admin.ch/opc/de/classified-compilation/20000837/index.html>

<sup>42</sup> Ordinaziun davart il commerzi ambulant, artitgel 6 alinea 2.

<sup>43</sup> Lescha federala davart il commerzi ambulant, artitgel 14 alinea 1.

<sup>44</sup> Lescha federala davart il commerzi ambulant, artitgel 10.

<sup>45</sup> Missiva davart la cultura 2016–2020, chapitel 2.2.6.

transparentas – a projects che han la finamira da mantegnair e da promover l'identitad e la cultura da persunas cun ina moda da viver nomada, e da conceder tranter auter a la fundaziun «In futur per ils viagiants svizzers» medis finanzials e personals sufficients, per ch'ella possia ademplir sias incumbensas e cuntanscher las cuminanzas pertutgadas.

47. Il Comité consultativ recumonda a las autoritads federalas d'integrar la promozion da la lingua e cultura jenica en il sboz dal plan d'acziun da la Confederaziun e da perseguitar attentamain la realisaziun correspundenta.

### **Plazzas publicas da staziunament, da passagi e da transit**

48. Il Comité consultativ recorda che la moda da viver nomada u mez nomada dals Jenics, Sinti e Manouches è ina caracteristica essenziala da lur identitad<sup>46</sup>. Las autoritads svizras differenzieschan tranter «plazzas da staziunament», q.v.d. plazzas occupadas l'enviern, e «plazzas da passagi», q.v.d. plazzas che vegnan duvradas principalmain la stad mo per dimoras curtas, sco er «plazzas da transit», q.v.d. surfatschas pli grondas ch'en situadas en la vischinanza da las axas principales da traffic e che vegnan duvradas en emprima lingia da persunas betg svizras cun ina moda da viver nomada. Tenor las datas actualas<sup>47</sup> è il dumber da plazzas da staziunament restà stabil tranter il 2013 ed il 2016 (14 l'onn 2013, 15 l'onn 2016). Percunter è il dumber da plazzas da passagi sa reducì cuntuadamat (42 l'onn 2013, 32 l'onn 2016, e da quellas pudevan 15 vegnir duvradas mo durant ina part da l'onn).

49. Malgrà las stentas da la Confederaziun ed en spezial ses sustegn per la Fundaziun (cf. artitgel 5) e malgrà numerusas iniziativas da chantuns che han adattà lur plans directivs en vista a la creaziun da novas plazzas (Giura), che han nominà gruppas da lavour per chattar soluziuns (Soloturn, Neuchâtel, Turgovia, Ticino) u che han endrizzà novas plazzas (Basilea-Citad, Bern/Berne, Argovia, Freiburg/Fribourg), sto il Comité consultativ displascha ivlamain constatar ch'i n'en er vinavant betg avant maun avunda plazzas e che la situaziun generala è daventada mendra dapi il terz ciclus da surveglianza, cunzunt tar las plazzas da transit. La mancanza da plazzas adattadas è in quità permanent ed impurtant da las persunas che appartegnan a questas minoritads. Ella restrenscha lur capacitat da finanziar ils custs da viver per lur famiglias u da possibilitar a lur uffants l'access al sistem da scola (cf. artitgel 12).

*La mancanza da plazzas da staziunament per viagiants n'ha betg consequenzas directas per l'access da lur uffants al sistem da scola.*

50. L'avrigl 2014 han persunas che appartegnan a la minoritad jenica demonstrà a Bern/Berne ed a Biel/Bienne cunter la mancanza da plazzas. A Bern/Berne han els occupà l'Allmend. Suenter 2 emnas è il champ vegnì schlià tras la polizia chantunala da Bern/Berne, perquai che l'areal era reservà per ils visitaders da la fiera da primavaira ch'è vegnida averta intgins dis pli tard. Il Comité consultativ è vegnì infurmà che pliras organisaziuns e famiglias han reclamà pervia da l'intervenziun da la polizia ed han descrit quella sco inadequata e violenta<sup>48</sup>.

<sup>46</sup> Comité consultativ, segund Parairi davart la Svizra, deliberà ils 29 da favrer 2008, alinea 64.

<sup>47</sup> Cf. tranter auter Rapport statal, alinea 29, sco er rapport annual 2016 da la Fundaziun «In futur per ils viagiants svizzers», da consultar sut: [http://www.fondation-gensduvoyage.ch/autrefois-nosjours/sites/stiftung-fahrende.ch.geschichte-gegenwart/files/doc/jahresbericht\\_2016\\_dreisprachig.pdf](http://www.fondation-gensduvoyage.ch/autrefois-nosjours/sites/stiftung-fahrende.ch.geschichte-gegenwart/files/doc/jahresbericht_2016_dreisprachig.pdf)

<sup>48</sup> RTS Info, *Colère des Yéniches*: «Vous n'avez plus de nom, vous avez un numéro», 25 d'avrigl 2014, da consultar sut: <https://www.rts.ch/info/regions/berne/5800519-colere-des-yeniches-vous-n-avez-plus-de-nom-vous-avez-un-numero-.html>; Der Bund, «Die stärkste Form von Repression seit der Verfolgung durch Pro Juventute», 26 d'avrigl 2014, da consultar sut: <https://www.derbund.ch/bern/kanton/Die-staerkste-Form-von-Repression-seit-der-Verfolgung-durch-Pro-Juventute/story/29461055>; Blick, *Fahrende klagen Berner Polizei an* «Sie waren wie die Gestapo», 25 d'avrigl 2014, da consultar sut: <https://www.blick.ch/news/schweiz/bern/fahrende-klagen-berner-polizei-an-sie-waren-wie-die-gestapo-id2816137.html>

51. Er resguardond il fatg ch'igl è en emprima lingia chaussa dals chantuns da metter a disposiziun plazzas<sup>49</sup>, è il Comité consultativ da l'avis che la Confederaziun pudess surpigliar ina rolla decisiva, tras quai ch'ella terminescha questa bloccada e procura ch'ils chantuns e las vischnancas observian effectivamain las obligaziuns internaziunalas da la Svizra en il sectur dals dretgs umans. Cumbain che la finamira da 40 plazzas da staziunament e dad 80 plazzas da transit para dad esser in consens cuminaivel da las differentas partidas participadas<sup>50</sup> e cumbain che la versiun la pli actuala dal sboz dal plan d'acziun federal prevesa da crear questas plazzas entaifer ils proxims 5 onns<sup>51</sup>, constatescha il Comité consultativ che las mesiras prendidas fin ussa per cuntanscher questa finamira èn anc adina insuffizientas en la pratica.

*D'observar è il suandard svilup: La Confederaziun ed ils chantuns han decidì da s'occupar cuminaivilamain dal problem da la mancanza da plazzas da transit. Ina grupper da laver che ha già sia sesida iniziala il settember 2018, duai elavurar in concept naziunal.*

*Ultra da quai han organisà – il schaner 2018 a Berna – l'Associaziun da las vischnancas svizras (AVS) e la Fundaziun svizra «In futur per ils viagiants svizzers» ina dieta specifica pertutgant la dumonda da la mancanza da plazzas da staziunament per Jenics, Sinti e Manouches. La finamira da quella dieta è stada quella da promover ina meglia collavuraziun tranter tut ils acturs participads e da preschentlar ils exempels d'intgins chantuns per proceduras ch'en sa cumprovadas.*

52. Il Comité consultativ è stà surprais da vegin a savair che l'incumbensa d'administrar e da mantegnair las plazzas è veginada delegada en tscherts cas a la polizia. Quai pudess (er sche quai è forsa incorrect) vegin interpretà sco surveglianza permanenta uffiziala da questas minoritads, cunzunt sche questa administraziun dovrà controllas sistematicas da l'identitat. I fiss pli cunvegnent da delegar questa incumbensa a persunas che n'hanno pussanza executiva, per exemplu ad emploids communals. En general han plirs partenaris da discurs dal Comité consultativ remartgà ch'i seja difficil per umans cun ina moda da viver nomada da chattar l'unitad u la persuna ch'è cumpetenta per els en in tschert chantun, schizunt sch'i sa tracta dals servetschs socials. Las proceduras administrativas e l'organisaziun dals servetschs socials sajan ultra da quai savens adattadas mal a lur situazion e resguardian memia pauc lur moda da viver.

*Sco che la delegaziun dal Comité consultativ ha pudì constatar sezza a chaschun da sia visita il mars 2018 ed a chaschun da ses discurs cun viagiants preschents al lieu, administrescha la polizia locala la plaza da transit Joux-des-Ponts en il chantun Friburg a plaina cuntentientscha da ses utilisaders.*

53. La Confederaziun, ils chantuns e las vischnancas stoppian sensibilisar cun mesiras coordinadas la publicitat per la moda da viver dals viagiants, per che lur dretgs possian vegin promovids e protegids independentamain da la naziunalidad (cf. artitgel 4 e 6). Per mantegnair e per sviluppar las culturas da questas minoritads èsi d'ina impurtanza centrala da crear cundiziuns che procuran che las plazzas necessarias stettian a disposiziun e che quellas veginian acceptadas d'ina maioritad.

## Recumandaziun

54. Il Comité consultativ appellescha a las autoritads federalas da deliberar uschè svelt sco pussaivel il sboz dal plan d'acziun federal, da realisar immediatamain las mesiras proponidas

<sup>49</sup> Cf. er Comité consultativ, terz Parairi davart la Svizra, deliberà ils 5 da mars 2013, alinea 53.

<sup>50</sup> Fundaziun «In futur per ils viagiants svizzers», rapport annual 2016, da consultar sut: [http://www.fondation-gensduvoyage.ch/autrefois-nosjours/sites/stiftung-fahrende.ch.geschichte-gegenwart/files/doc/jahresbericht\\_2016\\_dreisprachig.pdf](http://www.fondation-gensduvoyage.ch/autrefois-nosjours/sites/stiftung-fahrende.ch.geschichte-gegenwart/files/doc/jahresbericht_2016_dreisprachig.pdf)

<sup>51</sup> Grupper da laver «per megliorar las cundiziuns per la moda da viver nomada e per promover la cultura dals Jenics, Sinti e Roma», rapport e plan d'acziun, chapitel 3.3.1 e 3.3.2, 21 da december 2016.

en quel e da sensibilisar la publicitat per la moda da viver nomada. Il Comité consultativ appellescha a las autoritads d'endrizzar avunda plazzas entaifer il termin previs en il sboz dal plan d'acziun.

*Las lavurs per realisar il plan d'acziun «Jenics, Sinti e Roma» duran anc. Il december 2018 ha il Departament federal da l'intern (DFI) suuttamess al Cussegl federal in rapport davart ils progress cuntanschids.*

### **«Fermadas spontanas» sin terren privat**

55. Fin ch'in dumber suffizient da plazzas publicas è avant maun, preschenta il sboz dal plan d'acziun federal fermadas spontanas sin terren privat sco med impurtant per compensar la mancanza da plazzas publicas<sup>52</sup>. Per ils represchentants da las cuminanzas dals Jenics, Sinti e Manouches èn «fermadas spontanas» medemamain in med cumprovà per chattar ina piazza per intgins dis, cunzunt perquai ch'i mancan plazzas publicas per quest intent. Ina fermada spontana consista principalmain dal fatg ch'i vegn fatga ina cunvegnientscha directamain cun in proprietari d'in bain immobigliar privat, per il solit cun in pur, e ch'i vegnan lura endrizzadas installaziuns tenor ils detagls concludids a bucca.

*Rectificaziun: Fermadas spontanas pon avair lieu er sin bains immobigliars publics.*

*Il settember 2018 ha incumbensà la Fundaziun «In futur per ils viagiants svizzers» il Center svizzer da cumpetenza per ils dretgs umans (CSDU) da far in'expertisa giuridica, en la qual vegnan analisadas las obligaziuns dal stadi areguard las fermadas spontanas dals viagiants; obligaziuns che resultan dal dretg constituzional, dal dretg internaziunal u da disposiziuns legalas. L'expertisa giuridica duai esser avant maun mez 2019.*

*En intgins chantuns existan proceduras ch'en sa cumprovadas per quest sectur. Uschia dastgan – tenor il dretg chantunal dal chantun Sviz – persunas privatas senza auter dar en locaziun per emna lur bains immobigliars a viagiants.*

56. La Lescha federala davart il commerzi ambulant e l'ordinaziun executiva appartegnenta èn vegnidas revedidas il december 2016 resp. il december 2017 ed entradas en vigur il 1. da fanadur 2018. Sin basa da questas midadas sto vegnir inoltrà – cun mintga nova dumonda da survegnir ina permissiun per il commerzi ambulant – il consentiment en scrit dal proprietari dal bain immobigliar, sin il qual la persuna petenta vul sa fermar. Las novas disposiziuns legalas prevesan ultra da quai che la permissiun po vegnir retratga en cas da disturbis considerabels da l'urden public e ch'ella po vegnir renovada pir suenter 2 onns. En las explicaziuns tar la midada da l'Ordinaziun davart il commerzi ambulant<sup>53</sup> vegni precisà ch'i sto vegnir decidi davart ina tala retratga da la permissiun en il cas singul e resguardond il princip da commensurablidad e che la permissiun dastga vegnir retratga mo, sch'il donn dal proprietari è resultà en connex cun l'execuziun dal commerzi respectiv.

57. Tscherts partenaris da discurs dal Comité consultativ, tranter auter er represchentants uffizials dals chantuns e da la Fundaziun, descrivan las «fermadas spontanas» sco resultat d'ina cunvegnientscha informala cun il proprietari respectiv, per il solit cun in pur, che serva a tuttas duas partidas – tant als viagiants che tschertgan ina piazza sco er al pur che tschertga ina funtauna d'entradas supplementara. Tenor ils represchentants da las organisaziuns dals Jenics, Sinti e Manouches pudess quest sistem vegnir periclità tras il fatg che las pretensiuns da la nova lescha – numnadamaain da preschentar in consentiment en scrit dal proprietari dal bain immobigliar en cumbinaziun cun la prescripziun d'inoltrar sco fin ussa la dumonda 20 dis

<sup>52</sup> Plan d'acziun, stadi intermediar december 2016, chapitel 3.3.3.

<sup>53</sup> Departament federal d'economia, furmaziun e retschertga, Explicaziuns tar la midada da l'Ordinaziun davart il commerzi ambulant (CS 943.11), 25 d'octobre 2017, da consultar sut:

<https://www.news.admin.ch/newsd/message/attachments/50742.pdf>

avant il cumentzament da l'activitat – na pon betg vegin ademplidas en la pratica. Per la moda da viver nomada signifitga quai in obstachel serius che pudess impedir ils commerziants da finanziar lur custs da viver, durant ch'els èn en viadi.

58. Il Comité consultativ parta il punct da vista dals Jenics, Sinti e Manouches cun ina moda da viver nomada, ch'èn da l'avis che questas midadas da lescha pudessan imponer ad els – tut tenor l'interpretaziun – formalitads e sancziuns sproporzionadas. Il Comité consultativ beneventa ch'ina grappa da laver cun la participaziun dals chantuns e da las vischnancias tschertga – fin a l'entrada en vigur da las novas disposiziuns giuridicas e sut l'egida dal Secretariat da stadi per l'economia – soluziuns pragmaticas che permettan d'applitgar las novas disposiziuns giuridicas, mantegnend a medem temp la moda da viver nomada dals Jenics, Sinti e Manouches.

*Las autoritads federalas èn conscientas che las novas disposiziuns da la Lescha federala davart il commerzi ambulant e da l'Ordinaziun executiva appartegnenta svegliant tschertas dumondas giuridicas e praticas. Suenter l'entrada en vigur da questas disposiziuns – il fanadur 2018 – n'ha il Secretariat da stadi per l'economia (SECO), al qual è affidada questa tematica, puspè betg survegnì resuns spontans, ni da las autoritads chantunalas cumpetentas ni dals viagiants svizzers pertutgads. Ils 28 da november 2018 ha già lieu – sin iniziativa e sut la direcziun dal SECO – l'emprima reunion d'ina grappa da laver dals chantuns, en la qualà collavura er l'Uffizi federal da cultura (UFC). En questa reunion han pudì vegin discutadas emprimas experientschas cun las novas prescripcziuns giuridicas. Il SECO beneventa ina interpretaziun pragmatica e l'applicaziun da las novas disposiziuns legalas, per ch'ils viagiants na vegin betg restrenschids en lur moda da viver ed en lur pussaivladads da far fermadas spontanas. Il chantun Berna è dal medem avis.*

*Ultra da quai è previs – la fin da l'onn 2018 – in barat d'opiniuns tranter la Fundaziun «In futur per ils viagiants svizzers» ed il SECO che sa scuntra gugent er cun represchentants dals viagiants.*

## Recumandaziun

59. Il Comité consultativ appellescha a las autoritads da la Confederaziun e dals chantuns da dar – tar l'elavuraziun da novs texts da lescha, per exemplu davart l'urden public – in'attenziun commensurada al mantegniment da l'identidad e da la cultura da personas che appartegnan a minoritads naziunalas e da proteger lur dretg d'exequir lur tradiziuns. Il Comité consultativ appellescha a las autoritads federalas da garantir che la revisiun da la Lescha federala davart il commerzi ambulant e da l'ordinaziun correspondenta vegnia interpretada ed applitgada proporzialmain en regard a las finamiras.

## Artitgel 6 da la Convenziun da basa

### Toleranza e dialog intercultural

60. Las autoritads federalas, chantunalas e communalas promovan en moda engaschada la chapientscha interculturala e quai cun mesiras e cun programs ils pli differents, numnadamanin cun programs chantunals d'integraziun e cun mesiras per sustegnair projects da la societat civila. Il Comité consultativ beneventa il clima general da la toleranza envers minoritads linguisticas. Ultimamain è ina Iniziativa dal pievel davart ils servetschs da dretg public dal radio e da la televisiun (cf. artitgel 9) vegnida refusada, quai che mussa cleramain che la societat svizra accepta da princip la plurilinguitad e ch'igl è impurtant da la promover, en spezial sur las medias publicas che emettan programs en las linguas minoritaras. L'ultim temp vegni empruvà cun ina retscha d'iniziativas dal pievel da limitar il dumber da linguas

obligatoricas sin il stgalim primar, sco per exemplu cun l'iniziativa «Mo ina lingua estra en la scola primara» en il chantun Graubünden/Grischun/Grigioni (cf. artitgel 14).

*L'Iniziativa «Mo ina lingua estra en la scola primara» è vegnida refusada da las burgaisas e dals burgais dal chantun Grischun ils 23 da settembre 2018 (cf. commentari tar la cifra 105 qua sutwart).*

61. Cun agid da quotas liantas e da purschidas da qualificaziun per il persunal vegn promovida la plurilinguitad entaifer l'administraziun federala (cf. artitgels 10 e 15) ed il barat tranter persunas che appartegnan a minoritads linguisticas vegn sustegnì permanentamain (cf. artitgel 5). Tuttina vali d'intensivar la promozion da la plurilinguitad per la francar duraivlamain en l'administraziun chantunala dals chantuns bilings e trilings (cf. artitgels 10, 11 e 14).

*Qua na sa tracti betg da «quotas» en il vair senn dal pled, mabain da valurs da finamira correspondentamain a l'Ordinazion federala (art. 7 – Represchentanza da las cuminanzas linguisticas en l'administraziun federala).*

62. Las autoritads èn conscientas che la gronda part da la populaziun sa anc relativamain pauc da la moda da viver e da la cultura da las persunas che appartegnan a las cuminanzas dals Jenics, Sinti e Manouches. En il Rapport statal<sup>54</sup> vegni punctuà che projects per endrizzar novas plazzas da staziunament, da transit e da passagi duessan vegnir accumpagnads da mesiras che promovan l'acceptanza da las minoritads tras la maioritad per stgaffir uschia in clima da confidenza. En quest regard vegnan lantschadas regularmain iniziativas sin plaun da la Confederaziun e dals chantuns per promover la moda da viver nomada. Il settembre 2016 è il cusseglier federal Alain Berset sa participà a la «Feckerchilbi», il festival tradiziunal dals Jenics, Sinti e Manouches svizzers che ha già lieu per l'emprima giada a Berna per motifs d'ina meglra percepziun. Finanzialmain è l'occurrenza vegnida promovida da l'Uffizi federal da cultura. Er il Servetsch per il cumbat cunter il rassissem ha sustegnì finanzialmain dapi l'onn 2013 11 projects per cumbatter l'antiziganissem.

*Il modul d'approfondaziun «Omnibus 2019» che vegn realisà en il rom da la retschertga «Convivenza en Svizra», è deditgà a la moda da viver nomada/senza domicil stabel dals Jenics, Sinti e Manouches (Roma). Il modul ha la finamira da registrar las tenutas e las percepziuns da la populaziun envers questa moda da viver e da l'avisichinar a questa cultura. Il questiunari è vegnì concepì en collavuraziun cun las associaziuns dals Jenics, Sinti e Roma. Ils exemples concrets ch'en cuntegnids en il questiunari sa basan sin experientschas personalas da las persunas pertutgadas.*

*Intgins chantuns han ultra da quai sviluppà proceduras cumprovadas per sensibilisar la populaziun per la moda da viver nomada. Uschia ha già lieu dus onns in suenter l'auter ina festa da la cultura jenica a Vidy/Losanna en il chantun Vad, il mediatur public per viagiants ha organisà rondas da discussiun, e las autoritads chantunala han concepì e distribuì flyers cun la finamira da preschenttar las cuminanzas dals viagiants en lur chantun e da cumbatter cunter pregiudizis. Il chantun Grischun sostegna la campagna da sensibilisaziun en il campadi «Rania» che vegn prendì en locaziun da la «Associazion dals viagiants» sco plaza da staziunament u da transit (cf. il Quart rapport statal, cifra 29 p. 19). L'avust 2018 è vegnida organisada – cun il sustegn da las autoritads chantunala e communalas sco er da l'Uffizi federal da cultura (UFC) – a Friburg l'ultima «Feckerchilbi», la festa culturala tradiziunala dals Jenics cun ils Sinti e Manouches.*

63. Malgrà questas stentas existan anc adina stereotips envers Jenics, Sinti e Manouches (cf. il chapitel «Pleds instigants» qua sutwart). I èn vegnidias annunziadas pliras demonstraziuns da

<sup>54</sup> Rapport statal, alinea 86.

gruppas localas cunter l'installaziun da novas plazzas. En quest connex han perscrutaders da l'Universitad da Turitg fatg l'onn 2013 in studi<sup>55</sup> davart ils rapports sur da Jenics e Roma en las medias svizras las pli impurtantas durant ils onns 2005–2012. Igl è sa mussà che la preschentaziun mediala è stada fitg manglusa e che la mesadad dals rapports analisads cuntegnea infurmaziuns pauschalisantas che intermedieschan savens stereotips negativs. Sco reacziun sin quai ha la Cumissiun federala cunter il rassissem appellà a las medias da rapportar en moda pli precauta dals Jenics e Roma e da formular lur rapports en moda pli differenziada e senza generalisaziuns e da procurar ch'ils cuntegns veggian preschentads or da differentas opticas e puncts da vista.

## Recumandaziun

64. Il Comité consultativ supplitgescha las autoritads federalas da promover pli fitg projects da sensibilisaziun che vulan reducir pregiudizis envers la furma da viver nomada dals Jenics, Sinti e Manouches, en spezial projects che sa drizzan a las medias u als collavuraturs da las medias.

## Pleds instigants

65. Tenor l'artitgel 261 dal Cudesch penal svizzer veggia chastià tgi che appellescha publicamain d'odiar u da discriminar ina persuna u ina grappa da persunas pervia da sia razza, sia etnia u sia religiun (cf. artitgel 4). Il Comité consultativ constatescha che pregiudizis ch'existan anc adina envers Jenics, Sinti e Manouches pon chaschunar ina tenuta ostila envers lur moda da viver e prenda enconuschienscha cun displaschair dal dumber da protestas e da demonstraziuns da gruppas localas cunter l'installaziun da plazzas da staziunament e da passagi en lur vischinanza, nua ch'i èn da vesair placats, sin ils quals «persunas viagiantas» veggian preschentadas cun expressiuns e cun maletgs offendents. Ultra da quai deplorescha el fermemain las novas acciuns violentas cunter commembers da cuminanzas gidieuas<sup>56</sup> e l'augment d'ostilitads envers tals en la publicidad, numnadama en raits socialas. El observa ina tendenza cumparegliabla envers cuminanzas muslimas, cun acts da vandalissem sin santeris e cun graffitis cun parolas d'odi sin moscheas<sup>57</sup> e prenda enconuschienscha da plirs cas da pleds instigants, puspè oravant tut en raits socialas.

66. A l'avis dal Comité consultativ èn questas manifestaziuns publicas repetidas d'ostilitads envers Jenics, Sinti e Manouches sco er envers cuminanzas gidieuas e muslimas cleramain «pleds instigants» en il senn da la recumandaziun nr. R (97) 20 dal Comité dals ministers als stadis commembers. En vista al fatg che tscherts da quests pleds instigants derivan da politichers declera il Comité consultativ anc ina giada che communicaziuns da quest gener hajan in effect decisiv per la debatta publica, perquai che questas personalitads da la vita publica hajan ina influenza speziala e perquai che lur acziuns e lur remartgas veggian propagadas e rinforzadas immediatamain da las medias. Pervia da las largias en l'effectiv da datas pon vegin constatadas mo cun difficultads – sumegliantamain als cas da discriminaziun – tendenzas en connex cun pleds instigants; tar ils interlocuturs da las gruppas pertutgadas exista però en general l'impressiun ch'i dettia in cler augment da pleds instigants, spezialmain en l'internet.

<sup>55</sup> Universitad da Turitg, Studie zur Qualität der Berichterstattung über Roma in Leitmedien der Schweiz, da consultar sut: <http://www.ekr.admin.ch/dokumentation/d107/1120.html>

<sup>56</sup> CICAD, *Antisémitisme en Suisse Romande*, rapport 2017.

<sup>57</sup> Nermina Ademović-Omerčić: Islamophobie in der Schweiz: Länderbericht 2017, en: Enes Bayraklı & Farid Hafez, European Islamophobia Report 2017; cf. tranter auter ARCInfo, *Lausanne: le Carré musulman du cimetière du Bois de Vaux saccagé dans la nuit de vendredi à samedi, 14 d'octobre 2017*, da consultar sut: <https://www.arcinfo.ch/articles/suisse/lausanne-le-carre-musulman-du-cimetiere-du-bois-de-vaux-saccage-dans-la-nuit-de-vendredi-a-samedi-708379> u Grenchner Tagblatt, *Illegaler flüchtet von der Moschee-Baustelle – Polizist stürzt bei Verfolgung in die Tiefe*, 13 da december 2017, da consultar sut: <https://www.grenchertagblatt.ch/solothurn/grenchen/illegaler-fluechtet-von-der-moschee-baustelle-polizist-stuerzt-bei-verfolgung-in-die-tiefe-131993734>

67. Il Comité consultativ è vegnì infurmà d'intgins interlocuturs betg statals che lur stentas da manar cas da pleds instigants davant dretgira hajan mo darar success, perquai ch'els na survegnian sco organisaziuns nadin dretg da purtar plant. Quai è spezialmain problematic, sche las organisaziuns vulan agir cunter communicaziuns publicas che han en mira ina minoritad sco unitad. En quest cas pudess ina persuna u schizunt ina gruppda persunas vegnir resguardada sco inizianta d'in plant popular, e pervia da quai la vegniss probablaman er refusà il dretg per agir en l'interess general. Però è il Comité consultativ vegnì orientà da las autoritads davart lur intenziun da dar quest dretg ad organisaziuns nungovernmentalas per defender l'interess general sin quest champ spezial en proceduras civilas.

*Entaifer il champ d'applicaziun da la norma penala antirassistica (artitgel 261<sup>bis</sup> CP) na vegn betg concedida ad uniuns ina legitimaziun da far recurs en proceduras penales. Sco ch'il Cussegl federal ha declarà en sia missiva tar l'unificaziun dal dretg processual penala, refusescha er el ina tala autorisaziun, perquai che quella pudess difficultar la procedura penala e perquai ch'igl è chaussa da la procura publica da far valair d'uffizi il dretg statal da chastiar.*

*La discriminaziun da las razzas è in malfatg che vegn persequità d'uffizi (art. 261<sup>bis</sup> CP). Sche las autoritads da persecuziun penala na cumenzan betg or d'atgna iniziativa ina procedura, po mintga persuna e mintga associaziun da persunas che constatescha tals delicts far ina denunzia penala e lantschar uschia ina inquisiziun penala. Uschia inoltreschan la Federaziun svizra da las communitads israelitas (FSCI), la Fundaziun cunter rassissem ed antisemitissem (GRA) e la «Coordination Intercommunautaire Contre l'Antisémitisme et la Diffamation» (CICAD) savens denunzias penales pervia da cuntravenziuns cunter la norma penala antirassistica. Er la Societat per pievels smanatschads e las associaziuns dals Jenics, Sinti, Manouches e Roma sentenzieschan regularmain remartgas rassisticas cunter persunas che appartegnan a questas gruppas (cf. Quart rapport statal, cifra 44).*

68. En vista al dumber dals cas da pleds instigants communitgads ad el deplorescha il Comité consultativ ch'i na dettia nagin mecanissem da reacziun cumplessiv che garantescha che tut ils pleds instigants vegnian condemnads immediatamain, er en il discurs politic, e che cuntramesiras vegnian prendidas resolutamain sin il nivel il pli aut. Ultra da quai deplorescha el che pleds instigants na vegnian betg survegliads sistematicamain e na sajan betg scumandads explicitamain. Tenor la giurisdicziun constanta dal Tribunal europeic dals dretgs umans na gaudián pleds instigants nagina protecziun tenor l'artitgel 10 da la Convenziun europeica dals dretgs umans che garantescha la libertad d'exprimer sia opiniu.<sup>58</sup> Il Comité consultativ supplitgescha las autoritads d'examinar la pussaivladad d'examinar sistematicamain talas externaziuns e da las persequitar penalmain en cas da basegn e da dar il medem mument il dretg a las persunas ed a las gruppas pertutgadas da defender cumplainamain lur dretgs davant dretgira.

*Las suandardas rectificaziuns e cumpllettaziuns ston vegnir fatgas:*

- *Schebain che crims per odi n'en betg in causal penal specific tenor il Cudesch penal svizzer, vegnan resguardads regularmain motivs rassistics cun fixar il chasti (fixar la culpa dal delinquent tenor l'art. 47 al. 2 CP e concurrenza tenor l'art. 49 CP), cunzunt acts chastiabels cunter il corp e cunter la vita (art. 111 ss. CP), acts chastiabels cunter l'onur (art. 173 ss. CP) u discriminaziun da las razzas (art. 261<sup>bis</sup> CP). Per resguardar motivs rassistics en connex cun fixar la dimensiun dal chasti n'e pia betg necessaria ina midada da la lescha.*

<sup>58</sup> Tribunal europeic dals dretgs umans, *Jersild cunter il Danemarc*, 23 da settember 1994, seria A nr. 298, alinea 35; cf. er *Pavel Ivanov cunter la Russia*, 35222/04, sentenzia dals 20 da favr 2007; *M'Bala M'Bala cunter la Frantscha*, 25239/13, sentenzia dals 20 d'octobre 2015, alinea 40.

- Remartgas ed incidents cun ina motivaziun rassistica vegnan sentenziads publicamain e regularmain da la Cumissiun federala cunter il rassissem (CFR). Uschia è ella intervegnida il cumenzament da l'onn 2018 en connex cun in placat electoral pazzà a chaschun da las elecziuns dal parlament chantunal bernais. Sin quest placat vegniva mussada la refusa da l'endrizzament da plazzas da transit en ina moda che umiliava cleramain ils viagiants (cf. <https://www.verbund.ch/bern/kanton/junge-svp-sorgt-mit-zigeuner-motiv-fuer-rote-koepfe/story/30351060>).

*La CFR examinescha actualmain en emprima lingia opziuns d'agir pertutgant il tema pleuds instigants en l'internet. Ultra da quai è la CFR s'occupada da la dumonda da remartgas rassisticas envers Muslims en il rom d'ina dieta specifica publica davart il tema «Ostilitad envers Muslims: societad, medias e politica», ch'è vegnida organisada il settembre 2017 a l'Universidad da Friburg en in partenadi cun il Center svizzer per islam e societad (CSIS), cun l'Universidad da Friburg e cun il Center da perscrutaziun da religiun (ZRF) da l'Universidad da Lucerna. Sin basa da differents studis e da differentas observaziuns en la pratica han ils referents dilucidà il svilup dal discurs public e la percepziun actuala da Muslims en Svizra.*

- La Procura publica dal chantun Vad renviescha ultra da quai al fatg ch'i èn vegnidas pronunziadas l'onn 2018 duas sentenzias pervia da discriminaziun da las razzas en connex cun remartgas ch'en sa drizzadas a personas da derivanza africana. Duas ulteriuras sentenzias èn vegnidas pronunziadas pervia da revisionissem. Plinavant è pendenta actualmain ina procedura, suenter ch'ina uniu ha fatg ina denunzia penala cunter ina politicra ch'è s'exprimida «cun ostilitad envers ils viagiants». En il chantun Vallais è vegni sentenzià l'october 2018 in revisionist ch'aveva snegà l'esistenza da chombras da gas durant il temp dal naziunalsocialissem.
- Tenor l'infurmaziun d'intgins chantuns pudess il «mecanissem da reacziun cumplessiv che garantescha che tut ils pleuds instigants vegnian condemnads immediatamain sin il nivel il pli aut» avair il medem status giuridic sco intervenziunissem. Quai cuntrafa al princip da la separaziun da las pussanzas.

## Recumandaziuns

69. Il Comité consultativ appellescha a las autoritads da la Confederaziun e dals chantuns sin tut ils plauns da condemnar sistematicamain ed immediatamain tut las manifestaziuns d'intoleranza, saja quai antiziganissem, antisemitissem u ostilitad envers Muslims, en spezial en il discurs public, en il senn da la recumandaziun nr. R (97) 20 dal Comité dals ministers als stadis commembres concernent «pleuds instigants». El appellescha plinavant ad ellas d'examinar sistematicamain talas manifestaziuns e da perseguitar penalmain ils auturs.

70. Il Comité consultativ appellescha a las autoritads da la Confederaziun da conceder a personas che appartegnan a minoritads naziunalias la pussaivladad da far valair davant dretgira lur dretgs sco victimas da pleuds instigants, en spezial cun dar il dretg ad organisaziuns nunguvernementalas d'agir en l'interess general e da represchentar ils dretgs ed ils interess da las victimas.

*Pertutgant la legitimaziun da far recurs d'organisaziuns nunguvernementalas vegni renvià a las rectificaziuns tar cifra 67 qua survart.*

## Cumbat cunter crims per odi

71. L'onn 2017 èn vegnids annunziads 189 incidents antisemitis<sup>59</sup>, sis da quels èn stads attatgas violentas. En quest connex èn tranter auter vegnidas pendidas si bandieras che han intimà da mazzar Gidieus. Intgins interlocuturs dal Comité consultativ han rapportà ultra da quai ch'in neonazi haja attatgà il fanadur 2015 a mesa via a Turitg in um che pertava ina kippa. L'attatgader è vegnì sentenzià il mars 2018 ad in chasti da detenziun da 2 onns.<sup>60</sup> Ils represchentants da las cuminanzas gidieuas deploreschan ultra da quai la vendita d'ediziuns *Mein Kampf* che n'en betg commentadas; ina vendita che contribuescha a lur avis a l'ulteriura derasaziun da l'antisemitissem. Il Comité consultativ ha encletga per ils sentiments e per ils motivs che pledan cunter la derasaziun da quest cudesch<sup>61</sup> e deplorescha che questa pratica n'è betg reglada en Svizra tras ina lescha. Il december 2016 è vegnida inoltrada ina moziun parlamentara en la chombra pitschna dal parlament svizzer (*Cussegl dals chantuns*)<sup>62</sup> cun la supplica a la Confederazion ed als chantuns da proteger meglier cuminanzas religiusas ch'en smanatschadas da terrorissem e d'extremissem, en spezial la cuminanza gidieuua. Las autoritads federalas han sin quai nominà gruppas da laver cun l'incumbensa da discutar il proceder necessari e la finanziazion. Da questas gruppas da laver fan part represchentants da las cuminanzas gidieuas e muslimas sco er dals chantuns, ch'en incumbensads primarmain cun dumondas da segirezza. Dal process da consultaziun è resultada ina soluziun dubla. Per l'ina vegn il Cussegl federal a relaschar in'ordinazion sin basa da l'artitgel 386 dal Cudesch penal<sup>63</sup> che al pussibilitescha da sustegnair immediatamain cun meds finanziars las mesiras ch'en fin ussa vegnidas pertadas da las minoritads, tranter quellas mesiras da sensibilisaziun e da scolaziun.

*Rectificaziun: Las autoritads federalas han nominà mo ina grappa da laver che duai discutar in concept per garantir la segirezza da minoritads cun in basegn da protecziun spezial.*

*Er las autoritads chantunalas sa stenan activamain a favur da la segirezza da persunas che appartegnan a la cuminanza gidieuua. En il chantun Vad vegni dà in'attenziun speziala als interess da la cuminanza gidieuua – particularmain a la sinagoga ed a la scola gidieuua –, e quai en il rom da las acziuns dal stab directiv «VIGIPOL». Sin giavisch da la cuminanza gidieuua ha la polizia chantunala analisà la segirezza en las localitads da la scola gidieuua a Losanna. Er il chantun Basilea-Citad examinescha actualmain la puissaivladad da sustegnair mesiras da protecziun per la cuminanza gidieuua. La Regenza (executiva) ha preschentà al parlament chantunal in concept da sustegn che prevesa tranter auter dapli preschientscha da la polizia. Il concept sto anc vegnir acceptà dal parlament. Ultra da quai elavura il chantun Basilea-Citad actualmain in plan da mesiras chantunal per dumagnar las smanatschas pervia da radicalissem e terrorissem.*

72. Per l'autra dastgass vegnir relaschada ina nova lescha federala sin basa da l'artitgel 57 alinea 2 da la Constituziun federala.<sup>64</sup> Dals chantuns vegn spetgà in engaschament pli grond,

<sup>59</sup> En la part tudestga da la Svizra ha la FSCI (Federaziun svizra da las communitads israelitas) registrà 39 cas: cf. rapport annual 2017 da la FSCI, da consultar sut: [www.antisemitismus.ch](http://www.antisemitismus.ch); en la part franzosa da la Svizra èn vegnids registrads 150 cas da la CICAD (Coordination intercommunautaire contre l'antisémitisme et la diffamation), cf. CICAD, rapport annual 2017, da consultar sut:

[http://www.cicad.ch/sites/default/files/basic\\_page/pdf/Rapport%20Antise%CC%81mitisme%20en%20Suisse%20romande%202017.pdf](http://www.cicad.ch/sites/default/files/basic_page/pdf/Rapport%20Antise%CC%81mitisme%20en%20Suisse%20romande%202017.pdf)

<sup>60</sup> Le Matin, «Un néonazi en prison pour avoir craché sur un juif», publitgà ils 13 da mars 2018, da consultar sut:

<https://www.lematin.ch/suisse/neonazi-retour-prison-crache-juif/story/15028996>

<sup>61</sup> Ils dretgs d'autur da la Republica da Baviera èn scadids la fin da l'onn 2015.

<sup>62</sup> Moziun 16.3945, «Protecziun da cuminanzas religiusas cunter violenza terroristica ed extremistica», da consultar sut: <https://www.parlament.ch/de/ratsbetrieb/suche-curia-vista/geschaeft?AffairId=20163945>

<sup>63</sup> L'artitgel 386 dal Cudesch penal svizzer di: «1. La Confederaziun po prender mesiras da scleriment, mesiras d'educaziun ed ulteriuras mesiras che han l'intent d'evitar malfatgs e da prevegnir a la criminalitat. 2. Ella po sustegnair projects che han la finamira menziunada sut l'alinea 1. 3. Ella po sa participar ad organisaziuns che realiseschan mesiras en il senn da l'alinea 1 u crear e sustegnair talas organisaziuns. 4. Il Cussegl federal regla il cuntegn, las finamiras ed il gener da las mesiras da prevenziun.»

<sup>64</sup> En l'artitgel 57 da la Constituziun federala svizra hai num: «1. La Confederaziun ed ils chantuns procuran en il rom da lur cumpetenzas per la segirezza dal pajais e per la protecziun da la populaziun. 2. Els coordineschan lur stentas sin il sectur da la segirezza interna.»

en spezial en quai che pertutga la finanziaziun. Il mument che quest Parairi è vegnì deliberà n'ha la Conferenza dals directurs chantunals da giustia e polizia (CDCGP) anc betg prendì posiziun en chaussa. Il Comité consultativ beneventa il dialog tranter las autoritads e las minoritads pertutgadas e las mesiras legislativas proponidas da la gruppera da l'avor menziunada, deplorescha però che las cuminanzas gidieuas han stuì pajar fin ussa sezzas ina part considerabla da las mesiras da segirezza quotidianaas ch'ellas han prendì pervia dal sentiment d'ina periclitaziun creschenta, spetgond mesiras concretas.

#### *Las suandardas rectificaziuns ston vegnir fatgas:*

*Il fanadur 2018 ha il Cussegl federal concludì da sa participar als custs ch'èn necessaris per s'occupar da la segirezza da minoritads cun in basegn da protecziun spezial (particularmain las cuminanzas gidieuas, dentant er muslimicas, sco er tut las otras minoritads che daventan cun gronda probabilitad victimas da terrorissem e d'auters acts da violenza cun cleras finamiras). A partir da l'onn 2019 duain mesiras d'infurmaziun, da sensibilisaziun e da scolaziun vegnir sustegnidias cun fin 500 000 francs per onn. Il Cussegl federal ha incumbensà il Departament federal da giustia e polizia (DFGP) d'elavurar l'ordinaziun necessaria e da dar quella en consultaziun avant la fin da l'onn 2018. Questa ordinaziun duai valair per ina perioda da 5 onns. Durant quest temp duai vegnir examinà, sch'igl è raschunaivel d'elavurar e da decretar ina nova lescha federala per finanziar mesiras da protecziun sco talas sin basa da l'artitgel 57 alinea 2 da la Constituziun federala («[La Confederaziun ed ils chantuns] coordineschan lur stentas sin il sectur da la segirezza interna»).*

#### Recumandaziun

73. Il Comité consultativ recumonda da perseguitar vinavant e da realisar immediatamain las mesiras identifitgadas, per che la segirezza da las personas che appartegnan a minoritads naziunalas seja garantida, ed el appellescha a las autoritads chantunals da sustegnair vinavant las stentas da la Confederaziun, en spezial cun gidar a finanziar questas mesiras.

### **Discriminaziun da Roma betg svizzers**

74. Il Comité consultativ aveva già constatà<sup>65</sup> che blers Roma svizzers dovran las pazzas da passagi ch'èn vegnidas endrizzadas da las autoritads svizras. En il sboz dal plan d'acziun da la Confederaziun vegni recumandà da resguardar ils basegns da questas personas cun planisar pazzas novas. Il Comité consultativ prenda però enconuschientscha da la relaziun mintgatant critica tranter Jenics, Sinti e Manouches d'ina vart ed ils Roma, tranter quels ils Roma betg svizzers, da l'autra vart. En spezial è el vegnì infurmà dal fatg ch'in pèr gruppas sajan mo navidas prontas da parter ina piazza u da sa trategnair sin ina piazza ch'è avant vegnida duvrada da Roma betg svizzers. La consequenza da quai seja che tschertas pazzas n'èn explicitamain betg vegnidas dadas libras per viagiants da l'exterior. En ses discurs cun las personas pertutgadas è il Comité consultativ vegnì a savair ch'il motiv per la mancanza da prontezza è oravant tut quel che Roma betg svizzers viagian per regla en grondas gruppas e ch'els hajan perquai autres pretensiuns a pazzas. Tenor l'avis dal Comité consultativ duess en cas, nua ch'ina tscherta piazza duai – per motifs da l'adequatezza – vegnir reservada per gruppas pli pitschnas, esser decisiva la grondezza e betg la naziunalidad da las personas respectivas per restrenscher l'access. Il Comité consultativ beneventa il sustegn da las autoritads federalas per projects d'intermediaziun che duain meglierar las relaziuns tranter las differentas gruppas cun moda da viver nomada, independentamain da lur naziunalidad u da lur appartegnientscha etnica, deplorescha però che numerusas pazzas èn scumandadas explicitamain per Roma betg svizzers. El deplorescha er ina tendenza sumeglianta da far la

<sup>65</sup> Comité consultativ per la Convenziun da basa, segund Parairi davart la Svizra, favrer 2008, alinea 30.

differenza tranter «persunas viagiantas» svizras ed estras en communicaziuns politicas sco er uffizialas. Uschia vegnia creada potenzialmain ina tenuta refusanta envers persunas estras.

*Or davant sto vegin punctuà ch'il titel da quest chapitel stuess sa clamar «Discriminaziun da Roma viagiants betg svizzers». La finala sa tracti da Roma esters cun ina moda da viver nomada, che viagian durant ils mais da stad en Svizra. Ils Roma svizzers han per gronda part in domicil stabel.*

*Plinavant stoi vegin remartgà che la differenziazion tranter plazzas da staziunament duvradas da Svizzers resp. da persunas estras, che vegn mintgatant fatga d'intgins chantuns e d'intginas vischnancas, dependa da la grondezza da la gruppa respectiva. Uschia èn viagiants esters savens en viadi en furmaziuns pli grondas che viagiants svizzers. Questa differenziazion vegn chaschunada er tras las usanzas dals viagiants e tras la mancanza da lur pronteza da divider las plazzas. Quai ha il Comité consultativ pudì constatar sez ed è vegni confermà da plirs chantuns. Quai po chaschunar che instituziuns da gronda valur, sco la nova piazza da transit Joux-des-Ponts en il chantun Friburg, na vegnan betg duvradas da viagiants svizzers, schebain ch'els sentan ina mancanza da plazzas da passagi per fermadas spontanas durant ils mais da stad. A la fundaziun «In futur per ils viagiants svizzers» pari en tscherts cas giustifitgà ch'i vegnan instituidas plazzas separadas, per evitar conflicts e per permetter a disposiziun suffizientamain plazzas da passagi per viagiants esters sco er per viagiants svizzers.*

*Sco ch'i resulta da la posiziun da l'Uniun nomada da la Svizra dal november 2018, duessan ils chantuns desister d'installar plazzas da fermada maschadadas, perquai che quai chaschuna conflicts e n'observa betg ils dretgs, ils basegns e las culturas da las differentas gruppas viagiantas. L'Uniun nomada da la Svizra appellescha als chantuns da betg pli realisar plazzas da fermada maschadadas.*

*Il chantun Basilea-Citat accentuescha che la piazza da passagi ch'è situada sin ses territori e che ha survegnì il november 2018 in lieu fix, stettia a disposiziun actualmain sco er en il futur a viagiants esters sco er a viagiants svizzers. L'Uniun nomada da la Svizra critigescha il project.*

*La nova lescha decretada dal chantun Neuchâtel ils 2 da favrre 2018 «Loi sur le stationnement des communautés nomades», ch'è entrada en vigur il 1. d'avrigl 2018 e che differenziescha tranter plazzas da staziunament per cuminanzas svizras e per cuminanzas estras, è stada l'object d'ina expertisa giuridica pertugant la dumonda da sia confurmitad cun la Constituziun federala e cun il dretg internaziunal; in'expertisa giuridica ch'è vegnida incumbensada da la Cumissiun federala cunter il rassissem (CFR). In dals puncts crititgads en quella expertisa è che regulaziuns differenziadas per Svizzers e per persunas estras saja nungiustifitgada e preschentia ina discriminaziun pervia da la naziunalidad. L'avrigl 2018 èsi vegnì fatg recurs tar il Tribunal federal en il senn d'ina controlla abstracta da las normas. La procedura è actualmain pendenta.*

*La mediatura per ils viagiants dal chantun Tessin constatescha – reenviend a sia experientscha da passa 10 onns – ch'i pudess esser necessari da differenziar tranter viagiants svizzers ed esters en vista a las differenzas istoricas e culturalas tranter ils Jenic ed ils Sinti e Manouches sco er en vista a lur differents contacts cun la populaziun locala, per evitar in augment da las manifestaziuns d'intoleranza envers els.*

*Il chantun Giura renviescha al fatg, che las plazzas vegnan administradas differentamain, tut tenor sch'ellas acceptan viagiants esters u svizzers. Plinavant correspunda la differenziazion ch'el ha l'intenziun d'introducir, tranter ina piazza da passagi pitschna per viagiants svizzers ed ina piazza da transit gronda per gruppas estras, ad ina pretensiun dals viagiants svizzers.*

## Recumandaziun

75. Il Comité consultativ appellescha a las autoritads da la Confederaziun e dals chantuns d'examinar las mesiras che scumondan a Roma betg svizzers da duvrar tschertas plazzas da fermar. El appellescha a las autoritat sin tut ils plauns da rinforzar las stentas da render enconuschen a las differentas cuminanzas la moda da viver nomada, er cun promover projects d'intermediaziun; el appellescha ad ellas da guardar che questas gruppas na vegnian betg isoladas permanentamain, e da reponderar las limitaziuns per l'access a tschertas plazzas da fermar sin persunas svizras.

*Las autoritads federalas n'en betg autorisadas dad «examinar las mesiras [dals chantuns/dalas vischnancas] che scumondan a Roma betg svizzers da duvrar tschertas plazzas da fermada». Ma ellas sustegnan projects da sensibilisaziun e d'intermediaziun per minimar conflicts tranter las differentas cuminanzas cun ina moda da viver nomada.*

## Artitgel 8 da la Convenziun da basa

### Dretg da manifestar persiasiuns religiusas

76. Tenor l'artitgel 21 da la Lescha federala davart la protecziun dals animals dal 2005 ch'è en vigur dapi il settember 2008, dastgan mammals vegnir mazzads mo, sch'els èn vegnids narcotisads avant ch'il sang vegn tratg (art. 21 al. 1). Il Cussegl federal po ultra da quai suittametter il mazzament d'ulteriurs animals a l'obligaziun da narcotisaziun (art. 21 al. 2) e fixar las metodos da narcotisar admessas (art. 21 al. 3), ed el regla er las pretensiuns envers la scolaziun ed envers la furmaziun supplementara dal persunal dal stabiliment da maz. Charn koschra e charn halal dastgan però vegnir importadas ed èn suittamessas a taxas d'import pli pitschnas che auters products da charn. Il december 2015 è vegnida pretendida en ina iniziativa parlamentara<sup>66</sup> ina controlla pli severa da l'import da charn halal. Quai è vegnì motivà cun il fatg ch'i saja avant maun ina discriminaziun d'importaders da charn che na possian betg profitar da la tariffa da taglia pli bassa. En il text oriund da l'iniziativa vegni però discurrì mo da charn halal, ma l'iniziativa pudess – tenor las infurmaziuns da las autoritads svizras – chaschunar restricziuns tar charn koschra sco er tar charn halal. Il mument da la deliberaziun da quest parairi vegni anc debattà davart l'iniziativa en la chombra gronda dal parlament (*Cussegl naziunal*). Las autoritads conferman er che las cuminanzas gidieus e muslimas sajan vegnidas consultadas en la fasa preliminara da la procedura parlamentara.

*Tenor sia communicaziun a las medias dals 17 d'avust 2018 ha la Cumissiun dal Cussegl naziunal per scienza, educaziun e cultura cuntuà cun las lavurs per realisar l'iniziativa parlamentara 15.499 «Import da charn halal d'animals ch'en vegnids mazzads senza ch'els sajan stads sturnids». En quest connex ha ella concludì d'examinar, sch'il sistem da distribuziun possia vegnir adattà tar la charn importada.*

77. Il Comité consultativ è vegnì infurmà da represchentants da las minoritads rumantschas che cults divins vegnian mintgatant celebrads en autres linguas ch'il rumantsch (per exempl en tudestg) pervia da la mancanza da plevons en las vischnancas rumantschas e pervia da la necessitat d'als recrutar a l'exterior. Il Comité consultativ constatescha en quest connex che la nominaziun da plevons è tenor l'artitgel 99 alinea 3 da la Constituziun dal chantun Graubünden/Grischun/Grigioni chaussa dals cumins-baselgia e betg dal chantun.

## Recumandaziun

<sup>66</sup> Iniziativa 15.499, «Import da charn halal d'animals ch'en vegnids mazzads senza ch'els sajan stads sturnids», da consultar sut: <https://www.parlament.ch/de/ratsbetrieb/suche-curia-vista/geschaef?AffairId=20150499>

78. Il Comité consultativ appellescha a las autoritads federalas da mussar vinavant respect per sentiments religius en connex cun la dumonda da l'import da charn halal e da charn koschra e d'examinar – en cunvegnientscha cun las cuminanzas pertutgadas – soluziuns che resguardan la libertad da religiun.

## Artitgel 9 da la Convenziun da basa

### Access a las medias

79. La Societad svizra da radio e televisiun SRG-SSR<sup>67</sup> da dretg public derasa programs da plirs emetturs da radio e da televisiun exclusivamain en las linguas minoritaras. Latiers tutgan trais emetturs da radio e dus chanals da televisiun mintgamai per il territori linguistic franzos e talian sco er programs per il territori linguistic rumantsch. La concessiun actuala per la SRG-SSR scada ils 31 da december 2018 e vegn prolungada. Las premissas per questa prolungaziun èn vegnidas messas en dumonda il december 2015 tras ina iniziativa (designada sco «No Billag») che aveva la finamira d'abolir la radiodiffusiu da dretg public e tutta finanziaziun publica dal radio e da la televisiun. L'onn 2018 importavan las taxas da recepziun annualas 451 francs. Cun ellas èn vegnidas generadas circa 75 % da las entradas da la SRG SSR. L'onn 2019 vegnan elllas sbassadas a 365 francs. L'iniziativa ha pudì vegnir valitada sco dira emprova per la solidaritat en Svizra en quel senn che la maioritad linguistica paja en il sistem existent ils custs per la derasaziun da programs en las linguas minoritaras. Davart l'iniziativa èsi vegnì votà ils 4 da mars 2018. En quest connex èn 71,6 % dals votants s'exprimids cunter l'iniziativa (tar ina participaziun a la votaziun da 54 %). Quest resulta mussa il sustegn en la populaziun svizra per la radiodiffusiu da dretg public ed er per programs per persunas che appartegnan a minoritads naziunalas. Sco che represchentants da las regenzas han communitgà al Comité consultativ è la SRG SSR – tenor la nova concessiun per ils onns 2019–2022 – obligada da promover vinavant il barat linguistic tranter las cuminanzas linguisticas, ma er da garantir che ses programs per il barat interregional na vegnian betg derasads mo durant la notg, mabain er durant las uras d'emissiun principales.

*Areguard la SRG/SSR e sia concessiun vegni renvià a las rectificaziuns sut cifra 24 qua survart.*

*L'Iniziativa «No Billag» n'aveva betg la finamira, sco preschentà qua survart, dad «abolir la radiodiffusiu da dretg public», mabain mo quella d'abolir las taxas naziunalas da radio e televisiun che vegnan incassadas da la Billag per incarica da la Confederaziun. I constat però che l'approvaziun da questa iniziativa avess pudì signifitgar la fin da la radiodiffusiu da dretg public en Svizra ed avess transformà radicalmain la cuntrada svizra da medias. Il fatg che la taxa da recepziun annuala duai importar a partir da l'onn 2019 mo pli 365 francs empè da 451 francs, è quel che la taxa per posseder in apparat da recepziun vegn midada en ina taxa generala per chasada.*

80. Il Comité consultativ è vegnì infurmà dal fatg ch'ina nova Lescha federala davart las medias saja planisada che duai remplazzar la Lescha federala davart radio e televisiun e che duai promover en spezial la derasaziun da cuntegns dal servetsch public sur medias online. La basa strategica per la lescha che vegn elavurada tranter auter cun represchentants da las minoritads linguisticas, dastgass pertutgar er las medias stampadas. Ultra da quai è il Comité consultativ vegnì rendì attent al fatg che la regenza dal chantun Graubünden/Grischun/Grigioni ha approvà il 1. da matg 2018 ina incumbensa parlamentara<sup>68</sup>, cun la quala vegn pretendida l'elavuraziun d'in rapport davart l'avegnir da la politica da linguas e da medias en il chantun.

<sup>67</sup> SRG-SSR stat per *Schweizerische Radio- und Fernsehgesellschaft / Societad svizra da radio e televisiun*.

<sup>68</sup> Parlament dal Graubünden/Grischun/Grigioni, «Incumbensa Atanes concernent l'avegnir da las infurmaziuns en il Grischun», da consultar sut:

<https://www.gr.ch/DE/institutionen/parlament/PV/Seiten/20180214Atanes06.aspx>

*La nova Lescha davart las medias electronicas (LFMe) vegn a cumpigliar tut ils servetschs da la televisiun svizra sco er tut ils servetschs audio ed audiovisuals che gidan ad ademplir l'incumbensa da servetsch public. La promoziun directa da medias stampadas che cumparan sin via digitala n'è però betg previsa en il sboz da la LFMe, per mancanza d'ina disposiziun constituzionala correspontenda.*

81. Tar l'agentura da novitads *Schweizerische Depeschenagentur* (SDA) è il cumenzament da l'onn 2017 vegnida endrizzada ina plazza per in correspondent da lingua taliana en il chantun Graubünden/Grischun/Grigioni.<sup>69</sup> Il Comité consultativ beneventa l'introducziun d'in servetsch da medias local en la part taliana dal chantun che duai meglierar la purschida d'infurmaziuns da questas medias ed augmentar il dumber da novitads talianas d'autras parts dal chantun. Cun interess ha el ultra da quai prendì enconuschienscha ch'in studi giuridic da l'*Universitat da la Svizra taliana*<sup>70</sup> crititgescha che la RSI (*Radiotelevisione svizzera di lingua italiana*, la partizun taliana da la SRG-SSR) na mettia betg a disposiziun temp d'emissiun avunda per programs sur dal chantun Graubünden/Grischun/Grigioni e sur d'autras regiuns linguisticas, quai che cuntrafetschia a l'incarica da prestaziun da la SRG-SSR, e che ultra da quai er infurmaziuns davart il Tessin survegnian memia bler temp d'emissiun.

*La SRG-SSR è senza autre conscientia dal dischequilibre tranter la purschida d'infurmaziuns da la RSI pertutgant il Tessin e da ses temp d'emissiun per il chantun Grischun. Ella concepescha actualmain pliras mesiras che duain far remedura.*

82. L'unica gasetta dal di rumantscha, *La Quotidiana*, ha var 4000 abunents. Sia finanziaziun n'è betg persistenta.<sup>71</sup> Per l'onn 2018 han la Confederaziun, il chantun Graubünden/Grischun/Grigioni, la *Lia Rumantscha* e l'Agentura da novitads rumantscha ANR sostegni sia derasaziun cun ina donaziun cuminaivla da 200 000 francs. Tuttina ha l'editur da la gasetta dumandà in ulteriur sostegn da las autoritads, perquai che sia publicaziun stoppia uschiglio eventualmain vegnir sistida.<sup>72</sup> Parallelamain ha la *Lia Rumantscha* surdà a l'Uffizi federal da cultura in project per stgaffir ina nova structura che integrescha la partizun rumantscha da la SRG SSR e ch'è en cas da rediger cuntegns per rumantsch e d'als metter a disposiziun als producents da medias.

*Vi dal project per promover *La Quotidiana* vegni lavourà vinavant. A partir da l'onn 2020 duai el garantir la diversitat da la cuntrada da las medias rumantschas. Fin la fin da l'onn 2019 cumpara *La Quotidiana* en ses format actual.*

83. Ils interlocuturs dal Comité consultativ che appartegnan a las minoritads dals Jenics, Sinti e Manouches han rendì attent a las preschentaziuns medialas en general plitgunsch negativas da questas cuminanzas, sco ch'il studi da l'*Universitat da Turitg* da l'onn 2013 aveva mussà (cf. artitgel 6)<sup>73</sup>. Il Comité consultativ è d'accord en quel punct che las medias duain vegnir intimadas da rapportar en moda pli positiva d'occurrenzas culturalas dals Jenics, Sinti e Manouches, en spezial cun mesiras d'impuls che promovian – cun la participaziun cumplaina dals Jenics, Sinti e Manouches – la redacziun da cuntegns per sensibilisar la publicitat per la cultura e per la moda da viver da questas cuminanzas e che rinforzian uschia il pluralissem cultural. En quest connex renviescha il Comité consultativ a quai che la promoziun da la coesiun naziunala è in aspect central da l'incarica da prestaziun da la SRG-SSR.

<sup>69</sup> Rapport statal, alinea 123.

<sup>70</sup> Quel n'è betg vegnì publitgà, dentant concedì al Secretariat da la Convenziun da basa.

<sup>71</sup> RTS, «*Sauvetage de l'unique quotidien en langue romanche de Suisse*», artitgel dals 17 d'avust 2017: <https://www.rts.ch/info/regions/autres-cantons/8848962-sauvetage-de-l-unique-quotidien-en-langue-romanche-de-suisse.html>

<sup>72</sup> La Tribune de Genève, «*L'unique quotidien romanche sur la sellette*», artitgel dals 31 da mars 2017: <https://www.tdg.ch/suisse/L-unique-quotidien-romanche-sur-la-sellette/story/31421487>

<sup>73</sup> Universitat da Turitg, Studie zur Qualität der Berichterstattung über Roma in Leitmedien der Schweiz, da consultar sut: <http://www.ekr.admin.ch/dokumentation/f107/1120.html>

*En vista a la libertad da las medias garantida en la Constituziun federala (art. 17 Cst.) ed en vista als princips da l'independenza dal radio e da la televisiun, ch'èn francads en quella sco er en vista a l'autonomia en la furmaziun dals programs (art. 93 al. 3 Cst.) na dastgan las autoritads federalas betg ordinar als purschiders da medias cuntegns concrets davart tschertas gruppas da la populaziun. Purschiders che profitan da taxas da radio e televisiun, pon vegnir obligads actualmain mo envers incaricas da prestazion formuladas en moda abstracta. Tenor ses mandat d'integrazion sto la SRG-SSR pia garantir ch'ella resguardia er ils Jenics, Sinti e Manouches en sia furmaziun dals programs.*

*Grazia a las stentas pli intensivas da las minoritads per sensibilisar per lur interess, nua che las autoritads las sustegnan, è la preschentaziun media da las cuminanzas dals Jenics, Sinti e Manouches sa sviluppada avantagiusamain. Uschia ha chattà l'ultima «Feckerchilbi», la festa culturala tradiziunala dals Jenics cun ils Sinti e Manouches, ch'è vegnida organisada – cun il sustegn da las autoritads chantunalas e communalas sco er da l'Uffizi federal da cultura (UFC) – l'avust 2018 a Friburg, ina resonanza zunt positiva en las medias localas, dentant er sin plaun naziunal en il radio ed en la televisiun. Ins ha profità da l'occasiun per sensibilisar la populaziun per las tradiziuns e per la moda da viver da las cuminanzas svizras pauc enconuscentas dals Jenics sco er dals Sinti e Manouches.*

*La finala sto vegnir menziunà il film documentar produci cun meds da promozion dal UFC «Unerhört Jenisch – Yéniche Sounds», ch'è arrivà la stad 2017 en ils kinos da la Svizra. En cumpagnia da Stephan Eicher, in chantadur svizzer cun ragischs jenicas, sa renda l'aspectatur sin in viadi d'exploraziun tras l'istorgia e la cultura dal pievel jenic, cunzunt da sias tradiziuns musicalas, che han marcà en moda duraivla la musica populara da la Svizra. Grazia al sustegn da las autoritads d'intgins chantuns sco il Grischun, Berna e Friburg, ha il film pudi vegnir mussà sin plazzas da staziunament per viagiants ed ad occurrenzas per sensibilisar la populaziun locala per la cultura jenica.*

## Recumandaziuns

84. Il Comité consultativ appellescha a las autoritads da la Confederaziun e dals chantuns da garantir che las disposiziuns da la concessiun per la radiodiffusio da dretg public sajan cumpatiblas cun ils dretgs da las personas che appartegnan a las minoritads linguisticas tenor l'artitgel 9 da la Convenziun da basa e vegnian resguardadas da la Societad da radio e televisiun en la pratica. Ultra da quai encuraschescha il Comité consultativ las autoritads federalas e chantunalas da sustegnair vinavant l'ediziun e la derasaziun da las medias rumantschas, en spezial da la gasetta dal di *La Quotidiana* e da las medias talianas.

*Areguard la SRG/SSR e sia concessiun vegni renvià a las rectificaziuns sut cifra 24 qua survart.*

85. Il Comité consultativ appellescha a las autoritads federalas e chantunalas da promover – cun la participaziun activa dals Jenics, Sinti e Manouches – la derasaziun da cuntegns da medias che sensibiliseschan la publicitat per la cultura, per la moda da viver e per ulteriurs fatgs da questas cuminanzas.

*Questa recumandaziun sto pia vegnir precisada sco suonda:*

*Per l'ina po questa recumandaziun sa drizzar mo a las autoritads federalas, perquai che tenor l'artitgel 93 da la Constituziun federala la «legislaziun davart radio e televisiun sco er davart autras furmas da telediffusio publica da represchentaziuns ed infurmaziuns ... suttastat a la Confederaziun».*

*Per l'autra è ella formulada en moda memia generala, perquai che las autoritads federalas pon vegnir appelladas – en concordanza cun la libertad da las medias garantida en la*

*Constituziun ed en concordanza cun il princip francà en quella da l'independenza da las medias – da stgaffir bunas cundiziuns generalas per la derasaziun da cuntegns audio ed audiovisuels davart la cultura e la moda da viver dals Jenics, Sinti e Manouches.*

86. Il Comité consultativ appellescha a las autoritads federalas e chantunalas da garantir cun in dialog avert e cun ina consultaziun che novas prescripziuns da dretg sajan inclusas en il sectur da las medias e tegnian quint da tut las personas che appartegnan ad ina minoritad naziunala, en spezial da las personas che discurran ina lingua minoritara.

*Er questa recumandazjun po sa drizzar mo a las autoritads federalas per ils motivs menziunads qua survart sut la cifra 85.*

## **Artitgel 10 da la Convenziun da basa**

### **Promoziun ed utilisaziun da las linguas minoritaras sin plaun federal**

87. La Lescha federala davart las linguas naziunals s'occupa tant cun la plurilinguitad sin plaun federal sco er cun la diversitat linguistica en la societat sco tala. L'artitgel 6 da la lescha garantescha a mintga persuna il dretg da sa drizzar a las autoritads federalas en ina lingua uffiziala da sia tscherna e da survegnir ina resposta en questa lingua. Las personas da lingua rumantscha pon sa drizzar a las autoritads federalas en ina varianta dal rumantsch tschernida dad ellas, las autoritads federalas respondan en *rumantsch grischun*. Il Cussegl federal po però restrenscher la libra tscherna da las linguas uffizialas per il contact cun autoritads, da las qualas l'actividad è limitada ad ina tscherta regiun. Il Comité consultativ constatescha che la politica da plurilinguitad vegnia realisada bain en la pratica da l'administraziun federala.

88. Las decisiuns dal Tribunal federal vegnan communitgadas confurm a la Lescha federala davart las linguas naziunals en la lingua da la persuna petenta. Il Comité consultativ resguarda questa pratica sco cumpatibla cun las disposiziuns da la Convenziun da basa e beneventa quest concept per la plurilinguitad. Tenor l'opiniun d'intgins da ses interlocuturs èn advocats senza diplom en talian u rumantsch però plitgunsch disposts d'inoltrar plants en tudestg u en franzos che en talian u en rumantsch. Quai po difficultar l'access a decisiuns dal Tribunal federal a personas che discurran ina lingua minoritara. Il Comité consultativ è preoccupà dal fatg ch'i pudess daventar difficil a lunga vista per tschertas personas da far valair lur dretgs, sche la giurisdicziun sa sviluppa vinavant mo en tschertas linguas.

*Tenor l'artitgel 54 da la Lescha federala davart il Tribunal federal (LTF) (betg da la Lescha federala davart las linguas naziunals ch'è menziunada qua) ha lieu la procedura davant questa dretgira en ina da las linguas uffizialas (tudestg, franzos, talian, rumantsch grischun), per regla en la lingua da la decisiun contestada. Sche las partidas dovran in'altra lingua uffiziala, po la procedura avair lieu en questa lingua.*

*Cun excepcziun da las regestas (resumaziuns) da las decisiuns decisivas dal Tribunal federal, che stattan adina a disposiziun per tudestg, per franzos e per talian, na lascha il Tribunal federal far naginas translaziuns. Ma l'incumbensa vegn surpigliada d'intgins revistas giuridicas spezialisadas. Uschia ha la revista «Journal des Tribunaux» (JdT) essenzialmain la finamira d'infurmarsc i circuls d'experts giuridics davart las decisiuns dal Tribunal federal ch'en vegnidas pronunziadas per tudestg u per talian en firma da translaziuns ch'en per part resumaziuns.*

*La Chanzlia federala (ChF) ch'è – tenor la Lescha federala davart las linguas naziunals – cumpetenta per las publicaziuns uffizialas en rumantsch, è averta d'examinar – enslemen cun*

*il Tribunal federal – la pussaivladad da laschar translatar en rumantsch las decisiuns pertutgant ils dretgs da persunas rumantschas u almain las regestas da questas decisiuns.*

## Recumandaziun

89. Il Comité consultativ encuraschescha las autoritads federalas da cuntinuar cun lur stentas che procuran ch'ils appartegnents da tut las cuminanzas linguisticas hajan propri i medems dretgs, uschia ch'ils umans possian duvrar vinvant lur atgna lingua en il contact cun l'administraziun federala, e supplitgescha ellas da laschar translatar – tenor lur bainappreziar e suenter avair consultà ils represchentants da las minoritads pertutgadas – en autres linguas naziunalas las decisiuns dal Tribunal federal las pli impurtantas concernent ils dretgs da las persunas che appartegnan a minoritads naziunalas.

*Pertutgant l'emprima part da questa recumandaziun è giustifitgada la rectificaziun ch'il dretg da pudair duvrar l'atgna lingua en il contact cun l'autoritat federala, tenor l'artitgel 6 da la Lescha federala davart las linguas naziunalas, concerna mo ils locuturs da las quatter linguas uffizialas da la Svizra, dentant betg, sco ch'igl ha num en la recumandaziun, ils «appartegnents da tut las cuminanzas linguisticas».*

## Utilisaziun da las linguas minoritaras en il chantun Graubünden/Grischun/Grigioni

90. La Lescha chantunala da linguas<sup>74</sup> ch'è en vigur dapi l'onn 2008, cuntegna disposiziuns davart l'utilisaziun da las trais linguas chantunalias uffizialas, q.v.d. tudestg, rumantsch e talian. Tenor quellas po mintga persuna sa drizzar a las autoritads chantunalias en ina lingua uffiziala da sia tscherna (art. 3 al. 2) e survegnir ina resposta en questa lingua (art. 3 al. 3). En il parlament chantunal pon ils deputads s'exprimer en la lingua uffiziala da lur tscherna (art. 4 al. 1) e pretender la translaziun da documents en ina lingua uffiziala ch'els chapeschan (art. 4 al. 2). A las dretgiras chantunalias pon ils derschaders duvrar per las tractativas a bucca la lingua uffiziala da lur tscherna (art. 7 al. 2), en la procedura en scrit sa drizza la lingua però tenor la lingua uffiziala che vegn duvrada en la decisiun contestada respectivamain da la partida accusada (art. 8), sche las partidas n'hant fixà nagut auter (art. 7 al. 5). Sch'ina partida na sa però betg la lingua uffiziala duvrada, po ella dumandar ina translaziun gratuita (art. 7 al. 4). Sin plaun regiunal<sup>75</sup> vala il suandard: Sch'ina regiun ha mo ina lingua uffiziala, vegn quella duvrada per la procedura, per la tractativa principala e per la decisiun (art. 9). En regiuns plurilinguas percuter pon las partidas fixar ina da sias linguas per la procedura en scrit, entant che la tractativa principala vegn fatga en la lingua che vegn duvrada en la decisiun contestada respectivamain da la partida accusada (art. 10).

91. Il Comité consultativ beneventa l'aut grad da protecziun che las linguas minoritaras (rumantsch e talian) giaudan tenor la lescha chantunala da linguas. Tenor infurmaziuns da represchentants da las minoritads linguisticas existan ultra da quai difficultads tar l'access a documents da l'administraziun chantunala en rumantsch u en talian, numnadaman ad actas da la regenza u a documents da la laver parlamentara, en spezial sche commembers d'ina cumissiun na dovrant betg ina lingua minoritara en la cumissiun e sch'i n'è betg vegnida dumandada ina translaziun en ina da questas linguas. Ultra da quai è il Comité consultativ vegnì infurmà dal fatg ch'i sajan avant maun translaziuns en linguas minoritaras da paginas d'internet d'instituziuns publicas (per exempl d'in ospital) che derivian apparentamain da programs da translaziun online, quai che chaschunia resultats betg cuntentaivels. Intgins interlocuturs dal Comité consultativ han ultra da quai deplorà che campagnas d'infurmaziun, en spezial en la prevenziun da la sanadad u per promover il sport, vegnian fatgas per gronda

<sup>74</sup> Lescha da linguas dal chantun Graubünden/Grischun/Grigioni (DG 492.100) dals 19 d'october 2006.

<sup>75</sup> Il chantun Graubünden/Grischun/Grigioni è dividì en 11 regiuns. En la structuraziun administrativa da la Svizra è la regiun in'unitad che sa chatta tranter il chantun e las vischnancas e che furma en spezial la basa per l'organisaziun giudiziala.

part en la lingua maioritara. Il Comité consultativ è er vegnì infurmà dal fatg che tscherts servetschs d'urgenza na sajan betg accessibels di e notg en las linguas minoritaras. Quai difficulteschia la communicaziun cun persunas en situaziuns d'urgenza.

92. Tenor l'art. 6 da la lescha chantunala da linguas veggan las plazzas en l'administrazione chantunala occupadas da preferenza cun quels candidats che san almain duas linguas chantunalas uffizialas, sch'ils candidats annunziads han las medemas qualificaziuns. Il Comité consultativ beneventa il concept pluriling francà en quest text da lescha, constatescha però a maun d'infurmaziuns da represchentants da la minoritat taliana ch'i na dettia nagins funcziunaris da lingua taliana ni sin ils quatter stgalims da salari suprem da l'administrazione chantunala ni en la giustia chantunala. En quest connex ha il Comité consultativ prendì enconuschientscha d'ina glista da plazzas, che las autoritads chantunala han publitgà ultimamain, ed ha constatà ch'il savair talian n'è vegnì premess en nagina da quellas publicaziuns, mabain resguardà en il meglier cas sco avantatg.

*Il chantun Grischun fa la suandanta rectificaziun: I dat dus derschaders da lingua taliana, e quai in a la Dretgira chantunala ed in a la Dretgira administrativa dal chantun.*

## Recumandaziun

93. Il Comité consultativ appellescha a las autoritads dal chantun Graubünden/Grischun/Grigioni da promover pli fitg l'utilisaziun da las linguas minoritaras en lur lavur quotidiana, tar campagnas d'infurmaziun sco er en l'administrazione ed en la giustia.

## Artitgel 11 da la Convenziun da basa

### Indicaziuns topograficas bilinguas u trilinguas ed ulteriuras tavlas, adressas ed inscripziuns

94. Tenor l'artitgel 49 da l'Ordinaziun dal Cussegli federal davart la signalisaziun da las vias veggan ils numbs da vischnancas u da vitgs scrits sin las tavlas en la lingua uffiziala da la vischnanca correspontenta. En vischnancas bilinguas vegg duvrada la lingua che vegg discurrida da la maioritat dals abitants; però sto vegnir agiuntada ina lingua minoritara, sche la gruppera linguistica pli pitschna cumpiglia almain 30 % dals abitants. En il chantun Graubünden/Grischun/Grigioni ston indicaziuns topograficas vegnir scrittas tenor l'artitgel 8 da l'ordinaziun chantunala da linguas<sup>76</sup> ed independentamain da l'applicaziun da las disposiziuns federalas numnadas qua survant mintgamai en la lingua uffiziala da la vischnanca pertutgada. Il Comité consultativ è vegnì infurmà d'intgins da ses interlocuturs, che vischnancas bilinguas divergeschian en la pratica mintgatant da l'ordinaziun chantunala e dovrian la lingua da la maioritat dals abitants da la part dal vitg respectiv sin tavlas topograficas u per inscripziuns. Perquai possia la lingua entaifer la medema vischnanca esser differenta tut tenor la part dal vitg.

95. Il Comité consultativ beneventa la pussaivladad previsa da la lescha, da scriver sin las tavlas ils numbs dals vitgs en ina lingua minoritara, tira però endament che l'artitgel 11 da la Convenziun da basa valia er per autres indicaziuns topograficas sco tavlas da via. El conferma puspè ses avis, che valurs minimalas en cifras che veggan fixadas sco premissa per applitgar tscherts dretgs da minoritads, stoppian vegnir interpretadas en moda flexibla. Cas cuntrari

<sup>76</sup> Ordinaziun da linguas dal chantun Graubünden/Grischun/Grigioni (DG 492.110) dals 11 da decembre 2007.

fissan las persunas che appartegnan a minoritads naziunalas en dumonda obligadas indirectamain da s'identifitgar, per che l'access a tscherts dretgs restia mantegnì. Il medem mument stoppia la decisiun individuala, sch'ins s'identifitgescha cun ina tscherta minoritad u betg, vegnir respectada d'autras persunas che declaran lur appartegnientscha a la medema gruppera e na dastgan er far nagin squitsch.<sup>77</sup> En quest connex è il Comité consultativ da l'avis ch'il princip territorial tenor la pratica usitada vegnia interpretà en moda stretga e che la quota procentuala determinada per montar tavlas en duas lingua saja nuncunvegnentamain auta.

*Da remartgar èsi en emprima lingia ch'ils chantuns determineschan lur lingua uffizialas (cf. art. 70 al. 2 Cst.) e che la Confederaziun na dastga betg prescriver ad els ed a las vischnancas da promover l'utilisaziun d'indicaziuns topograficas bilinguas u trilinguas. Dentant interpreteschan intginas vischnancas dals chantuns plurilings flexiblamain l'artitgel 49 da l'Ordinazion dal Cussegl federal davart la signalisaziun da las vias. Uschia èn las tavlas da via en la citad da Friburg inscrittas per franzos e per tudestg, schebain che la minoritad tudestga importa mo 21 %. Ultra da quai ha plazzà la citad da Friburg – cun il sustegn finanzial dal chantun – l'onn 2012, al cumenzament da sia staziun, novas tavlas cun l'inscripziun «Fribourg-Freiburg» (ultra da franzos ussa er tudestg). Er en la citad da Murten/Morat en il chantun biling Friburg porta la staziun ussa l'inscripziun «Murten-Morat» sin las tavlas, e quai malgrà ina part da la populaziun da lingua franzosa da 15 %.*

## Recumandaziun

96. Il Comité consultativ appellescha a las autoritads federalas e chantunalas da promover l'utilisaziun d'indicaziuns topograficas bilinguas u trilinguas en ils chantuns ed en las vischnancas bilinguas u trilinguas, en spezial cun extender las pussaivladads legalas per montar talas tavlas en territoris, en ils quals abitan tradiziunalmain persunas che appartegnan a minoritads linguisticas, tegnend quint da las disposiziuns en l'artitgel 11 da la Convenziun da basa.

## Artitgel 12 da la Convenziun da basa

### **Access a la furmaziun per Jenics, Sinti e Manouches ed intermediaziun da lur cultura ed istorgia en l'instrucziun**

97. En il sboz dal plan d'acziun da la Confederaziun<sup>78</sup> (cf. er artitgels 5 e 15) vegni renconuschì ch'il dretg sin furmaziun stoppia esser cumpatibel cun il dretg da pratitgar ina moda da viver nomada. Ma i vegn er rendì attent a la cumpetenza restrenschida da la Confederaziun en il sectur da furmaziun che limitescha ses spazi d'agir sin la finanziaziun da projects da pilot. Ultra da quai vegni renconuschì en il plan d'acziun ch'igl è per las autoritads e per las cuminanzas anc pli difficil en il sectur da furmaziun che en auters secturs da sa cunvegnir davart las mesiras necessarias. Il plan d'acziun tira endament ch'ils viagiants badan anc adina las violaziuns dals dretgs umans, a las qualas els èn stads exposts en il passà (cf. artitgel 5). En quel text vegnan tut ils acturs pertutgads, q.v.d. ils chantuns, las vischnancas, las scolas, ils manaschis d'emprendissadi, ma er las famiglias che han ina moda da viver nomada, intimads da s'occupar cuminaivlamaain da questas sfidas.

*Il rapport ed il sboz dal plan d'acziun da la Confederaziun na cuntegnan nagina infurmaziun «ch'ils viagiants badan anc adina las violaziuns dals dretgs umans, a las qualas els èn stads*

<sup>77</sup> Comité consultativ da la Convenziun da basa, Commentari tematic nr. 4, «La Convenziun da basa: in instrument essenzial per diriger la diversitat cun agid dals dretgs da las minoritads», alinea 12.

<sup>78</sup> Il sboz dal plan d'acziun (stadi intermediar: december 2016) po vegnir consultà sut: <https://www.bak.admin.ch/bak/de/home/sprachen-und-gesellschaft/jenische-und-sinti-als-nationale-minderheit/aktionsplan.html>

*exposts en il passà». En las recumandaziuns da la gruppera da laver, ch'en cuntegnidas en quels, hai plitost num ch'ils represchentants dals Jenics cun ina moda da viver nomada sajan anc adina marcads da las experientschas traumatisantas da l'acziun «Uffants dal stradun» e disfidus envers las purschidas da sustegn statalas a favur da l'educaziun e da la furmaziun da lur uffants.*

98. Il Comité consultativ beneventa il concept da las autoritads da radunar ad ina maisa las persunas e gruppas pertutgadas, tschertgond da fixar ils dretgs en dumonda. A chaschun da sia visita ha el scuntrà numerusas famiglias che han ina moda da viver nomada sco er represchentants dals fatgs da furmaziun. Fitg cler è sa mussà il problem da l'ir a scola, betg mo durant ils mais da stad, mabain e durant l'enviern. En quest connex mussan plirs indicaturs ina mancanza da motivaziun tar ils commembers da las minoritads naziunalas pertutgadas. Quai sveglia l'impressiun ch'els collian la scola plitgunsch cun il privel da vegnir assimiladas che cun la schanza che lur dretgs vegnian protegids. Per il Comité consultativ èsi decisiv da render attent anc ina giada tut las parts participadas a lur dretgs ed a lur obligaziuns, per ch'il dretg sin furmaziun dals uffants saja garantì effectivamain. In pèr projects vegnan gia finanziads da la Confederaziun e realisads sin plau local, per exemplu il project «Lernen unterwegs» en il chantun Bern/Berne. Ina instrucziun classica ed ateliers d'emprender spezials en gruppas pitschnas durant ils mais d'enviern vegnan cumbinads cun ina instrucziun a distanza durant ils mais da stad, en ils quals ils scolars survegnan computers ed in access a l'internet, per ch'els possian avair in contact regular cun persunas d'instrucziun durant temps fixs da 2 uras per emna.

*Las suandardas rectificaziuns ston vegnir fatgas:*

- *Il project «Lernen unterwegs» na vegn betg finanzià da la Confederaziun, mabain dal chantun e da la citad da Berna.*
- *En in auter chantun vegn examinà in project da pilot cumparegliabel cun «Lernen unterwegs».*
- *L'Uffizi da la scola populara da Turitg s'occupa proactivamain da l'instrucziun per uffants da famiglias da viagiants. Las vischnancas dal chantun èn vegnidas infurmadas dal fatg, ch'ils uffants ston vegnir admess immediatamain en las scolas a partir da l'emprim di da lur dimora en il chantun, e quai er mo per ina curta durada. Il champ «pedagogia interculturala» persequitescha attentamain ils svilups pertutgant quest tema e propona mesiras cumplementaras en cas da basegn. Ultra da quai renviescha il chantun Turitg al fatg, ch'i pon vegnir purschidas soluziuns individualas flexiblas en la furmaziun professiunala per giuvenils da famiglias da viagiants sin ses territori. Er il chantun Grischun accentuescha ch'el gidia ad uffants da famiglias da viagiants a frequentar la scola flexiblamain e da princip senza problems.*
- *Il chantun Vad constatescha ch'in giuvenil da la cuminanza dals viagiants possia absolver l'examen federal da maturidad sco candidat liber, sch'i na dat ni in gimnasi mobil ni la pussaivludad d'ina scolaziun gimnasiala mobila (p.ex. online). La maturidad federala è la maturidad che vegn organisada dal Secretariat da stadi per furmaziun, retschertga ed innovaziun (SEFRI). Sin il champ da la furmaziun professiunala ch'è essenzialmain chaussa da la Confederaziun, na datti actualmain naginas purschidas mobilas. Sin basa da l'artitgel 32 da l'Ordinaziun davart la furmaziun professiunala (OFPr) po ina persuna ch'è sur 22 onns e che po cumprovar d'avoir in'expertscha professiunala da 5 onns, ch'ella ha acquistà per exemplu en il rom da sia moda da viver nomada, vegnir admessa a la procedura da qualificaziun dal chantun Vad.*

99. Ultra da quai è il Comité consultativ vegnì infurmà dals represchentants da la cuminanza jenica che la cultura e l'istorgia jenica na sajan betg cuntegnidas en ils plans d'instrucziun ed en ils medis d'instrucziun dals chantuns. Er la gruppera da laver incumbensada

cun l'elavuraziun dal plan d'acziun da la Confederaziun ha punctuà en sia ultima versiun dal text la necessitat da tematisar la cultura jenica.<sup>79</sup> Il Comité consultativ renda en spezial attent al fatg quant impurtant ch'i saja d'integrar l'istorgia da la supressiun e las violaziuns dals dretgs umans da pli baud en ils plans d'instrucziun, per contribuir uschia ad ina meglia chapientscha da l'identitad e da la cultura dals Jenics da vart da la maioritat.

*Betg mo ils represchentants dals Jenics, mabain er quels dals Sinti, Manouches e Roma giavischan che lur istorgia e cultura vegnia integrada en ils plans d'instrucziun ed en ils meds d'instrucziun. Ina da las mesiras da la Confederaziun, ch'è previsa en il futur plan d'acziun, pertutga pia il susteign da projects per concepir las unitads d'instrucziun concernent l'istorgia e la cultura da questas traïs cuminanzas.*

*In tal project è actualmain en la fasa da svilup. Ses resultat vegn ad esser in'ovra d'instrucziun tudestga davart Jenics, Sinti e Roma cun il titel «Jenische, Sinti, Roma – unbekannte Minderheiten in der Schweiz. Ein Lehrmittel». Purtada vegn questa ovra da la «Associaziun dals viagiants» en collavuraziun cun la Chasa editura per meds d'instrucziun dal chantun Turitg. La finamira da l'ovra è quella d'intermediar a scolaras e scolars da la 4. fin la 6. classa enconuschienschas davart l'istorgia da questas minoritads, e quai a maun da las suandardas dumondas: Tgi èn questas persunas? Co vivan e co lavuran ellas e.u.v.? Il project vegn promovì da l'Uffizi federal da cultura (UFC) cun 30 000 francs.*

*Tenor las indicaziuns da plirs chantuns tudestgs dastgass il «Plan d'instrucziun 21» che vegn introduci actualmain sin lur territori (per la scola obligatorica), permetter da tematisar la cultura e l'istorgia dals Jenics, Sinti, Manouches e Roma e d'avischinar quella a las scolaras ed als scolars.*

## Recumandaziun

100. Il Comité consultativ appellescha a las autoritads chantunalas da sviluppar en il sectur da la furmaziun scolastica e professiunala vinavant soluziuns flexiblas ch'en adattadas a persunas che han ina moda da viver nomada e d'involver las famiglias pertutgadas en l'elavuraziun da novs projects per garantir il dretg dals uffants sin furmaziun e per stgaffir cundiziuns che permettan da cumbinar quest dretg cun il dretg sin ina furma da viver nomada. Il Comité consultativ appellescha a las autoritads chantunalas da tut ils chantuns d'integrar la cultura e l'istorgia jenica en ils plans d'instrucziun ed en ils meds d'instrucziun per promover la diversitat e l'integrazion sociala en la populaziun e per rinforzar la conscientia per la furma da viver nomada e sia acceptanza.

*Ultra da la cultura ed istorgia jenica stuess vegnir integrada er quella dals Sinti, Manouches e Roma en ils plans d'instrucziun ed en ils meds d'instrucziun.*

## Artitgel 14 da la Convenziun da basa

### Instrucziun da ed en las linguas minoritaras

101. Lingua d'instrucziun en las scolas primaras e secundaras è la lingua uffiziala dal chantun (cf. er artitgel 12). En ils chantuns bilings u trilings vegn instrui tenor il princip territorial en la lingua uffiziala da la vischnanca. L'administraziun da las scolas è chaussa dals chantuns e vegn per regla ademplida d'ina unitad administrativa subchantunala che cumiglia ina u pliras vischnancas. Sche questa unitad sa cumpona da pliras vischnancas cun differentas linguas uffizialas u da vischnancas bilinguas, sto esser garantì l'access gratuit ad ina scola publica cun

<sup>79</sup> Uffizi federal da cultura, gruppera da lavour «Meglieraziun da las cundiziuns per la moda da viver nomada e promozion da la cultura dals Jenics, Sinti e Roma», rapport e plan d'acziun, punct 3.4.3.

instrucziun en tuttas duas linguas. Sco alternativa pon las autoritads permetter ad ina scolaria u ad in scolar da frequentar per motivs linguistics ina scola ordaifer il territori administrativ da ses lieu da domicil. Sin il stgalim secundar II na vegn betg adina purschida l'instrucziun en las linguas minoritaras. Quai vala per exemplu per il talian en il chantun Graubünden/Grischun/Grigioni, er sch'il talian è ina da las trais linguas uffizialas dal chantun. Il Comité consultativ fa endament che, per sviluppar enconuschienschas en linguas minoritaras che porschan in avantatg tant per quels che discurran ellas sco er per la societad en general, ston las linguas minoritaras vegnir instruidas ed emprendidas cuntuadament sin tut ils stgalims da furmaziun, da la scola preliminara fin a la scola auta ed a la furmaziun da persunas creschidas.<sup>80</sup>

102. La Cunvegna interchantunala davart l'armonisaziun da la scola obligatorica («Concordat HarmoS») è entrada en vigur l'onn 2009. Fin ussa èn sa participads 21 dals 26 chantuns. La finamira è quella d'armonisar l'instruir e l'emprender ina lingua cun sviluppar ina furmaziun generala fundada en la lingua locala e cumpetenzas fundamentalas en duas «linguas estras». Tenor l'artigel 4 vegn l'emprima «lingua estra» instruida il pli tard a partir dal 5. onn da scola, la seconda a partir dal 7. onn da scola. Ina da las duas «linguas estras» sto esser ina lingua naziunala, l'autra englais, e l'instrucziun da quellas includa aspects culturals. Il chantun Tessin prevesa l'acquist d'ina terza «lingua estra» obligatorica che sto esser ina lingua naziunala, e po perquai deviar da las disposiziuns areguard ils onns da scola, en ils quals las emprimas duas «linguas estras» ston vegnir instruidas. En ils ulteriurs chantuns ch'en sa participads al Concordat HarmoS vegn purschida durant la scola obligatorica (che cumenza cun 4 onns e che dura 11 onns) l'instrucziun facultativa en ina terza lingua naziunala. La successiun da las «linguas estras» instruidas vegn coordinada sin plaun regional, però vegnan fixadas caracteristicas da qualitat e da svilup che correspundan a la strategia generala persequitada sin plaun naziunala (q.v.d. interchantunala).

103. Il Comité consultativ prenda enconuschienschas d'iniziativas parlamentaras che vulan garantir l'instrucziun en ina segunda lingua naziunala sin il stgalim primar. Ultra da quai constatescha el ch'il Cussegl federal ha fatg l'onn 2016 ina consultaziun tar il sboz d'ina revisiun da la Lescha federala davart las linguas naziunalas che preveseva ina segunda lingua naziunala sco rom obligatoric sin il stgalim primar. Uschia duai vegnir permess ad uffants che appartegnan a minoritads naziunalas, d'acquistar lur lingua en la scola primara, er sch'els vivan ordaifer territoris populads tradiziunalmain da commembers da lur minoritad. Il Cussegl federal ha dentant sistì la procedura, perquai ch'el era da l'avis ch'il mument na saja betg adattà.

*I sto vegnir rectifitgà che tras il sboz d'ina revisiun da la Lescha federala davart las linguas naziunalas na duessi betg vegnir permess «ad uffants che appartegnan a minoritads naziunalas, d'acquistar lur lingua en la scola primara», «sch'els vivan ordaifer territoris populads tradiziunalmain da commembers da lur minoritad». Il Cussegl federal ha sistì questa procedura cun la motivazion che fin ussa n'è nagin chantun divergià dal model da l'instrucziun en las linguas naziunalas en la scola primara (cf. en quest connex il commentari tar cifra 105 qua sutvart).*

104. Plinavant prenda il Comité consultativ enconuschienschas da l'intenziun dal Cussegl federal formulada en la Missiva davart la cultura 2016–2020, da promover la lingua e cultura taliana ordaifer il chantun Tessin ed ordaifer ils territoris italofons dal chantun Graubünden/Grischun/Grigioni e d'estender questas activitads a partir da l'onn 2021 sin il rumantsch. La mesasad da las persunas da lingua taliana ed in terz dals Rumantschs<sup>81</sup> vivan ordaifer ils chantuns populads tradiziunalmain da persunas da questas gruppas linguisticas

<sup>80</sup> Comité consultativ per la Convenziun da basa, commentari tematic nr. 3, «Ils dretgs da la lingua da persunas che tutgan tar minoritads naziunalas, a norma da la Convenziun da basa», 2012, alinea 75.

<sup>81</sup> Uffizi federal da statistica, «Populaziun permanenta tenor linguas principalas e chantun, 2016», da consultar sut: <https://www.bfs.admin.ch/bfs/de/home/statistiken/bevoelkerung/sprachen-religionen/sprachen.assetdetail.4542302.html>

(q.v.d. Tessin e Graubünden/Grischun/Grigioni per personas da lingua taliana e Graubünden/Grischun/Grigioni per Rumantschs), particularmain en las grondas citads. Il Comité consultativ menziunescha en quest connex ch'igl è veginida fundada cun la Lescha federala dal 1981 ina scola franzosa chantunala a Bern/Berne.<sup>82</sup> Sco che las autoritads svizras san bain na po perquai in'avischinaziun puramain territoriala als dretgs da minoritads betg tegnair quint adequatamain dals basegns da las personas che appartegnan a minoritads en ina societad moderna, dinamica e mobila. En quest regard beneventa il Comité consultativ las stentas da las autoritads da s'arranschar cun las midadas socialas e da promover ils dretgs da las minoritads linguísticas ordaifer lur territoris d'abitadi tradiziunals, particularmain cun la Missiva davart la cultura.

*Il chantun Grischun constatescha che per el èsi ina pratica usitada da sostegnair l'instrucziun da rumantsch e talian ordaifer ils territoris populads tradiziunalmain da locuturs da questas duas linguas. Uschia hai num en l'artitgel 20 alinea 2 da la Lescha da linguas dal chantun Grischun: «En vischnancas plurilinguas ed en vischnancas tudestgas po la Regenza – sin dumonda da la vischnanca – permetter da manar ina scola populara bilingua en l'interess da mantegnair la lingua tradiziunala.» Ultra da quai tgira l'Uffizi per la furmaziun media-superiura dal chantun Grischun in dialog permanent cun las federaziuns da tett per la protecziun da las linguas minoritaras, la Lia Rumantscha e la Pro Grigioni Italiano.*

*Plirs chantuns, sco Turitg, Argovia, Basilea-Citad, inditgeschan ch'i na saja betg avant maun ina dumonda da sostegn per curs da la lingua e da la cultura da la patria (CLP) per rumantsch – cuntrari a per talian. Il chantun Turgovia menziunescha che pliras da sias vischnancas organiseschian in barat cun scolaras e scolars da lingua rumantscha.*

*Plirs chantuns ordaifer ils territoris populads tradiziunalmain da locuturs talians, porschan ina instrucziun da talian sin il stgalim secundar I u II. Quai è il cas en ils chantuns Argovia e Turitg, nua ch'ins po obtegnair ultra da quai la maturidad federala bilingua cun talian al «Liceo Artistico». Er il chantun Turgovia porscha la pussavladad da far ina maturidad federala bilingua (tudestg/talian). En ils chantuns Son Gagl, Basilea-Citad ed Appenzell Dadens vegn per exemplu instruì talian sin il stgalim secundar I sco rom d'elecziun e sin il stgalim secundar II sco rom fundamental, quai en il rom da la purschida da roms d'elecziun obligatorics.*

*Pertugant il sustegn da la lingua taliana vegnan promovids – correspondentamain a la Missiva davart la cultura 2016–2020 – en emprima lingia projects da furmaziun e d'instrucziun, particularmain per rinforzar las mesiras da sensibilisaziun ed ils projects da cultura en las scolas sco er per sviluppar materialias didacticas per talian e las scolaziuns da las maturitads bilinguas cun talian. Il UFC ha sustegnì durant ils onns 2016 e 2017 tut en tut 12 projects cun in import total dad 1 145 000 francs. A partir da l'onn 2020 èn planisadas mesiras per promover il rumantsch ordaifer il territori linguistic respectiv (particularmain en las regiuns tudestgas e talianas dal chantun Grischun ed en las citads svizras da la diaspora rumantscha). Questas mesiras vegnan examinadas actualmain. Ellas pertugan spezialmain l'instrucziun, cunzunt la meglieraziun da las cundiziuns d'instrucziun e la creaziun d'ina nova purschida d'instrucziun en lingua rumantscha per uffants da la vegliadetgna prescolara e scolara.*

105. Il Comité consultativ fa attent ad ina retscha da novas iniziativas dal pievel che han la finamira da limitar il dumber da linguas obligatoricas sin il stgalim primar, sco per exemplu l'iniziativa «Mo ina lingua estra en la scola primara» en il chantun Graubünden/Grischun/Grigioni. Tenor quella duai vegnir emprendida obligatoricamain en la scola primara mo ina suletta «lingua estra», numnadamain englais en las vischnancas

<sup>82</sup> cf. Lescha federala davart contribuziuns per la scola chantunala franzosa a Berna (CS 411.3), da consultar sut: <https://www.admin.ch/opc/de/classified-compilation/19810127/index.html>

tudestgas dal chantun e tudestg en las vischnancas talianas u rumantschas. Tras ina sentenzia dal Tribunal federal<sup>83</sup> è questa iniziativa veginida declarada sco valaivla, perquai ch'ella corrispunda al dretg chantunal. Il Comité consultativ è dentant anc adina preoccupà che intginas persunas che appartegnan a minoritads naziunalas pudessan uschia veginir privadas da la pussaivladad d'emprender lur lingua en la scola primara. Las autoritads federalas persequiteschan attentamain ils svilups en quest sectur e promovan vinavant la plurilinguitad, particolarmain tras agids finanzials voluminus per programs da barat.<sup>84</sup>

*Ils 23 da settember 2018 è l'iniziativa chantunala dal pievel «Mo ina lingua estra en la scola primara» veginida refusada en il chantun Grischun. Cun ina part da las vuschs negativas da 65,19 % è il votum da las burgaisas e dals burgais stà cler.*

*Uschia han fin ussa fatg naufragi – en votaziuns dal pievel u en votaziuns en parlaments chantunals – tut las emprovas da reducir l'instrucziun linguistica en la scola primara da duas linguis estras mo ad ina.*

#### Recumandaziuns

106. Il Comité consultativ animescha las autoritads federalas e chantunals da possibilizar l'instrucziun da ed en talian e rumantsch ordaifer ils territoris d'abitadi tradiziunals da persunas che appartegnan a questas minoritads linguisticas, particolarmain en las citads grondas. Il Comité consultativ appellescha a las autoritads dal chantun Graubünden/Grischun/Grigioni da tschertgar il dialog cun las represchentantas ed ils represchentants da las minoritads pertutgadas e d'identifitgar il basegn da las persunas da lingua rumantscha e taliana per l'instrucziun da scola secundara (stgalim secundar II) en lur lingua.

107. Il Comité consultativ appellescha a las autoritads da la Confederaziun e dals chantuns da ponderar ulteriuras activitads per sensibilisar per ils dretgs da la lingua da persunas che appartegnan a las minoritads naziunalas en las administraziuns chantunals dals chantuns bilings e trilings, er tar represchentants da la giustia.

*En connex cun questa recumandaziun sto veginir menziunà in svilup positiv en il chantun biling Friburg (franzos/tudestg): Il settember 2018 ha il parlament chantunal acceptà in postulat che incumbensescha la Regenza (executiva) da promover il «sigil da qualitat per la bilinguitad» en l'administraziun chantunala. La finamira da quest sigil è quella da sviluppar vinavant las mesiras ch'en già veginidas prendidas (en spezial curs da lingua), per dar la pussaivladad a las Friburgaisas ed als Friburgais da communitygar cun las autoritads en la lingua uffiziala da lur tscherna. Ultra da quai ha la citad da Friburg (chapitala chantunala) concludì l'october 2018 da nominar ina Cumissiun permanenta per la bilinguitad, che duai proponer mesiras cun la finamira da promover cunzunt l'engaschament da persunas bilinguas en l'administraziun communal e d'encuraschar il persunal municipal da meglierar sias enconuschienschas da la lingua partenaria.*

#### Material d'instrucziun per las linguas minoritaras ed en las linguas minoritaras

108. Tenor l'artitgel 15 da la Lescha federala davart las linguas naziunalas procuran la Confederaziun ed ils chantuns – en il rom da lur cumpetenza – che la lingua d'instrucziun, numnadamain en sia furma da standard, veginia settamessa ad ina tgira speziala sin tut ils stgalims da l'instrucziun (art. 15 al. 1). En il rom da lur cumpetenza promovan els plinavant la

<sup>83</sup> Tribunal federal svizzer, 1C\_267/2016, sentenzia dals 3 da matg 2017.

<sup>84</sup> Rapport statal, alinea 137.

plurilinguitad da las persunas ch'emprendan e da las persunas che instrueschan (art. 15 al. 2) e per ina instrucziun da linguas estras che garantescha che las scolaras ed ils scolars disponan a la fin dal temp da scola obligatoric da cumpetenzas en almain ina segunda lingua naziunala ed en in'ulteriura lingua estra. L'instrucziun en las linguas naziunalas tegna quint dals aspects culturals d'in pajais pluriling (art. 15 al. 3). En Svizra vegnan ils plans d'instrucziun per il stgalim primar e secundar elavurads da las autoritads chantunlas. Sch'ils chantuns n'en betg en cas da coordinar tranter auter l'armonisaziun da la durada e da las finamiras dals differents stgalims dal plan d'instrucziun sco er da la renconuschientscha dals diploms, po la Confederaziun decretar las prescripziuns necessarias.<sup>85</sup>

109. Intginas represchentantas ed intgins represchentants da la minoritad taliana deploreschan ch'il chantun Graubünden/Grischun/Grigioni investescha pauc en la translaziun da materialias d'instrucziun en talian. Questas materialias oriundamain concepidas per scolars da lingua tudestga, ston vegnir translatadas ed adattadas a la realitat dals uffants da lingua taliana, quai che premetta tant abilitads linguisticas sco er pedagogicas. Las represchentantas ed ils represchentants da la minoritad taliana han renvià al fatg che las materialias d'instrucziun sviluppadas en il chantun Tessin n'en betg adina adattadas per il chantun Graubünden/Grischun/Grigioni, quai pervia da las differenzas tranter ils plans d'instrucziun dals dus chantuns.

110. En quest connex fa il Comité consultativ endament sia constatazjuni anteriura: «Damai ch'igl è impurtant ch'il cuntegn ed il diever da la lingua sajan adattads als basegns concrets da las gruppas da minoritads pertutgadas, tranter auter en vista a la terminologia concreta da roms tecnics en las linguas minoritaras, duess il material che vegr producì en Svizra avair la precedenza. Las materialias che vegnan elavuradas en stadis vischins, pon medemamain vegnir admessas e messas a disposiziun, sch'ellas èn adattadas.»<sup>86</sup> Il Comité consultativ agiunta che las materialias d'instrucziun da lingua taliana che vegnan duvradas en il chantun Graubünden/Grischun/Grigioni, vegnan per regla translatadas dal tudestg per observar il plan d'instrucziun dal chantun, quai pervia da l'organisaziun dal sistem da scola svizzer. Quai sto vegnir finanzià correspudentamain.

*Il chantun Grischun renviescha a sia intenziun da sa stentar vinavant per metter a disposiziun medis finanzials per translatar materialias d'instrucziun en rumantsch ed en talian. La prioridad ha la translaziun da materialias d'instrucziun tudestgas ch'en vegnidias adattadas al «Plan d'instrucziun 21».*

#### Recumandaziun

111. Il Comité consultativ appellescha a las autoritads dal chantun Graubünden/Grischun/Grigioni da seguir la finanziaziun necessaria per la translaziun u per l'elavuraziun da medis d'instrucziun e d'emprender en lingua taliana.

### **Artitgel 15 da la Convenziun da basa**

#### **Represchentanza e collavuraziun da minoritads en las instituziuns ed administraziuns**

112. En vista a la represchentanza ed a la participaziun politica n'han persunas che appartegnan a las minoritads naziunalas en Svizra nagins dretgs politics spezials, per exempl ina represchentanza garantida en tscherts gremis, ina deliberaziun da clausulas da bloccada, sezs garantids per els u il dretg da veto. Sco burgaisas svizras e burgais svizzers han ellas ils dretgs constituziunals, particularmain il dretg da sa participar a las elecziuns per il parlament, il dretg d'inoltrar petiziuns a las autoritads (art. 33 Cst.) sco er il dretg da fundar ina partida

<sup>85</sup> cf. artitgel 62 alinea 4 da la Constituziun federala svizra.

<sup>86</sup> Comité consultativ per la Convenziun da basa, commentari tematic nr. 3, «Ils dretgs da la lingua da persunas che tutgan tar minoritads naziunalas, a norma da la Convenziun da basa», 2012, alinea 77.

politica, da sa participar u d'appartegnair ad ina tala (art. 23 Cst.). Il Comité consultativ constatescha ch'ellas han ultra da quai la pussaivladad da s'engaschar tar ils parlamentaris per che quels defendian lur interess e da sa participar a consultaziuns publicas che las autoritads federalas realiseschan durant la fasa preliminara da proceduras legislativas da la Confederaziun.

*Las suandardas precisaziuns pon vegnir fatgas:*

*Tenor la Constituziun (art. 52) dal chantun biling Vallais (franzos/tudestg) sto vegnir nominà – en connex cun l'elecziun da la Regenza (pußanza executiva ed administrativa) – in dals tschintg commembers or dal gremi dals electurs dals districts tudestgs.*

*En il chantun biling Berna (tudestg/franzos) garantescha la Constituziun chantunala (art. 84) in dals set sezs en la Regenza ad in votant franzos. Ultra da quai defenda la «Deputaziun» ch'exista en il chantun e che sa cumpona dals commembers dal Cussegl grond (parlament chantunal) dal Giura bernais e dals deputads franzos dal circul electoral Bienna-Seeland, ils interess da la populaziun dal Giura bernais e da la populaziun franzosa dal circul electoral Bienna-Seeland en dumondas che pertutgan spezialmain questas populaziuns. La Deputaziun po pretender ina votaziun separada pertutgant conclus davart questas dumondas. Sch'il resultat da questa votaziun na s'accorda betg cun il conclus dal Cussegl grond, vegn la fatschenta returnada a l'organ cumpetent per l'examinar anc ina giada.*

113. Per la cumposiziun dal Cussegl federal na datti nagina regulaziun da las quotas. Actualmain fan part dal Cussegl federal quatter persunas da lingua tudestga, duas da lingua franzosa ed ina da lingua taliana. Istoricamain han las commembras ed ils commembers da lingua franzosa u da lingua taliana adina già almain dus sezs. L'onn 2013 èsi vegnì proponì – en il rom d'ina iniziativa parlamentara<sup>87</sup> – da midar la constituziun<sup>88</sup> e d'augmentar il dumber da commembers dal Cussegl federal da set a nov per garantir ina «represchentanza adequata» da las «regiuns dal pajais e cuminanzas linguisticas» en il Cussegl federal. Il Cussegl federal ha refusà l'iniziativa, cunzunt pervia da la proposta d'augmentar il dumber da commembers, ha dentant beneventà il princip da la represchentanza adequata da las regiuns dal pajais e da las cuminanzas linguisticas.

114. Schebain ch'i na dat betg in organ consultativ spezialmain per la represchentanza da minoritads naziunalas, pon ils Jenics, Sinti e Manouches far valair lur interess en differentas instituziuns da la Confederaziun u en gremis e forums federals, sco per exempla la fundaziun «In futur per ils viagiants svizzers», la Cumissiun federala cunter il rassissem, la gruppa da lavur «per meglierar las condizioni per la moda da viver nomada e per promover la cultura dals Jenics, Sinti e Roma» (cf. artitgel 5) ed il post svizzer da la Allianza internaziunala en memoria da Holocaust. En quest connex è vegnida midada la disposiziun davart la nominaziun da la Cumissiun federala cunter il rassissem dal Cussegl federal il novembre 2015 e stgaffi in sez supplementar per ina represchentanta u in represchentant dals Roma. Il cussegl da fundaziun dad «In futur per ils viagiants svizzers» è occupà dapi l'onn 2017 en moda paritetica cun sis represchentantas e represchentants da las autoritads e sis represchentantas e represchentants da las minoritads dals Jenics, Sinti e Manouches. Il Comité consultativ constatescha plinavant che la gruppa da lavur incumbensada da las autoritads federalas per elavurar il plan d'acziun da la Confederaziun aveva tuttina bleras represchentantas e represchentants da las organisaziuns da las minoritads sco da la regenza.

115. Il Comité consultativ fa endament che l'artitgel 15 da la Convenziun da basa prevesa che las persunas che appartegnan a minoritads naziunalas possian sa participar en moda

<sup>87</sup> Iniziativa parlamentara 13.443, «Represchentanza adequata da las cuminanzas linguisticas en in Cussegl federal cun nov commembers e commembers», da consultar sut: <https://www.parlament.ch/de/ratsbetrieb/suche-curia-vista/geschaeft?AffairId=20130443>

<sup>88</sup> Dapi l'onn 1999 vala tenor l'artitgel 175 alinea 4 da la Constituziun federala svizra, che «las regiuns dal pajais e las regiuns linguisticas vegnian represchentadas adequatamain [en il Cussegl federal]».

efficacia a la vita culturala, sociala ed economica ed a fatschentas publicas. Areguard la participaziun a fatschentas publicas ha il Comité consultativ gia explitgà che persunas che appartegnan a minoritads naziunalas pon vegnir integradas differentamain, per exemplu sco represchentantas en corporaziuns publicas e sin tut ils plauns da l'administratiun, tras mecanissem consultativs u tras cunvegnas da l'autonomia culturala.<sup>89</sup> In'attenziun speziala duess vegnir dada a la represchentanza equilibrada da dunnas ed umens che appartegnan a minoritads naziunalas. La participaziun efficacia a la vita sociala ed economica, uschia ha argumentà il Comité consultativ, pretenda ch'ils stadis allontaneschian ils obstachels che impedeschian che las persunas che appartegnan a minoritads han in access equivalent als secturs economics ed als servetschs socials per stgaffir uschia l'egalitat da las schanzas, ma er ch'els promovian lur participaziun cun furnir prestaziuns e resultats.<sup>90</sup>

116. Il Comité consultativ prenda enconuschentscha da la buna pratica en il chantun Argovia, nua ch'igl è vegnida installada sin plaun chantunal ina structura da consultaziun per Jenics, Sinti e Manouches viagiants. Quella cumpiglia in post spezialisà cun funcziun da mediaziun tranter las persunas pertutgadas ed ils gestiunaris da las pazzas da staziunament, da passagi e da transit. Il Comité consultativ constatescha però che las organisaziuns dals Jenics, Sinti e Manouches n'hant en general nagina influenza sin process politics u legislativs, particolarmain sin plaun chantunal, e deplorescha ch'i na dat sin nadin plaun, inclusiv plaun interchantunal, in mecanissem da consultaziun permanent u organs consultativs che pudessan facilitar il svilup d'ina proposta integrada per problematicas specificas da persunas che appartegnan a minoritads naziunalas.

*In'ulteriura buna pratica exista en il chantun Tessin: Qua è vegnì instituì in post spezialisà cun ina mediatura culturala che tracta las differentas dumondas en connex cun ils viagiants, saja quai sco intermediatura u per sensibilisar la populaziun.*

*La fundaziun «In Futur per ils viagiants svizzers» constatescha che la participaziun dals Jenics, Sinti e Manouches a fatschentas ch'als pertutgan concretamain duess sa manifestar en lur dretg – ed en il dretg da la fundaziun – da protestar cunter proceduras concernent la revisiun da plans d'utilisaziun. Quai n'è betg adina il cas.*

117. Da la Lescha federala davart las linguas naziunalas resulta ina politica federala cun la quala duai vegnir cuntanschida ina represchentanza proporziunala da las cuminanzas linguisticas en l'administratiun federala. Quella è anc adina caracterisada tras ina surrepreschentanza leva, però degressiva dals pledaders dal tudestg che correspundan a 70,9 % dal personal. La valur da finamira tenor l'artitgel 7 da l'ordinaziun da linguas importa 68,5–70,5 %. Pledaders da la lingua franzosa e taliana èn 21,7 % resp. 7,1 % dal personal federal, quai che correspunda ad ina valur plitgunsch bassa entaifer la dimensiun da las valurs da finamira respectivas (21,5–23,5 % resp. 6,5–8,5 %). Ils pledaders dal Rumantsch èn vinavant sutrepreschentads cun 0,3 % dal personal federal. La valur da finamira è qua 0,5–1 %. Il Comité consultativ constatescha ch'igl è pussaivel – sche la tendenza cuntascher – da cuntanscher ils proxims onns tut las valurs da finamira, cun excepcziun da quellas per la cuminanza rumantscha, da la quala la quota n'è betg sa midada dapi l'onn 2013.

118. Il dumber da persunas che sa participeschuan als curs da lingua da l'Uffizi federal da personal crescha: L'onn 2014 han 2854 persunas absolviù curs da preschentscha e curs online; l'onn 2016 eran quai 5752 persunas. 39 % da quellas han frequentà in curs da franzos, 23 % in curs da tudestg, 20 % in curs da talian e 18 % in curs d'englais. La politica d'engaschament sin plaun federal sa basa sin il princip da la plurilinguitad. Las descripcziuns da las pazzas che na correspundevan betg a quest princip ha il parlament examinà detagliadament e midà en cas da

<sup>89</sup> Comité consultativ per la Convenziun da basa, commentari tematic nr. 2, «La participaziun efficacia da persunas che appartegnan a minoritads naziunalas a la vita culturala, sociala ed economica ed a fatschentas publicas» (2008), p. 7.

<sup>90</sup> Comité consultativ per la Convenziun da basa, commentari tematic nr. 2, «La participaziun efficacia da persunas che appartegnan a minoritads naziunalas a la vita culturala, sociala ed economica ed a fatschentas publicas» (2008), p. 4.

basegn. La delegada federala per la plurilinguitad ha survegnì l'onn 2014 ulteriuras cumpetenzas; ella ha ussa dapli autonomia e po pronunziar recumandaziuns. Ultra da quai ha l'Uffizi federal da cultura fatg contracts da servetsch da 4 onns cun mintga chantun biling e triling (Bern/Berne, Freiburg/Fribourg, Valais/Wallis e Graubünden/Grischun/Grigioni) per als sustegnair en lur stentas per ina meglra cumpetenza linguistica dal persunal da lur administraziun chantunala e per finanziar translaziuns.

*L'Uffizi federal da cultura (UFC) n'ha betg fatg contracts da servetsch cun ils chantuns Berna, Friburg, Vallais e Grischun, mabain cunvegnas da program, per als gidar ad ademplir lur incumbensas spezialas en connex cun lur plurilinguitad. Sustegnida duai vegnir er la promoziun dal barat tranter las regiuns linguisticas.*

119. Dapi l'onn 2014 èn naschidas novas organisaziuns dals Jenics, Sinti e Manouches che represchentan puncts da vista multifars da questas cuminanzas: Intginas defendan ils dretgs dals Jenics, Sinti e Manouches en general, autres percuter s'occupan spezialmain da la protecziun dals dretgs da persunas cun ina furma da viver nomada u mez nomada, da la sensibilisaziun da la publicitat per l'istorgia jenica u da la promoziun da las culturas jenicas. Questas organisaziuns sco er las persunas ch'ellas represchentan, raquintan da difficultads cronicas ch'ellas han, sch'ellas emprovan da contactar las autoritads cumpetentas sin plaun chantunal u local en dumondas sco la furmaziun u en fatgs socioeconomics. Er tras las novas midadas da la Lescha federala davart il commerzi ambulant (cf. artitgel 5) pudess vegnir engreviada la participaziun da persunas che appartegnan a las cuminanzas dals Jenics, Sinti e Manouches.

#### Recumandaziuns

120. Il Comité consultativ appellescha a las autoritads da la Confederaziun e dals chantuns d'examinar – en encleigentscha cun las represchentantas ed ils represchentants da las minoritads che reflecteschan la diversitat entaifer lur cuminanzas – pussaivladads per ina meglra participaziun da persunas che appartegnan a minoritads naziunalas a la vita publica, per che quellas possian cooperar als process da decisiun tant sin plaun federal sco er sin plaun chantunal ed interchantunal, per exemplu tras mecanissembs permanents, organs consultativs u quotas en l'administraziun publica.

*Las autoritads communalas s'occupan medemamain da la dumonda d'ina meglra participaziun da persunas che appartegnan a minoritads naziunalas, en spezial ils viagiants, a la vita publica.*

*L'exempel da las «quotas en l'administraziun publica» sto vegnir precisà sco suonda: La Svizra na rinforza la represchentanza da las minoritads da princip betg tras quotas. Uschia na prevesa l'Ordinaziun federala da linguas, sco ch'igl è vegnì explitgà qua survart sut cifra 61, naganas quotas per la represchentanza da las cuminanzas linguisticas uffizialas en l'administraziun federala, mabain valurs da finamira.*

121. Il Comité consultativ encuraschescha las autoritads federalas da cuntinuar cun lur stentas per promover la diversitat e per rinforzar la plurilinguitad sin plaun federal e da sa dar anc pli gronda bregia en spezial per augmentar la quota d'emploiadas e d'emploiads federrals rumantschs.

#### Artitgel 16 da la Convenziun da basa

##### Refurma dal territori e da l'administraziun

122. L'onn 2014 han las vischnancas da Castrisch, Duin, Glion, Ladir, Luven, Pigniu, Pitasch, Riein, Rueun, Ruschein, Schnaus, Sevgein e Siat (en il chantun Grischun) concludì la fusiu ad ina nova vischnanca cun il num Glion. Glion era la suletta vischnanca tudestga, tut

las autres vischnancas eran percuter rumantschas. Damai ch'il dumber da pledaders dal rumantsch en la nova vischnanca è creschi sur 40 % cun la fusiun, avess ella stuì valair sco «vischnanca rumantscha» en il senn da la lescha da linguas dal chantun Grischun. Per gudagnar ils pledaders dal tudestg per la fusiun, è vegnì chattà in cumpromiss: La nova vischnanca renconuscha uffizialmain duas linguas, il tudestg ed il rumantsch. Il diever dal rumantsch en l'administraziun ed en las scolas è garantì, ed a Glion datti ina scola bilingua. Il Comité consultativ constatescha che la vischnanca è er vinavant separada praticamain en duas parts (cf. er artitgel 11): Il center da la citad (Glion) è vinavant tudestg. Las parts vischinas da la citad percuter èn anc adina rumantschas, ed il rumantsch è vinavant la lingua d'instrucziun en las scolas primaras là.

#### Recumandaziun

123. Il Comité consultativ appellescha a las autoritads chantunalas dals chantuns bilings e trilings, da garantir che las represchentantas ed ils represchentants da tut las cuminanzas veggian tadtads er en cas d'ina fusiun d'unitads administrativas, e ch'ils dretgs da las personas che appartegnan a minoritads linguisticas na veggian betg restrenschids pervia da la reforma dal territori e da l'administraziun. El pretenda da las autoritads chantunalas e communalas da promover e da proteger – en cas da basegn ed en encleigentscha cun las represchentantas ed ils represchentants da questas cuminanzas – la plurilinguitad en tut il territori da las novas unitads plurilinguas.

#### Artitgel 18 da la Convenziun da basa

##### Collavuraziun tranter la Svizra e l'Italia

124. Il Cussegl federal svizzer e la Regenza da l'Italia han suttascrit l'onn 1982 e confermà l'onn 1986 in protocol per la nominaziun d'ina «Cumissiun culturala consultativa italo-svizra» (*Commissione culturale consultiva italo-svizzera*, er numnada «Consulta») per promover il barat cultural e las relaziuns culturalas tranter ils dus pajais sin plau naziunal e regional, en spezial tranter ils chantuns svizzers italofons Tessin e Graubünden/Grischun/Grigioni d'ina vart e las regiuns vischinas da l'Italia da l'autra vart. A chaschun da lur ultima sesida il settember 2017 è la cumissiun s'occupada da l'instruir e da l'emprender la lingua taliana. En quest connex èsi vegnì fixà da promover vinavant la creaziun da scolas bilinguas (inclusiv il talian). Ina gruppa da lavur incumbensada apostea duai canticuar cun la lavur vi da questas tematicas. Il Comité consultativ è vegnì infurmà d'intgins interlocuturs, ch'ils resultats da questas consultaziuns na sajan strusch enconuschents a las vischnancas pertutgadas.

#### Recumandaziun

125. Il Comité consultativ encuraschescha las autoritads federalas da promover vinavant ils dretgs da las minoritads talianas, en spezial cun mantegnair la collavuraziun tranter la Svizra e l'Italia, e da garantir che las personas che appartegnan a las cuminanzas pertutgadas veggian consultadas ed infurmadas.

*Questa collavuraziun tranter la Svizra e l'Italia n'ha betg la finamira da «promover ... ils dretgs da las minoritads talianas». Anzi, i sa tracta da promover projects da cultura, en spezial d'intermediar la lingua e cultura taliana a las scolas svizras.*

### III. Remartgas finalas

126. Il Comité consultativ è da l'avis che las suandardas conclusiuns e recumandaziuns pudessan servir sco basa per la proxima Resoluziun dal Comité dals ministers pertutgant la realisaziun da la Convenziun da basa tras la Svizra.

127. Las autoritads vegnan supplitgadas da resguardar las remartgas e las recumandaziuns detagliadas en las parts I e II dal quart Parairi dal Comité consultativ<sup>91</sup>. Per meglierar la realisaziun da la Convenziun da basa ston vegnir prendidas tranter auter las suandardas mesiras.

#### Recumandaziuns per in agir immediat<sup>92</sup>

- Las autoritads federalas ston infurmar la populaziun pli e pli davart il dretg vertent per cumbatter cunter la discriminaziun e ston prender puspè en consideraziun ina legislaziun generala federala cunter la discriminaziun; facilitar l'access a la giustia per personas che appartegnan a las minoritads naziunalas, ch'en daventadas victimas da discriminaziuns, particularmain cun autorisar organisaziuns nungovernmentalas d'agir en l'interess general e da defender ils dretgs ed ils interess da las victimas; stgaffir uschè baud sco pussaivel ina instituziun dals dretgs umans en il senn dals Princips da Paris, ch'e' independenta instituzionalmain e finanzialmain, da la quala il mandat e l'abilitad d'agir per promover e per proteger ils dretgs umans èn plainamain garantids; crear posts da mediaziun («persuna da mediaziun instituziuns») sin plaun federal e chantunal.

*Pertutgant la dumonda d'ina Lescha federala cumplexiva cunter la discriminaziun vegni renvià a la resalva en cifra 39.*

*Pertutgant la legitimaziun da far recurs d'organisaziuns nungovernmentalas vegni renvià a las rectificaziuns en cifra 67.*

*Pertutgant l'endrizzar ina instituziun naziunala dals dretgs umans vegni renvià a l'actualisaziun en cifra 38.*

*Pertutgant l'endrizzar posts da mediaziun vegni renvià a las rectificaziuns en cifra 38.*

- En il rom da proceduras accessiblas, imparzialas e transparentas: sustegnair finanzialmain projects che mantegnan e promovan l'identitat e la cultura da personas cun ina moda da viver nomada; conceder a la fundaziun «In futur per ils viagiants svizzers» meds finanzials e persunals sufficients, per ch'ella possia ademplir sias incumbensas e cuntanscher las cuminanzas pertutgadas; deliberar uschè baud sco pussaivel il sboz dal plan d'acziun federal per promover Jenics, Sinti e Manouches e realisar svelt las mesiras ch'en cuntegnidas en quel; sensibilisar la populaziun per la moda da viver nomada; stgaffir avunda plazzas da staziunament e da transit entaifer il termin ch'e' previs en il sboz dal plan d'acziun.

*Pertutgant il plan d'acziun «Jenics, Sinti e Roma» vegni renvià a l'actualisaziun en cifra 54.*

- Sentenziar sistematicamain ed immediatamain tut las furmas d'intoleranza, particularmain quellas manifestadas publicamain, saja quai antiziganissem,

<sup>91</sup>In link a quest Parairi vegn integrà en il sboz da resoluziun avant che quel vegn puttamezz a la GR-H (Rapporteur Group on Human Rights).

<sup>92</sup> Las suandardas recumandaziuns èn ordinadas tenor la successiun dals artitgels correspontents da la Convenziun da basa.

antisemitissem u ostilitad envers Muslims; analisar sistematicamain talas manifestaziuns e perseguitar penalmain ils auturs da quellas; dar la pussaivladad a personas che appartegnan a las minoritads naziunalas, sco victimas da pleuds instigants, da purtar plant avant dretgira, particularmain cun autorisar ad organisaziuns nungouvernementalas d'agir en l'interess da la generalitat e da defender ils dretgs ed ils interess da las victimas; perseguitar senza retard las mesiras identifitgadas e las realisar sin plaun federal e chantunal, per che la segirezza da las personas che appartegnan a las minoritads naziunalas seja garantida.

*Pertutgant la legitimaziun da far recurs d'organisaziuns nungouvernementalas vegni renvià a las rectificaziuns en cifra 67.*

### **Ulteriuras recumandaziuns<sup>93</sup>**

- Tar l'elavuraziun da novs texts da lescha, per exemplu davart l'urden public, far attenziun commensuradaman al mantegniment da l'identidad e da la cultura da personas che appartegnan a minoritads naziunalas e proteger lur dretg d'exequir lur tradiziuns; garantir che la revisiun da la Lescha federala davart il commerzi ambulant e l'ordinaziun correspondenta vegnian interpretadas ed applitgadas confurm a las finamiras.
- Promover pli e pli projects da sensibilisaziun che vulan reducir pregiudizis envers la furma da viver nomada dals Jenics, Sinti e Manouches, en spezial projects che sa drizzan a las medias u a collavuraturas da las medias.
- Cuntinuar cun las stentas sin plaun federal che procuran per l'egalidad effectiva da personas da tut las cuminanzas linguisticas, uschia che las personas pon duvrar vinavant lur atgna lingua en il contact cun l'administraziun federala; laschar translatar en outras linguas naziunalas – tenor appreziar da las autoritads ed en cunvegnentscha cun las represchentantas ed ils represchentants da las minoritads pertutgadas – las decisiuns las pli impurtantas dal Tribunal federal davart ils dretgs da las personas che appartegnan a minoritads naziunalas; promover tar activitads dal mintgadi, en campagnas d'infurmazion, en la giustia ed en l'administraziun dal chantun Grischun dapli l'utilisaziun da las linguas minoritaras.

*Pertutgant il dretg da duvrar l'atgna lingua en il contact cun l'administraziun federala vegni renvià a la rectificaziun en cifra 89.*

- Cuntinuar a sviluppar en il sectur da la scolaziun e da la furmaziun professiunala soluziuns flexiblas ch'en adattadas per personas cun ina furma da viver nomada ed integrar las famiglias pertutgadas en l'elavuraziun da novs projects per garantir il dretg dals uffants sin furmaziun e per stgaffir cundiziuns che permettan da cumbinar quest dretg cun il dretg sin ina furma da viver nomada; integrar la cultura e l'istorgia jenica en ils plans d'instrucziun ed en ils medis d'instrucziun per promover la diversitat e l'integrazion sociala en la populaziun e per rinforzar la conscientia per la furma da viver nomada e sia acceptanza.

*Pertutgant la dumonda d'integrar – ultra da la cultura ed istorgia jenica – er quella dals Sinti, Manouches e Roma en ils plans d'instrucziun ed en ils medis d'instrucziun, vegni renvià a la rectificaziun en cifra 100.*

- Permetter l'instrucziun da ed en talian e rumantsch ordaifer ils territoris, nua che las personas che appartegnan a questas minoritads linguisticas viven

---

<sup>93</sup> Las suandardas recumandaziuns èn ordinadas tenor la successiun dals artitgels correspounds da la Convenziun da basa.

tradiziunalmain, particularmain en las grondas citads; tschertgar il dialog cun las represchentantas ed ils represchentants da las minoritads pertutgadas ed identifitgar il basegn dals Rumantschs e dals Taliens per l'instrucziun sin il stgalim secundar (stgalim secundar II) en lur lingua.

- Examinar – en enclegentscha cun las represchentantas ed ils represchentants da las minoritads, che reflecteschan la diversitat en lur cuminanzas – pussaivladads per ina meglra participaziun a la vita publica da persunas che appartegnan a minoritads naziunalas, per che quellas possian cooperar als process da decisiun tant sin plaun federal sco er sin plaun chantunal ed interchantunal, per exemplu tras mecanissem durabels, organs consultativs u quotas en l'administraziun publica.

*Pertutgant la dumonda da las quotas vegni renvià a las rectificaziuns en cifra 120.*